

MESYUARAT PERTAMA, PENGGAJAL KELIMA  
PARLIMEN KEEMPAT BELAS  
2022

**HARI RABU : 2 MAC 2022**

**JAWAPAN-JAWAPAN BAGI PERTANYAAN-PERTANYAAN JAWAB  
LISAN YANG TIDAK DIJAWAB DI DALAM DEWAN  
( SOALAN NO. 12 HINGGA NO. 96 )**

**NOTA : [RUJUK PENYATA RASMI HARIAN (HANSARD)]**

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK DR. SHAHRUDDIN BIN MD.  
SALLEH [ SRI GADING ]**

**TARIKH : 2 MAC 2022 (RABU)**

**SOALAN**

**DATUK DR. SHAHRUDDIN BIN MD. SALLEH [ SRI GADING ]**  
minta **MENTERI KESIHATAN** menyatakan :-

- (a) sejauh manakah tahap kadar kes obesiti dalam negara; dan
- (b) apakah tindakan drastik Kementerian untuk mengurangkan kadar kes obesiti di negara kita.

**JAWAPAN**

Tuan Yang di-Pertua,

1. Masalah obesiti dan berat badan berlebihan di Malaysia kini berada pada tahap yang membimbangkan. Definisi berlebihan berat badan adalah Indeks Jisim Tubuh (BMI) antara 25.0 hingga 29.9 kg/m<sup>2</sup> , manakala denisi obes adalah Indeks Jisim Tubuh (BMI) 30.0 kg/m<sup>2</sup> ke atas. Tinjauan Kebangsaan Kesihatan dan Morbiditi 2019 (NHMS 2019) melaporkan bahawa separuh dewasa Malaysia (50.1%) mempunyai masalah berlebihan berat badan (30.4%) atau obes (19.7%). Prevalen obes menunjukkan kadar peningkatan yang agak tinggi saban tahun berbanding kajian sebelumnya iaitu NHMS 2006 (14.0%), NHMS 2011 (15.1%) dan NHMS 2015 (17.7%). NHMS yang fokus pada pemakanan akan dijalankan pada 2024.
2. Kementerian Kesihatan (KKM) telah merangka strategi yang menyeluruh bagi menangani isu ini seperti yang digariskan dalam pelan tindakan jangka masa panjang di bawah Pelan Tindakan Pemakanan Kebangsaan Malaysia NPANM III (2016-2025), Pelan Strategik Kebangsaan untuk Penyakit Tidak Berjangkit (2016-2025) dan Polisi Menangani Obesiti di Malaysia (2016-2025).
3. Selain itu, KKM juga telah menubuhkan Jawatankuasa Kerja Menangani Masalah Obesiti bagi mencadangkan tindakan yang drastik bersesuaian dengan situasi semasa dalam menangani masalah obesiti di Malaysia. Jawatankuasa ini telah membentuk dokumen *Policy Option To Combat Obesity in Malaysia* yang mengandungi 48 polisi menangani masalah obesiti di Malaysia untuk dilaksanakan dalam masa 10 tahun.
4. Sehingga tahun 2022, sebanyak 10 polisi telah dilaksanakan, antaranya adalah mewajibkan program pengurusan berat badan di kementerian atau jabatan yang terpilih, pengenaan cukai eksais ke atas minuman manis bergula dan minuman pra-campuran, menguatkuasakan larangan mengiklan makanan dan minuman yang tinggi kandungan lemak, garam dan gula yang boleh menarik perhatian kanak-kanak dan lain-lain lagi.

5. Kementerian Kesihatan akan terus melaksanakan pelbagai polisi melalui pendekatan secara *hard policy* ke arah usaha mengawal masalah obesiti di Malaysia dan salah satunya melalui Jawatankuasa Kabinet Agenda Nasional Malaysia Sihat (ANMS) yang dipengerusikan oleh YAB Perdana Menteri dan bertindak sebagai platform peringkat tertinggi bagi membincangkan dan mengenalpasti polisi serta tindakan susulan bagi menangani NCD, termasuklah isu obesiti yang memerlukan penglibatan aktif pelbagai kementerian dan agensi.

6. Langkah-langkah menyeluruh bagi menurunkan masalah ini juga telah diambil dan dimulakan seawal peringkat bayi, kanak-kanak sehingga dewasa melalui aktiviti advokasi pemakanan yang berterusan mengikut *setting* seperti institusi dan sekolah, fasiliti kesihatan dan komuniti, tempat kerja serta industri makanan dan minuman.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SRI HAJAH ROHANI BINTI HAJI  
ABDUL KARIM [BATANG LUPAR]**

**TARIKH : 2 MAC 2022 (SELASA)**

**SOALAN**

**DATO' SRI HAJAH ROHANI BINTI HAJI ABDUL KARIM [BATANG LUPAR]** minta **MENTERI PEMBANGUNAN LUAR BANDAR** menyatakan keberkesanan program-program pembangunan sosioekonomi di bawah Kementerian dan sejauh mana ia dapat mengurangkan kadar kemiskinan di luar bandar Sarawak.

**JAWAPAN**

**Tuan Yang di-Pertua,**

Di bawah Rancangan Malaysia Kedua Belas (RMKe-12), KPLB terlibat secara langsung di bawah Tema 2 dan dalam bab 7 untuk Memperkukuh Pembangunan Sosioekonomi di Sabah dan Sarawak.

Justeru itu, KPLB akan memberi tumpuan untuk mengurangkan kadar kemiskinan di luar bandar Sarawak secara holistik melalui program-program pembangunan sosio ekonomi seperti berikut:

- i. Program Peningkatan Pendapatan, Program Latihan Kemahiran dan Kerjaya (PLKK);
- ii. Program Keusahawan di bawah KPLB dan agensi KPLB; dan
- iii. Program Keusahawan Atas Talian seperti DesaMall@KPLB.

Bagi Program Peningkatan Pendapatan (PPP) yang dijalankan, ianya mensasarkan golongan miskin dan miskin tegar yang produktif bagi menjalankan projek-projek ekonomi, di mana KPLB akan memberi bantuan peralatan dan latihan.

Bantuan peralatan adalah secara *one-off* bernilai maksimum RM10,000 kepada penerima yang layak dengan RM 8,500 bagi peralatan dan RM1,500 diperuntukkan untuk kos latihan/kursus kemahiran asas projek. Untuk tahun 2021, sebanyak **RM394,111.00 dan 41 peserta** daripada Sarawak yang telah mendapat manfaat daripada program ini.

Selain dari itu, usaha bagi meningkatkan peranan belia serta penglibatan golongan belia di kawasan luar bandar adalah melalui Program Latihan Kemahiran dan Kerjaya (PLKK) di mana peluang latihan kursus jangka pendek yang tidak melebihi 6 bulan diberikan kepada golongan belia luar bandar dari kumpulan pendapatan B40, miskin dan miskin tegar.

Kursus peningkatan kemahiran kumpulan sasar ini bagi memastikan kumpulan sasar mampu mendapat pekerjaan atau menghasilkan perniagaan yang boleh memberikan pendapatan yang lebih tinggi dan seterusnya mengeluarkan mereka dari belenggu kemiskinan. Untuk tahun 2021, **RM69,000.00 dan 15 peserta** daripada Sarawak yang telah mendapat manfaat daripada program ini.

Program PROSPEK yang merupakan program pembangunan ekonomi in-situ juga telah dilaksanakan di Matu, Sarawak dan memberi manfaat kepada **3,000 Ketua Isi Rumah** dengan **kos projek RM9 juta**.

Manakala untuk Program DesaMall@KPLB di Sarawak iaitu program pemasaran atas talian untuk usahawan luar bandar, sebanyak **209 usahawan** luar bandar yang terlibat untuk **tahun 2021**.

Program **Quick Win** di bawah KEMAS yang bertujuan untuk **meningkatkan kemahiran sedia ada dalam usaha membolehkan peserta meningkatkan pendapatan**. Kit peralatan Kursus Kemahiran *Quick Win* yang diberikan adalah bagi tujuan kursus di samping membantu peserta yang ingin memulakan perniagaan. Untuk tahun 2021, sebanyak **RM390,000.00 dan 110 orang** peserta daripada Sarawak yang telah mendapat manfaat daripada program ini.

Selain itu, terdapat juga program Agropolitan iaitu di bawah Program Lonjakan Mega Luar Bandar (PLMLB), yang merupakan satu program bersepadu dan komprehensif bertujuan menghapuskan kemiskinan luar bandar melalui peningkatan pendapatan, meningkatkan kualiti hidup serta mempercepatkan pembangunan di kawasan mundur, terpencil dan terbiar. Sebanyak 2 projek Agropolitan dilaksanakan di Sarawak iaitu Agropolitan Gunung Sadok di Saratok dan Agropolitan Pulau Buit di Mukah dengan **kos projek RM24.1 juta** yang memberi manfaat kepada **480 peserta**.

KPLB mengakui masih banyak lagi perlu dilaksanakan untuk pembangunan luar bandar di Negeri Sarawak terutamanya dari segi pembasmian kemiskinan dan mempertingkatkan liputan kemudahan asas di kawasan luar bandar terutamanya bekalan air di rumah dan juga bekalan elektrik 24 jam.

Sekian, terima kasih.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN WONG CHEN [ SUBANG ]**

**TARIKH : 02 MAC 2022 (RABU)**

**SOALAN**

**TUAN WONG CHEN [ SUBANG ]** minta **MENTERI SUMBER MANUSIA** menyatakan status dan bilangan pekerja asing yang dilindungi oleh Pertubuhan Keselamatan Sosial (PERKESO) dan sama ada ia mematuhi pakatan *Global Compact for Safe, Orderly and Regular Migration*.

**JAWAPAN**

**Tuan Yang di-Pertua,**

Skim Bencana Kerja Pekerja Asing telah dilaksanakan oleh PERKESO mulai 1 Januari 2019 untuk memberi perlindungan kepada pekerja asing yang mengalami kemalangan atau penyakit yang terbit atau berpunca dari pekerjaannya. Berdasarkan statistik PERKESO, bilangan pekerja asing yang dilindungi oleh PERKESO sehingga 31 Januari 2022 adalah seramai 1.96 juta orang.

Skim Bencana Kerja Pekerja Asing yang diperkenalkan oleh Kerajaan adalah selaras dengan prinsip yang digariskan di bawah *Global Compact for Safe, Orderly and Regular Migration* terutamanya berkaitan dengan hak sama rata perlindungan keselamatan sosial bagi pekerja asing yang sah bekerja di negara ini. Kerajaan Malaysia, telah meratifikasi Konvensyen ILO No. 19, 1925 berhubung Kesaksamaan Layanan (Pampasan Kemalangan) yang menyatakan semua pekerja tanpa mengira kewarganegaraan mesti diberi layanan sama rata dalam faktor pampasan kemalangan dengan melaksanakan Skim Bencana Kerja Pekerja Asing di bawah Akta Keselamatan Sosial Pekerja 1969 (Akta 4).

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' HAJI AHMAD NAZLAN  
BIN IDRIS (JERANTUT)**

**TARIKH : 2 MAC 2022 (RABU)**

**SOALAN**

Minta **MENTERI PEMBANGUNAN USAHAWAN DAN KOPERASI** menyatakan usahasama yang dilaksanakan Kementerian dengan institusi pembiayaan kewangan dalam membantu peniaga kecil yang berpotensi bagi mendapatkan pinjaman modal yang lebih besar supaya dapat memudahkan evolusi perniagaan daripada berstatus mikro kepada yang lebih besar.

**JAWAPAN**

**Tuan Yang di-Pertua,**

Bagi membantu membangunkan usahawan yang berpotensi, kementerian ada melaksanakan usaha sama antara agensi-agensi kewangan di bawah MEDAC. Antara usaha sama yang dilaksanakan adalah seperti berikut:

- (i) **Program Lestari Bumi** [kerjasama antara SME Bank, TEKUN Nasional dan Amanah Ikhtiar Malaysia (AIM)]

Di bawah usaha sama tersebut, pihak TEKUN Nasional dan AIM bersetuju merujuk peniaga kecil yang berpotensi di bawah portfolio mereka kepada SME Bank bagi mendapatkan pembiayaan yang lebih besar untuk tujuan modal kerja dan pemilikan aset perniagaan. Kejayaan usaha sama ini terbukti apabila TEKUN Nasional dan AIM menyumbang sebanyak 21 kelulusan bernilai RM5.5 juta pada tahun 2021.

## SOALAN NO : 15

(ii) **Program Graduan TEKUN** – Bank Rakyat (kerjasama antara Bank Rakyat dan TEKUN Nasional)

Di bawah usaha sama tersebut, pihak TEKUN Nasional merujuk usahawan di bawah mereka yang berpotensi kepada Bank Rakyat untuk mendapatkan pembiayaan. Sehingga ini, 63 usahawan telah diluluskan pembiayaan dengan jumlah sebanyak RM3.33 juta.

Selain itu, MEDAC melalui SME Corp. Malaysia turut melaksanakan usaha sama dengan agensi luar iaitu Malaysian Industrial Development Finance (MIDF) bagi membantu peniaga kecil yang berpotensi melalui pelaksanaan program seperti berikut:

(iii) **Program Pembiayaan Pengukuhan PKS (*SME Revitalisation Financing* - SMERF)**

Program ini menyediakan pembiayaan pinjaman mudah kepada PMKS terutamanya dalam sektor-sektor yang terjejas dengan COVID-19 dengan kadar faedah 3% dan tanpa yuran pemprosesan. Sejak dilaksanakan pada tahun 2021 sehingga 31 Januari 2022, sejumlah 111 permohonan telah diluluskan dengan nilai keseluruhan pinjaman berjumlah RM20.4 juta.

MEDAC melalui agensi-agensi yang berkaitan turut menyediakan khidmat nasihat, bimbingan dan bantuan pembiayaan kepada semua kategori usahawan daripada segmen informal, mikro, kecil dan sederhana. Ini adalah bagi memastikan ekosistem keusahawanan di Malaysia boleh berkembang maju dan membantu evolusi semua usahawan di Malaysia.

Ekosistem pembiayaan yang diperkenalkan oleh MEDAC akan memastikan bahawa usahawan dapat berkembang dari peringkat informal ke usahawan mikro seterusnya menjadi usahawan kecil dan sederhana. Usahawan yang telah dilatih oleh INSKEN dan CEDAR akan mendapat keutamaan dalam permohonan bagi mendapatkan pembiayaan yang bersesuaian. Keutamaan permohonan pembiayaan tersebut adalah bagi mana-mana agensi pembiaya di bawah Kementerian ini dan tertakluk kepada syarat-syarat dan kriteria yang ditetapkan oleh setiap agensi.

## PEMBIAYAAN KEPADA USAHAWAN INFORMAL DAN MIKRO

Bagi membantu usahawan informal dan mikro, **Amanah Ikhtiar Malaysia (AIM)** memberikan pembiayaan sehingga RM30,000. **TEKUN Nasional** pula menyediakan pembiayaan mudah dari nilai minimum RM1,000 sehingga maksimum RM100,000 dengan tempoh pembiayaan daripada 6 bulan sehingga 120 bulan.

Bantuan pembiayaan ini adalah sebagai permulaan bagi usahawan informal dan mikro untuk berkembang dan seterusnya berkecayaan dan memenuhi kriteria untuk mendapatkan pembiayaan yang lebih besar yang ditawarkan oleh agensi-agensi lain di bawah MEDAC atau bank-bank komersil.

## PEMBIAYAAN KEPADA PERUSAHAAN MIKRO, KECIL DAN SEDERHANA (PKS)

Seterusnya melalui **Program Pembiayaan Digital PMKS (*Digital Financing Initiative - DFI*)** bermula pada tahun 2021 di bawah **SME Corp.**, usahawan PMKS boleh mendapatkan pinjaman mudah pada kadar faedah sebanyak 2% dengan nilai pembiayaan minimum RM50,000 sehingga maksimum RM500,000. Bagi tahun 2021 sehingga Januari 2022, sejumlah 20 PMKS telah diluluskan pinjaman berjumlah RM4.7 juta.

Usahawan-usahawan PMKS juga boleh mendapatkan pinjaman perniagaan daripada pelbagai produk yang ditawarkan oleh **Bank Rakyat** bagi meningkatkan dan mengembangkan lagi perniagaan.

Pada tahun 2021, pihak MEDAC melalui **SME Bank** telah menjalankan penilaian kepada 873 usahawan seluruh negara bagi melihat keberkesanan program-program bantuan pembiayaan yang telah diberikan. Secara keseluruhan, bantuan pembiayaan usahawan yang telah diberikan telah membantu dalam meningkatkan nilai jualan usahawan terlibat. Penilaian dibuat berdasarkan jumlah jualan (*sales*), keuntungan sebelum cukai (*profit before tax*), peluang pekerjaan (*employment*), peluang eksport (*export*), adaptasi teknologi (*technology*) dan peluang peningkatan (*new growth*).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DR. KELVIN YII LEE WUEN  
[ BANDAR KUCHING ]**

**TARIKH : 2 MAC 2022 (RABU)**

**SOALAN**

**DR. KELVIN YII LEE WUEN [ BANDAR KUCHING ]** minta **MENTERI KESIHATAN** menyatakan jumlah *backlog* prosedur-prosedur atau rawatan kes bukan COVID-19 yang telah ditangguhkan disebabkan COVID-19 dan berapakah jumlah *backlog* yang berjaya dikurangkan dalam beberapa bulan ini dan anggaran bila kesemua *backlog* dapat diselesaikan.

**JAWAPAN**

Tuan Yang di-Pertua,

1. Sehingga 31 Disember 2021, jumlah kes tertunggak di hospital KKM adalah sebanyak 37,963. Sekiranya dibandingkan dengan jumlah kes tertunggak 3 bulan sebelumnya, jumlah tersebut berkurang sebanyak 34% iaitu daripada 57,355 kes pada 30 September 2021.

	30 September 2021	31 Disember 2021
Jumlah Kes Pembedahan Tertunggak	53,785	33,111

Jumlah Kes Bukan Pembedahan Tertunggak	3,570	4,852
Jumlah Keseluruhan	57,355	37,963

2. Kes Tertunggak jenis Pembedahan

Sebanyak 93.8% atau 53,785 adalah kes-kes tunggakan surgical based yang meliputi pembedahan am, neurosurgery, urologi, pembedahan pediatrik, pembedahan plastik dan rekonstruktif, pembedahan kardiorasik, pembedahan vaskular, ginekologi, orthopedik, ophthalmologi dan Otorinolaringologi (ORL).

3. Kes Tertunggak jenis Bukan Pembedahan

Sebanyak 6.2% atau 3,570 adalah tunggakan untuk prosedur perubatan (medical based). Prosedur tersebut meliputi Arteriovenous Fistula Creation, angioplasty, angiogram, pacemaker insertion, sleep study, lung function test, bronchoscopy & pleuroscopy, stem cell transplant, nuclear medicine scans, serta radioterapi dan CT simulation.

4. Strategi Pengurangan Kes Tertunggak

Beberapa inisiatif telah dilaksanakan bagi menangani isu kes tertunggak ini seperti:

- a) penyumberluaran kepada hospital swasta;
- b) pembukaan semula dewan-dewan bedah elektif di hospital-hospital KKM secara berperingkat bermula pada bulan Oktober 2021;
- c) inisiatif pembedahan elektif hari Sabtu dari jam 8 pagi hingga 5 petang di hospital-hospital berpakar di seluruh negara bermula pada bulan Disember 2021; dan
- d) melaksanakan pembedahan secara besar-besaran (*Mass Surgery Initiative*) di beberapa negeri seperti:

- i. *Mass Urology Surgery Initiative* di Hospital Selayang yang telah mula berlangsung pada 10 Februari 2022, sehingga 13 Februari 2022;
- ii. Program *Mass Cataract Surgery Initiative* telah dilaksanakan di Hospital Raja Perempuan Zainab II Kota Bharu pada Oktober 2021. Manakala program tersebut akan dilaksanakan di Hospital Tawau Sabah pada bulan Mac 2022; dan
- iii. *Mass Vascular Surgery Initiative (Arteriovenous fistula; AVF)* di Hospital Kemaman yang telah dilaksanakan pada Oktober 2021.

5. Kapasiti Kemudahan dan Sumber Manusia

Buat masa ini, kes-kes pembedahan elektif dan kecemasan sedang dilaksanakan seperti biasa dan tiada kekangan dari segi petugas kesihatan dan kapasiti kemudahan kesihatan. Bagi kes-kes tertunggak, beberapa strategi seperti yang dinyatakan di atas telah dikenal pasti. Ini termasuk penyumberluaran, tambahan waktu operasi bilik bedah dan pembedahan secara besar-besaran yang dapat mempercepatkan lagi usaha KKM dalam menyelesaikan kes-kes tertunggak.

6. Melalui pelaksanaan inisiatif-inisiatif tersebut, lebih banyak kes-kes yang tertangguh dijangka akan dapat diselesaikan seawal pertengahan tahun.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SRI AZALINA OTHMAN SAID  
(PENGERANG)**

**TARIKH : 2 MAC 2022 (RABU)**

**SOALAN**

**DATO' SRI AZALINA OTHMAN SAID (PENGERANG)** minta **MENTERI PERUMAHAN DAN KERAJAAN TEMPATAN** menyatakan sejak tahun 2019 hingga sekarang berapa, serta dimanakah projek-projek Perumahan Mampu Milik yang telah dan sedang dibina dan dirancang untuk dibina di kawasan Parlimen Pengerang.

**JAWAPAN**

**Tuan Yang di-Pertua,**

Untuk makluman Ahli Yang Berhormat, pada masa ini terdapat satu (1) Program Perumahan Rakyat (PPR) yang sedang dibina oleh Kerajaan Persekutuan di Pengerang iaitu PPR Kechil Pengerang. Projek ini merangkumi 300 unit rumah pangsa berbilang tingkat dengan kos RM86,594,100. Selain itu, terdapat satu (1) lagi projek yang telah dirancang dan akan dilaksanakan di kawasan Pengerang iaitu Rumah Transit Penjawat Awam Pengerang, Kota Tinggi, Johor. Projek yang merangkumi 700 unit rumah ini dalam proses perolehan dan dijangka akan dimulakan pembinaannya pada bulan Mac 2022.

Bagi Projek Perumahan Penjawat Awam (PPAM) di negeri Johor, terdapat sebanyak dua (2) projek melibatkan 717 unit telah siap dibina, empat (4) projek melibatkan 1,375 unit dalam peringkat pembinaan manakala dua (2) projek melibatkan 1,500 unit sedang dalam peringkat perancangan. Bagi Parlimen Pengerang pula, terdapat satu (1) projek PPAM melibatkan 300 unit yang sedang dalam peringkat pembinaan.

Selain itu, Perbadanan PR1MA Malaysia (PR1MA) mempunyai sebanyak enam (6) projek di negeri Johor dengan jumlah unit sebanyak 4,479. Daripada jumlah ini, sebanyak tiga (3) projek telah siap dibina, di mana dua (2) daripadanya telah siap dibina sebelum tahun 2019 dan satu (1) projek dengan jumlah unit sebanyak 1,284 telah siap dibina pada tahun 2021. Bagi projek-projek yang sedang dalam pembinaan pula, PR1MA mempunyai tiga (3) projek dengan jumlah unit sebanyak 2,519. Pada masa kini, fokus PR1MA adalah untuk menyiapkan projek-projek sedia ada dan masih belum mempunyai perancangan untuk memulakan sebarang projek baharu di kawasan Parlimen Pengerang. Namun begitu, PR1MA sentiasa bersedia untuk bekerjasama dengan kerajaan negeri dan agensi swasta dalam menyediakan perumahan berkualiti yang mampu dimiliki oleh rakyat Johor.

## **SOALAN NO : 17**

Bagi Program Rumah Mesra Rakyat (RMR) di bawah Syarikat Perumahan Negara Berhad (SPNB) pula, terdapat 6,542 unit RMR yang telah disiapkan di negeri Johor, 304 unit RMR yang sedang dalam pembinaan serta 165 unit RMR baharu telah diluluskan. Bagi kawasan Pengerang pula, terdapat 147 unit RMR yang telah disiapkan, 9 unit RMR yang sedang dalam pembinaan serta 1 unit RMR baharu telah diluluskan. Untuk makluman Ahli Yang Berhormat juga, pada masa ini terdapat sejumlah 908 pemohon dari negeri Johor dan sejumlah 39 pemohon di Parlimen Pengerang yang dinilai layak dalam senarai menunggu. Namun, pelaksanaannya adalah tertakluk kepada peruntukkan tahunan yang akan diluluskan Kerajaan untuk program RMR ini.

Saya percaya dengan jumlah perumahan mampu milik yang disediakan oleh Kerajaan sebanyak 1,457 unit di kawasan Pengerang ini, keperluan perumahan untuk rakyat Pengerang telah diambil kira.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN MA'MUN BIN SULAIMAN  
(KALABAKAN)**

**TARIKH : 2 MAC 2022 (RABU)**

**SOALAN**

Minta **MENTERI PEMBANGUNAN USAHAWAN DAN KOPERASI** menyatakan program-program serta bengkel-bengkel bimbingan keusahawanan yang telah dilaksanakan di seluruh negeri Sabah pada tahun 2021 dan apakah program-program tersebut berjaya mencapai sasaran dan objektif yang diperlukan dalam melahirkan lebih ramai usahawan baharu di Sabah.

**JAWAPAN**

Tuan Yang di-Pertua,

Pelbagai inisiatif dilaksanakan oleh kementerian melalui agensi bagi melahirkan lebih ramai usahawan baharu di seluruh negara termasuklah di Sabah.

**SME Corporation Malaysia (SME CORP.)**

**Program Tunas Usahawan Belia Bumiputera (TUBE)** merupakan bantuan disediakan bagi **pembangunan kapasiti** berbentuk latihan, geran permulaan perniagaan dan khidmat nasihat kepada belia Bumiputera yang berumur 18 sehingga 30 tahun. Bagi tahun 2021, sejumlah 1,016 belia Bumiputera telah mendapat manfaat dengan peruntukan diluluskan sebanyak RM15.3 juta. Daripada jumlah tersebut, **229 peserta adalah dari Sabah** dengan peruntukan sebanyak RM3.5 juta bagi kos latihan dan bantuan geran permulaan perniagaan.

**Institut Keusahawanan Negara (INSKEN)**

- (i) **Program bimbingan INSKEN** menyasarkan peningkatan purata hasil jualan sekurang-kurangnya 20% kenaikan setelah selesai menyertai program bimbingan tersebut. Namun tiada program khas dilaksanakan di Sabah memandangkan situasi pandemik yang melanda dan Perintah Kawalan Pergerakan (PKP). INSKEN mengambil inisiatif melaksanakan program secara dalam talian (*online*) melibatkan semua negeri. Antara program bimbingan yang dilaksanakan seperti **Program Bimbingan Bisnes Bumiputera (IBBC)** dan **Program Bimbingan Jualan Atas Talian (e-Board)**.
- (ii) **Program Bimbingan Bisnes Bumiputera (IBBC)** merupakan program membimbing usahawan melalui pakar industri dan jurulatih untuk meningkatkan skala perniagaan serta memberikan latihan (*business technical know-how*) khususnya pemasaran untuk peningkatan jualan selama 4 bulan. Pada tahun 2021 sebanyak 31 kohort dengan penglibatan 868 orang usahawan telah dilaksanakan. Seramai **24 usahawan dari Negeri Sabah**

## SOALAN NO : 18

telah menyertai program IBBC melibatkan industri bakeri, postnatal dan spa. Kenaikan purata hasil jualan peserta 20% hingga 277% melibatkan 3 industri yang disertai oleh peserta dari Sabah.

- (iii) **Program Bimbingan Jualan Atas Talian (e-Board)** memperkukuhkan kemampuan dan kapasiti usahawan mikro, kecil dan sederhana tempatan dalam penggunaan platform *online* melalui latihan dan bimbingan teknikal secara intensif. Program ini mensasarkan peningkatan hasil jualan minimum 20% setelah selesai menyertai program bimbingan ini selama 4 bulan. Pada tahun 2021, 14 kohort telah dilaksanakan melibatkan seramai 1,942 usahawan dengan peningkatan hasil jualan sebanyak 20.9% bagi yang telah selesai bimbingan. Seramai **27 orang peserta dari Negeri Sabah** menyertai program ini dengan purata hasil jualan meningkat sehingga 60%.
- (iv) Selain itu, tahun 2021 memperlihatkan seramai **1,319 orang usahawan dari Negeri Sabah** telah menyertai program latihan yang disediakan oleh INSKEN. Program-program latihan INSKEN turut dilaksanakan secara dalam talian sepanjang tempoh PKP selama 2 hingga 3 hari. Antara program latihan yang dilaksanakan ialah:
  - a) Kursus Asas Keusahawanan (KAK);
  - b) Kursus Asas Industri (INBT);
  - c) Program Latihan Bisnes (IBT);
  - d) Program Usahawan Dropship dan Ejen (DNA); dan
  - e) Kelas Asas Platform (Lazada/Shopee).

### **Perbadanan Nasional Berhad (PERNAS)**

Pernas telah melancarkan Projek **Jom Jadi Usahawan Berjaya, Be Your Own Boss (BYOB)** pada awal tahun 2021 dengan menawarkan 2 program di bawahnya iaitu program “*Successful Women Entrepreneurship Engagement Talent (SWEET)*” bagi golongan wanita dan program “*Young Entrepreneurship Engagement Talent (YOUNITY)*” bagi golongan belia. Peserta BYOB ditawarkan panduan dan latihan yang berstruktur dan komprehensif (latihan pengurusan kewangan, motivasi dan digitalisasi),

## SOALAN NO : 18

padanan perniagaan, pembiayaan serta akses kepada pasaran semasa dan pemantauan selama 6 bulan apabila bermulanya perniagaan. Sejak program ini diperkenalkan pada 1 Januari 2021, seramai 1,070 orang peserta telah menyertai program BYOB ini merangkumi **108 usahawan dari negeri Sabah**. Terdapat 74 pembiayaan berjumlah RM12.3 juta telah diluluskan pada tahun 2021. Pada tahun 2022, PERNAS menyasarkan penyertaan seramai 1,100 orang peserta dalam kalangan graduan, belia, wanita dan asnaf akan menyertai program ini.

Pada masa yang sama, PERNAS menerusi *Franchise Institute* menyediakan pelbagai program latihan berfokuskan francais dan keusahawanan secara menyeluruh serta memberi taklimat kesedaran keusahawanan francais kepada usahawan.

### **Bank Kerjasama Rakyat Malaysia Berhad (Bank Rakyat)**

Program Pembangunan Usahawan di bawah Bank Rakyat dikendalikan melalui **Program SUTERA** (*Sustainable – Teamwork – Radical*). Program pembangunan usahawan ini menawarkan inisiatif seperti yang berikut:

- (i) **Kursus Asas Keusahawanan (KAK)** – Program pembangunan bagi usahawan informal secara percuma;
- (ii) ***Surviving The New Norm (STNN)*** – Program pembangunan usahawan merangkumi aspek pengurusan kewangan dalam norma baharu dan perniagaan melalui platform digital;
- (iii) ***One to One Coaching (O2O)*** – Program bimbingan daripada pakar industri bagi usahawan mikro selama 3 bulan;
- (iv) **Jom Ubah Minda Peniaga (JUMP)** – Program pembangunan usahawan ke platform digital yang dikendalikan oleh PERNAS;
- (v) **Santai Namun Sampai – Program Jelajah Bank Rakyat** bersama usahawan. Program ini menawarkan khidmat Klinik Usahawan bagi memberi perkhidmatan rundingan kepada usahawan; dan

## SOALAN NO : 18

- (vi) Pada tahun 2021, sebanyak **90 usahawan dari Sabah** telah menyertai program pembangunan usahawan di bawah kendalian Bank Rakyat. Usahawan-usahawan dari program ini akan ditawarkan pembiayaan dan kelulusan berdasarkan kelayakan. Sehingga 14 Februari 2022, pembiayaan kepada usahawan Sabah adalah **sebanyak RM2 juta** melibatkan **29 usahawan**.

Menerusi inisiatif program kewangan sosial bagi membantu usahawan asnaf berpotensi dari latar belakang yang kurang berjaya dalam perniagaan untuk dibimbing dan berkembang maju seiring dengan pasaran, seramai **20 orang usahawan asnaf berpotensi dari Sabah** telah menyertai **Program RAKYATpreneur 2.0**. Tempoh program ini adalah selama 6 bulan melibatkan latihan kemahiran keusahawanan, bimbingan dan pemantauan daripada Universiti Teknologi MARA (UiTM) bermula daripada September 2021 sehingga Februari 2022 di mana usahawan telah menerima suntikan dana sebanyak RM5,000.00 atau RM10,000.00 setiap peserta. Daripada laporan Interim Program yang diterima dari rakan kolaborasi iaitu Universiti Teknologi MARA, majoriti peserta menunjukkan peningkatan kenaikan jualan sebanyak 11%.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SYED ABU HUSSIN BIN HAFIZ SYED  
ABDUL FASAL (BUKIT GANTANG)**

**TARIKH : 2 MAC 2022 (RABU)**

**SOALAN**

**DATO' SYED ABU HUSSIN BIN HAFIZ SYED ABDUL FASAL (BUKIT GANTANG)** minta **MENTERI PEMBANGUNAN LUAR BANDAR** menyatakan status peruntukan RM650,000.00 bagi Projek Kecil dan Projek Pembangunan Jalan Desa Parlimen Bukit Gantang yang telah disyorkan oleh YB Menteri untuk semakan dan kelulusan. Seterusnya status permohonan RM3 Juta untuk Projek Jalan Perhubungan Desa (JPD) dan Program Ameniti Sosial (PAMS) Parlimen Bukit Gantang semasa Perbahasan Rang Undang-undang Perbekalan (Belanjawan) Tahun 2022, berapakah nilai peruntukan yang diberikan dan nama-nama projek pembangunan bawah KPLB yang diluluskan bagi tahun 2022.

**JAWAPAN**

**Tuan Yang Di-Pertua,**

Untuk makluman Yang Berhormat, peruntukan RM650,000 tersebut adalah persetujuan secara dasar sahaja dan ia tertakluk kepada kelulusan peruntukan tahunan oleh agensi pusat mengikut skop dan garis panduan yang berkuatkuasa. Dalam perancangan pelaksanaan projek-projek kecil Kementerian, KPLB turut mengambilkira keperluan secara menyeluruh di semua negeri/wilayah supaya projek pembangunan dapat dilaksanakan secara sama rata sesuai dengan dasar-dasar dan fokus Kerajaan semasa.

Pada tahun 2022, KPLB telah diluluskan sebanyak RM420juta untuk JPD dan RM60.8 juta untuk Program Ameniti Sosial (PAMS). Oleh itu, pihak Yang Berhormat boleh mengemukakan semula cadangan pelaksanaan projek di Parlimen Bukit Gantang untuk pertimbangan Kementerian ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : DR. ONG KIAN MING [ BANGI ]**

**TARIKH : 02 MAC 2022 (RABU)**

**SOALAN**

**DR. ONG KIAN MING [ BANGI ]** minta **MENTERI SUMBER MANUSIA** menyatakan jumlah jawatan EP1, EP2 dan EP3 yang telah diiklankan di MyFutureJobs pada tahun 2020 dan 2021 dan berapa kekosongan jawatan-jawatan ini telah diisikan melalui pengiklanan MyFutureJobs.

**JAWAPAN**

**Tan Sri Yang di-Pertua,**

Berdasarkan data yang diperolehi daripada Sistem Insurans Pekerjaan (SIP) PERKESO sehingga 17 Februari 2022, jumlah Jawatan untuk EP1 adalah 3,527 jawatan. Manakala jawatan kepada EP2 adalah 5,831 jawatan serta EP3 jawatan berjumlah 1,101. Jumlah jawatan-jawatan ini yang telah berjaya diisi oleh bakat tempatan adalah 81 calon.

Berdasarkan statistik SIP, jawatan-jawatan dari sektor ICT yang mendapat penempatan yang paling tinggi untuk bakat tempatan seperti Jurutera Perisian (*Software Engineer*), *Big Data* dan sebagainya. Selain itu, dari sektor pendidikan juga mendapat penempatan yang tinggi seperti pembantu Guru, Guru bahasa Inggeris, Guru Seni dan sebagainya.

Jumlah jawatan-jawatan yang telah berjaya diisi oleh bakat tempatan adalah rendah kerana majikan memerlukan calon yang berpengalaman serta berkemahiran khas yang tidak dimiliki oleh calon tempatan. Selain itu, kebanyakan jawatan-jawatan yang dipohon oleh majikan memerlukan kemahiran bahasa seperti bahasa India, Vietnamese, Arabic dan sebagainya.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : PUAN RUBIAH BINTI HAJI WANG  
[ KOTA SAMARAHAN ]**

**TARIKH : 02 MAC 2022 (RABU)**

**SOALAN**

**PUAN RUBIAH BINTI HAJI WANG [ KOTA SAMARAHAN ]** minta **MENTERI SUMBER MANUSIA** menyatakan bilangan pencarum PERKESO di bawah Skim Bencana Kerja Pekerjaan Sendiri dan daripada jumlah tersebut, berapakah pemandu e-hailing dan penghantar barangan atau makanan secara atas talian yang menerima manfaat.

**JAWAPAN**

**Tuan Yang di-Pertua,**

Berdasarkan statistik PERKESO, sehingga 18 Februari 2022 bilangan pencarum PERKESO atau Orang Bekerja Sendiri yang aktif di bawah Skim Bencana Kerja Pekerjaan Sendiri adalah seramai 367,746. Daripada jumlah tersebut, seramai 205 dalam kalangan pemandu e-hailing dan 743 terdiri daripada penghantar barang atau makanan secara atas talian telah menerima manfaat di bawah skim ini.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN EMPAT BELAS 2022**

---

**PERTANYAAN : JAWAB LISAN**

**DARIPADA : YB PUAN NOR AZRINA BT. SURIP [ MERBOK ]**

**TARIKH : 02 MAC 2022 (RABU)**

**SOALAN**

**PUAN NOR AZRINA BINTI SURIP [ MERBOK ]** minta **MENTERI DALAM NEGERI** menyatakan dalam tempoh 2 tahun berlaku Perintah Kawalan Pergerakan (PKP), masih terdapat ramai pasangan dwinasional yang ingin berkahwin. Adakah sebarang rancangan Kerajaan untuk membenarkan mereka masuk ke Malaysia untuk mendaftarkan perkahwinan mereka.

**JAWAPAN**

Tuan Yang Di Pertua,

Kerajaan pada pada 22 Oktober 2021 bersetuju supaya warganegara asing yang mempunyai Pas Lawatan Jangka Panjang di Malaysia yang masih bersah laku adalah dibenarkan masuk ke Malaysia tanpa perlu mendapat kelulusan daripada Jabatan Imigresen Malaysia (JIM) melalui sistem MyTravelPass (MTP). Arahan ini berkuat kuasa pada 1 November 2021.

Walau bagaimanapun, warganegara asing yang ingin masuk ke Malaysia bagi kategori berikut masih perlu membuat permohonan melalui MyTravelPass bagi pertimbangan secara kes demi kes:

- (i) Lawatan Sosial;
- (ii) Pemegang Pas Lawatan Jangka Panjang yang telah tamat tempoh;
- (iii) Permohonan Pas Penggajian (Kategori I, II, III) / *Resident Pass-Talent* (RP-T) / Tanggungan / Pembantu Rumah Asing dan Pas Lawatan Ikhtisas - Pakar yang baru diluluskan; dan
- (iv) *Short Term Business Traveller*.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN EMPAT BELAS 2022**

---

**PERTANYAAN : JAWAB LISAN**

**DARIPADA : DATO' SERI DR. WAN AZIZAH WAN ISMAIL  
[ PANDAN ]**

**TARIKH : 02 MAC 2022 (RABU)**

**SOALAN**

**DATO' SERI DR. WAN AZIZAH WAN ISMAIL [ PANDAN ]** minta **MENTERI DALAM NEGERI** menyatakan adakah Syarikat Bestinet Sdn Bhd telah dipilih secara rundingan terus untuk menguruskan projek pengambilan pekerja Bangladesh kerana difahamkan bahawa syarikat ini pernah digantung perkhidmatan pada tahun 2016 dan 2018.



**JAWAPAN**

Tuan Yang Dipertua,

Pelantikan Syarikat Bestinet Sdn. Bhd. sebagai penyedia sistem penyelesaian menyeluruh pengurusan pekerja asing dibuat melalui Surat Setuju Terima (SST) bertarikh 14 Januari 2018. Mesyuarat Jawatankuasa Kabinet Mengenai Pekerja Asing dan Pendatang Asing Tanpa Izin (JKPPA-PATI) Kali ke-14 Bil.2/2015 pada 20 Ogos 2015 telah bersetuju supaya Syarikat Bestinet Sdn. Bhd. dilantik untuk melaksanakan sistem penyelesaian menyeluruh pengurusan pekerja asing secara holistik dalam talian. Lanjutan daripada itu, SST bertarikh 14 Januari 2018 telah dikeluarkan.

Kementerian ingin menegaskan bahawa Bestinet Sdn. Bhd. dilantik sebagai syarikat yang menguruskan projek pengambilan pekerja Bangladesh kerana urusan pengambilan pekerja asing dibuat oleh majikan yang memenuhi kelayakan syarat-syarat yang ditetapkan. Sehubungan itu, tidak timbul isu bahawa Syarikat Bestinet Sdn. Bhd. pernah digantung perkhidmatan pada tahun 2016 dan 2018. Peranan syarikat adalah sebagai pembangun dan penyedia perkhidmatan penyelesaian menyeluruh pengurusan pekerja asing yang mana diguna pakai oleh Kementerian Dalam Negeri dan Kementerian Sumber Manusia.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN AKMAL NASRULLAH BIN MOHD. NASIR  
[JOHOR BHARU]**

**TARIKH : 2 MAC 2022 (RABU)**

**SOALAN**

**TUAN AKMAL NASRULLAH BIN MOHD. NASIR** minta **MENTERI KESIHATAN** menyatakan : -

- (a) jumlah perbelanjaan setakat ini bagi menjalankan kempen- kempen kesedaran (*online* dan *offline*) berkaitan vaksin COVID-19; dan
- (b) langkah-langkah yang diambil Kementerian bagi mengekang penularan berita palsu khususnya berkaitan dos penggalak vaksin COVID-19.

**JAWAPAN**

Tuan Yang di-Pertua,

1. Pada tahun 2021, pihak Kementerian Kesihatan Malaysia (KKM) telah membelanjakan sebanyak RM13.25 juta bagi melaksanakan aktiviti pendidikan dan promosi kesihatan khususnya berkaitan COVID-19, pembudayaan hidup sihat, pembudayaan norma baharu, pematuhan SOP serta kepentingan dan keselamatan vaksin COVID-19 melalui pelbagai platform dan saluran media.
2. Di samping itu, pihak swasta dan NGO turut bersama-sama KKM melaksanakan pelbagai aktiviti pendidikan dan promosi kesihatan dalam memerangi pandemik COVID-19 melalui tanggungjawab sosial korporat (CSR).
3. Bagi menangani penularan berita palsu, KKM melaksanakan pelbagai pendekatan iaitu:
  - (a) memantau secara teliti kandungan berita yang diragui dan diambil daripada sumber yang tidak sah. Penegasan fakta yang sahih turut dibuat menerusi Kenyataan Media dan Sidang Media bagi memperjelaskan mengenai isu yang sensitif. Justeru, KKM telah melaksanakan pendekatan progresif dalam usaha melipatgandakan **pendekatan secara holistik** dalam mendepani isu-isu kesihatan di pelantar digital kementerian menerusi media sosial yang disinergikan melalui Facebook, Twitter, Instagram, Youtube, Tik Tok dan Telegram. Manakala, hebahan ini adalah berpandukan kepada fakta yang telah dibuktikan menerusi 'science evidence base' oleh KKM sebagai sumber rujukan dalam penyebaran maklumat kepada rakyat.
  - (b) Bagi tujuan tersebut, KKM telah mengambil tindakan terhadap 14 berita palsu yang tular di media sosial, dengan mengambil kira impak terhadap imej kementerian bagi penularan isu yang boleh menjejaskan kredibiliti kementerian. Daripada jumlah tersebut, **3 laporan** telah dibuat dan **masih dalam siasatan**

**pihak Polis Diraja Malaysia (PDRM) dan Suruhanjaya Komunikasi dan Multimedia Malaysia (SKMM).**

- (c) Melaksanakan aktiviti promosi dan pendidikan secara berterusan di pelbagai saluran media bagi memastikan masyarakat mendapat maklumat yang tepat mengenai dos penggalak vaksin COVID-19. Antara mesej yang disampaikan ialah kepentingan mendapatkan dos penggalak walaupun telah lengkap vaksin primer, keberkesanan, keselamatan serta kepentingan vaksin bagi melindungi diri, keluarga serta golongan berisiko tinggi.
- (d) Melaksanakan aktiviti promosi yang menampilkan pakar dari pelbagai bidang berkaitan untuk menjawab kemusykilan oleh orang awam berkaitan vaksin.
- (e) Memperkukuhkan promosi melalui media sosial dengan kerjasama pelbagai pihak.
- (f) Menghasilkan bahan promosi dalam pelbagai bahasa bagi memastikan capaian maklumat lebih meluas kepada pelbagai etnik dan lapisan masyarakat.
- (g) Bekerjasama rapat dengan agensi kerajaan lain, swasta, pertubuhan bukan kerajaan (NGO) serta pemimpin masyarakat melalui sesi libat urus dan pemerkasaan komuniti.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KE LIMA,  
PARLIMEN KEEMPAT BELAS 2022**

---

**PERTANYAAN : JAWAB LISAN**

**DARIPADA : YB TUAN DR. ONG KIAN MING (BANGI)**

**TARIKH : 2 MAC 2022 (RABU)**

**SOALAN**

**DR. ONG KIAN MING [ BANGI ]** minta **MENTERI DALAM NEGERI** menyatakan hasil siasatan untuk kesemua kes kematian dalam tahanan (deaths in custody) pada tahun 2020 dan 2021 dan langkah-langkah yang telah dan sedang diambil untuk menangani isu ini.

**JAWAPAN**

Tuan Yang Di-Pertua,

Bagi tahun 2020, PDRM telah membuka 13 kertas siasatan. Daripada jumlah tersebut, sebanyak tiga (3) kertas siasatan telah dikategorikan sebagai *No Further Action* (NFA), empat (4) kertas siasatan masih dalam inkues, lima (5) kertas siasatan sedang disemak oleh Timbalan Pendakwaraya (TPR) dan satu (1) kertas siasatan masih menunggu laporan bedah siasat.

Manakala bagi tahun 2021, sebanyak 14 kertas siasatan telah dibuka oleh PDRM. Daripada jumlah tersebut, sebanyak dua (2) kertas siasatan dalam proses inkues, tiga (3) kertas siasatan di TPR dan sembilan (9) kertas siasatan masih menunggu laporan bedah siasat/laporan kimia.

Semua kertas siasatan tersebut masih di bawah pemantauan Jabatan Siasatan Jenayah (JSJ), Polis Diraja Malaysia (PDRM) dan sentiasa dipantau dari masa ke semasa sehingga semua kertas siasatan berkeputusan.

Tuan Yang Di-Pertua,

Kementerian Dalam Negeri (KDN) melalui Polis Diraja Malaysia (PDRM) mengambil berat tentang hak asasi tahanan di semua lokap PDRM di seluruh negara. Ini termasuk usaha mengatasi kes tahanan mati semasa berada di bawah pengawasan PDRM.

Justeru, untuk menambahbaik pengurusan tahanan dalam lokap PDRM, PDRM telah menyediakan Garis Panduan Standard (SOP) yang lebih ketat termasuk dalam menguruskan tahanan sakit, meningkatkan kekerapan rondaan di sel pada waktu malam, serta penambahan anggota yang menguruskan tahanan.

Di samping itu, PDRM dengan kerjasama Kementerian Kesihatan Malaysia (KKM) telah mewujudkan *Custodial Health Unit* (CHU) di lima (5)

## **SOALAN NO : 25**

Lokap Berpusat dan Lokap Berpusat Bayan Baru, Pulau Pinang dijadikan sebagai projek rintis bagi memastikan tahanan yang ditahan di lokap PDRM mendapat pemeriksaan kesihatan sewajarnya. Inisiatif ini adalah salah satu langkah pencegahan bagi mengelak berlakunya kematian tahanan lokap PDRM.

Dalam masa yang sama, pada 10 Disember 2021, Jemaah Menteri telah bersetuju dengan cadangan KDN untuk melaksanakan inisiatif pemeriksaan kesihatan Orang Kena Tahan (OKT) oleh Pengamal Perubatan Swasta bagi membantu kekurangan Pegawai Perubatan Kerajaan sedia ada. Inisiatif ini dijangka memberi manfaat kepada lebih kurang 200 ribu OKT setiap tahun dan ini sudah pasti membantu dalam memastikan OKT yang ditahan berada dalam keadaan sihat.

Selain itu, pemasangan kamera litar tertutup (CCTV) di 684 lokap balai polis/IPD/IPK PDRM sedang dilaksanakan bagi mengawasi dan memantau OKT di sel-sel lokap demi memastikan kejadian tidak diingini berlaku di dalam lokap.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN YUSUF BIN ABD. WAHAB  
(TANJUNG MANIS)**

**TARIKH : 2 MAC 2022 (RABU)**

**SOALAN**

**TUAN YUSUF BIN ABD. WAHAB [ TANJUNG MANIS ]** minta **MENTERI BELIA DAN SUKAN** menyatakan adakah terdapat perancangan untuk mendirikan sebuah kompleks sukan di Bandar Baru Tanjung Manis. Kemudahan ini sangat diperlukan untuk menggalakkan aktiviti bersukan di kalangan masyarakat.

**JAWAPAN**

**Tan Sri Yang Di-Pertua,**

Untuk makluman Ahli Yang Berhormat, Kementerian Belia dan Sukan (KBS) pada masa ini tiada perancangan untuk membina sebuah pusat kemudahan sukan di Bandar Baru Tanjung Manis. Walau bagaimanapun, pihak Yang Berhormat boleh mengemukakan permohonan secara rasmi kepada Kementerian ini untuk dipertimbangkan dalam *Rolling Plan* Rancangan Malaysia Ke-12.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN CHAN MING KAI (ALOR SETAR)**

**TARIKH : 2 MAC 2022 (RABU)**

**SOALAN**

**TUAN CHAN MING KAI [ ALOR SETAR ]** minta **MENTERI DALAM NEGERI** menyatakan berapa daftar lahir Anak Tak Sah Taraf :- (a) setiap tahun mulai tahun 2009 sehingga kini; dan (b) warganegara dan bukan warganegara.

**JAWAPAN**

Tuan Yang Di Pertua,

Untuk makluman Ahli Yang Berhormat, dalam urusan pendaftaran kelahiran bagi anak Tak Sah taraf di JPN, **tiada sebarang catatan Anak Tak Sah Taraf (ATST) akan dicetak pada ruangan sijil kelahiran yang dikeluarkan**. Justeru, pihak JPN tidak mempunyai rekod bagi kategori sijil kelahiran dengan catatan ATST. Walau bagaimanapun, pendaftaran kelahiran **tanpa** mengemukakan maklumat perkahwinan akan didaftarkan dengan catatan Seksyen 13 Akta Pendaftaran Kelahiran dan Kematian 1957 (Akta 299) atau tanpa maklumat bapa di dalam sijil kelahiran tersebut.

**SOALAN NO : 27**

Statistik ATST dengan catatan Seksyen 13 dan tanpa maklumat bapa mengikut tahun dari 2009 sehingga 15 Februari 2022 adalah seperti berikut:

<b>Tahun</b>	<b>Seksyen 13 Tanpa Maklumat Perkahwinan</b>	<b>Tanpa Maklumat Bapa</b>	<b>Jumlah</b>
2009	25051	25765	50816
2010	24338	27190	51528
2011	30130	23219	53349
2012	33955	24038	57993
2013	32735	23622	56357
2014	31430	23710	55140
2015	28125	23147	51272
2016	25417	24197	49614
2017	24025	23592	47617
2018	23917	22327	46244
2019	23965	21918	45883
2020	21147	20160	41307
2021	22098	16512	38610
2022 (sehingga 15 Februari 2022)	2973	2106	5079
<b>JUMLAH</b>	<b>349324</b>	<b>301503</b>	<b>650,827</b>

Dari segi kewarganegaraan pula, berdasarkan rekod JPN daripada tahun 2009 sehingga 15 Februari 2022, seramai 479,929 orang dalam kategori sijil kelahiran yang mempunyai catatan Seksyen 13 dan tanpa maklumat bapa adalah bertaraf warganegara manakala 170,898 orang lagi bertaraf bukan warganegara.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN LUKANISMAN BIN AWANG SAUNI  
[ SIBUTI ]**

**TARIKH : 02 MAC 2022 (RABU)**

**SOALAN**

**TUAN LUKANISMAN BIN AWANG SAUNI [ SIBUTI ]** minta **MENTERI SUMBER MANUSIA** menyatakan apakah langkah-langkah telah Kerajaan ambil untuk memastikan bahawa terdapat peruntukan pendidikan teknikal dan praktikal yang mencukupi dalam “*GREEN SKILLS*” untuk memenuhi permintaan ekonomi masa depan.

**JAWAPAN**

**Tuan Yang di-Pertua,**

Kerajaan sentiasa responsif dengan kehendak teknologi semasa serta usaha bagi memenuhi permintaan ekonomi masa hadapan. Ini termasuklah pembangunan sumber manusia mahir dalam bidang *Green Skills*. Langkah-langkah yang telah Kerajaan ambil untuk memastikan bahawa terdapat peruntukan pendidikan teknikal dan praktikal yang mencukupi dalam "*Green Skills*" untuk memenuhi permintaan ekonomi masa depan antaranya :

- i. Jabatan Pembangunan Kemahiran akan memastikan setiap pembangunan Standard Kemahiran Pekerjaan Kebangsaan yang dibangunkan dengan kerjasama industri telah menerapkan elemen *green technology* merentasi bidang kemahiran. Sehingga 31 Januari 2022 sebanyak 2046 Standard Kemahiran Pekerjaan Kebangsaan yang telah dibangunkan dan masih aktif. Standard Kemahiran Pekerjaan Kebangsaan ini akan dijadikan rujukan dalam pembangunan kurikulum untuk pelaksanaan latihan kemahiran serta menentukan skop kerja di industri.
- ii. Perbadanan Tabung Pembangunan Kemahiran memainkan peranan penting dalam mengarusperdanakan latihan kemahiran serta membantu melahirkan pekerja mahir negara di bawah Dana Latihan TVET. Pada tahun 2021, seramai 13,974 orang pelatih telah dibiayai untuk mengikuti latihan berdasarkan Standard Kemahiran Pekerjaan Kebangsaan yang telah dibangunkan dengan jumlah peruntukan sebanyak RM 221,148,700.46. Pada tahun 2022, PTPK bertanggungjawab untuk menguruskan Dana Latihan TVET berjumlah RM180juta yang dijangka akan memberi peluang kepada 12,000 orang pelatih.

## SOALAN NO : 28

- iii. Di peringkat serantau pula, Malaysia melalui Kementerian Sumber Manusia telah mempengerusikan Mesyuarat Menteri-Menteri Buruh ASEAN dari 2018 hingga 2020 dengan tema *Promoting Green Jobs for Equity and Inclusive Growth of ASEAN Community*. Seterusnya, Malaysia telah mengetuai negara-negara anggota ASEAN dalam merangka dan membangunkan sebuah deklarasi yang dikenali sebagai *ASEAN Declaration on Promoting Green Jobs for Equity and Inclusive Growth of ASEAN Community*.
- iv. Deklarasi ini telah diterima pakai oleh pemimpin-pemimpin ASEAN semasa Sidang Kemuncak ASEAN ke-33 di Singapura pada tahun 2018. Deklarasi ini bertujuan merintis jalan bagi negara-negara anggota ASEAN untuk menumpukan usaha bagi menghijaukan pekerjaan dan kemahiran bagi memenuhi permintaan masa hadapan.
- v. Hasil daripada perkongsian ini dijangka akan dapat membantu negara-negara anggota ASEAN termasuklah Malaysia bagi menyediakan tenaga kerja tempatan yang khusus dalam pekerjaan hijau selain menggalakkan peralihan (*transition*) dari pekerjaan dan kemahiran sedia ada ke arah pekerjaan hijau dan kemahiran hijau sebagai persediaan bagi permintaan masa hadapan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATO' ABDULLAH SANI BIN ABDUL HAMID  
[ KAPAR ]**

**TARIKH : 02 MAC 2022 (RABU)**

**SOALAN**

**DATO' ABDULLAH SANI BIN ABDUL HAMID [KAPAR]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah terdapat inisiatif bagi memantau harga barangan seperti yang pernah dibuat oleh Kerajaan Pakatan Harapan iaitu dengan melantik Penyelaras Kepenggunaan Parlimen di setiap kawasan Parlimen atau sebagainya.

**JAWAPAN**

**Tuan Yang Di-Pertua,**

Kementerian Perdagangan Dalam Negeri dan Hal Ehwal Pengguna (KPDNHEP) telah melaksanakan Program Pemantauan Harga sejak tahun 2008 bagi tujuan menangani isu-isu kenaikan harga barangan dan membantu dalam pelaksanaan polisi harga dan anti pencatutan bersasar. Berdasarkan pelaksanaan program ini, Kementerian mempunyai satu mekanisma pemantauan harga berserta pangkalan data harga runcit yang lebih luas merangkumi pelbagai kategori premis seperti pasar pasar, hypermarket, supermarket, pasar mini dan kedai runcit. Kementerian pada masa ini mempunyai seramai 980 Pegawai Pemantau Harga (PPH) di peringkat ibu pejabat dan KPDNHEP Negeri/ Cawangan yang berfungsi untuk melaksanakan aktiviti pemantauan harga termasuk di setiap kawasan Parlimen.

Untuk makluman, pelantikan Penyelaras Kepenggunaan Parlimen (PKP) masih diteruskan oleh Kerajaan pada masa ini. PKP yang dilantik membantu kementerian dengan menjadi pengantara di antara Kementerian dan komuniti serta membantu pelaksanaan program dan aktiviti kepenggunaan. PKP ini juga bertindak sebagai “mata dan telinga” Kerajaan dalam melaporkan isu-isu kepenggunaan di peringkat parlimen.

Calon-calon yang dilantik sebagai PKP perlulah memenuhi syarat-syarat yang telah ditetapkan oleh Kementerian. Selain daripada itu, PKP juga tertakluk kepada Terma dan Syarat Pelantikan.

3) Antara bidang tugas yang diamanahkan kepada PKP adalah seperti berikut:

- a. Mengumpul maklumat mengenai isu dan masalah kepenggunaan di kawasan Parlimen untuk dipanjangkan ke KPDNHEP;
- b. Membantu KPDNHEP melaksanakan aktiviti-aktiviti kepenggunaan di kawasan Parlimen masing-masing;
- c. Merancang dan melaksanakan ceramah kepenggunaan kepada masyarakat;
- d. Menghadiri seminar, taklimat, bengkel yang dianjurkan oleh KPDNHEP;
- e. Menyertai sesi jerayawara atau pembukaan tapak pameran di kawasan Parlimen dan membantu menyebarkan risalah, poster, buku-buku serta lain-lain maklumat yang berkaitan dengan kepenggunaan kepada masyarakat setempat;
- f. Memberi panduan dan membantu ahli masyarakat membuat aduan berkaitan kepenggunaan termasuk pemfailan kepada Tribunal Tuntutan Pengguna;
- g. Menghadiri mesyuarat bersama KPDNHEP Negeri/Cawangan bagi membincangkan isu-isu dan permasalahan di peringkat Parlimen;
- h. Menjalin hubungan dengan pemimpin masyarakat bagi mendapatkan isu-isu kepenggunaan semasa; dan
- i. Tugas-tugas lain yang diarahkan oleh KPDNHEP Negeri/Cawangan dari semasa ke semasa.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB DATO' NGEH KOO HAM (BERUAS)**

**TARIKH : 2 MAC 2022 (RABU)**

**SOALAN**

**DATO' NGEH KOO HAM [ BERUAS ]** minta **MENTERI DALAM NEGERI** menyatakan jumlah kes rampasan dadah oleh pihak penguatkuasa yang dianggarkan melebihi RM100,000 nilai pasaran runcit (street value) bagi tahun 2017, 2019, 2019, 2020 dan 2021. Dalam kesemua kes-kes ini, nyatakan jumlah kes yang mana tidak ada suspek dalam pengedaran dadah-dadah ini yang didakwa di mahkamah.

**JAWAPAN**

Tuan Yang Di Pertua,

Jumlah kes yang tidak didakwa di mahkamah bagi kes-kes rampasan dadah yang nilainya melebihi RM100,000.00 sejak tahun 2017 hingga tahun 2021 adalah sebanyak 44 kes. Pecahan kes rampasan melebihi RM100,00.00 yang mana suspek dalam pengedaran dadah-dadah ini yang tidak didakwa di mahkamah adalah seperti yang berikut:

1. Tahun 2017, sebanyak 8 kes pengedaran dadah yang tidak didakwa;
2. Tahun 2018, sebanyak 5 kes pengedaran dadah yang tidak didakwa;
3. Tahun 2019, sebanyak 10 kes pengedaran dadah yang tidak didakwa;  
Tahun 2020, sebanyak 4 kes pengedaran dadah yang tidak didakwa;  
dan
4. Tahun 2021, sebanyak 17 kes pengedaran dadah yang tidak didakwa.

TAHUN	BILANGAN KES TIDAK DIDAKWA
2017	8
2018	5
2019	10
2020	4
2021	17
<b>JUMLAH</b>	<b>44</b>

Untuk makluman Ahli Yang Berhormat juga, kesemua 44 kes ini tidak dapat dituduh di Mahkamah dan didakwa kerana tiada tangkapan suspek atau suspek tidak dapat dikenalpasti dalam kes tersebut.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI DR. SHAMSUL ANUAR  
BIN HAJI NASARAH [ LENGGONG ]**

**TARIKH : 2 MAC 2022 (RABU)**

**SOALAN**

**DATUK SERI DR. SHAMSUL ANUAR BIN HAJI NASARAH [ LENGGONG ]** minta **MENTERI KESIHATAN** menyatakan sejauh manakah keyakinan pihak Kementerian bahawa cadangan pembukaan semula pintu sempadan tanpa keperluan kuarantin wajib tidak akan merisikokan tahap keselamatan kesihatan awam negara dan sejauh manakah keupayaan kesihatan negara untuk menangani krisis pandemik COVID-19 sekiranya ia kembali memburuk terutamanya dengan kemunculan varian Omicron.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) Kementerian Kesihatan pada 1 Mac 2022 telah membentangkan cadangan SOP pembukaan sempadan negara di Mesyuarat Kuartet Menteri COVID-19. Cadangan ini seterusnya akan diangkat untuk pertimbangan Jemaah Menteri.

2. Bagi memastikan pembukaan sempadan negara dibuat secara berhati-hati, Kerajaan turut meneliti langkah-langkah kesihatan awam dengan mengambil kira:

- a. status vaksinasi COVID-19 dalam negara;
- b. kapasiti kesihatan termasuklah kadar penggunaan katil di hospital dan kadar kemasukan ke ICU serta kadar penggunaan ventilator di hospital; dan
- c. Kadar kematian termasuklah *Brought in dead* (BID).

3. Status vaksinasi COVID-19 pada 1 Mac 2021 adalah seperti berikut:

<b>Tahap Umur</b>	<b>Dos 1 (%)</b>	<b>Lengkap (%)</b>	<b>Penggalak (%)</b>
Dewasa ( ≥18 tahun)	98.7	97.5	62.6
Remaja ( 12-17 tahun)	93.1	90	0
Kanak-kanak (5-11 tahun)	25.5	0	0

4. Sementara itu kadar penggunaan katil pada 15 Februari 2022, status kapasiti kesihatan adalah seperti berikut:

- a. Penggunaan PKRC sebanyak 55.7%;
- b. Penggunaan katil di hospital sebanyak 64.2%;
- c. Penggunaan katil ICU sebanyak 56.6%; dan
- d. Penggunaan ventilator sebanyak 35.2%

5. Purata kematian (7 hari) pula pada 6 Februari 2022 adalah 11 orang yang mana menunjukkan *trend* menurun.
6. Perhatikan kepada keadaan yang dinyatakan, beberapa kesimpulan boleh dirumuskan iaitu:
- a. Walaupun jumlah jangkitan COVID-19 yang meningkat akibat penularan Omicron dalam komuniti, penggunaan PKRC, penggunaan katil di hospital, penggunaan katil ICU serta ventilator tidak banyak berubah atau terdapat sedikit peningkatan;
  - b. Jumlah penggunaan katil di hospital yang tidak berubah atau terdapat sedikit peningkatan pada masa kini, mungkin dikaitkan dengan kadar vaksinasi COVID-19 yang tinggi dalam komuniti; dan
  - c. Tren kematian juga menunjukkan penurunan.
7. Semua fakta ini menunjukkan bahawa beban COVID-19 di hospital masih terkawal. KKM masih boleh mengendalikan situasi COVID-19 pada ketika ini. Pada masa yang sama KKM juga memantau secara dekat kesan yang dihadapi negara-negara yang telah membuka sempadan negara masing-masing. Melalui penelitian ini KKM berharap dapat mencadangkan cadangan terbaik ke arah pembukaan sempadan negara dalam masa terdekat.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN CHOW KON YEOW (TANJONG)**

**TARIKH : 2 MAC 2022 (RABU)**

**SOALAN**

**TUAN CHOW KON YEOW (TANJONG)** minta **MENTERI PEMBANGUNAN LUAR BANDAR** menyatakan keluasan tanah milik Lembaga Kemajuan Wilayah Pulau Pinang (PERDA) yang bakal digunakan untuk tujuan pembangunan projek rumah awam di Pulau Pinang. Nyatakan perincian projek mengikut lokaliti daerah berserta kos.

**JAWAPAN**

**Tuan Yang di-Pertua,**

Cadangan pembangunan projek perumahan awam di Pulau Pinang yang akan dibangunkan oleh Lembaga Kemajuan Wilayah Pulau Pinang (PERDA) melibatkan 2 projek di Daerah Seberang Perai Utara (SPU) iaitu:

- i. Program Perumahan Kesejahteraan Rakyat (PPKR) Tok Alang seluas 7 ekar yang mengandungi 95 unit rumah dengan anggaran kos RM18juta; dan
- ii. Projek Perumahan Rakyat (PPR) bersama Kementerian Perumahan dan Kerajaan Tempatan (KPKT) di Pongsu Seribu seluas 20 ekar yang mengandungi 500 unit rumah dimana anggaran kos masih belum disediakan kerana masih di peringkat perancangan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB DATO' HJ CHE ABDULLAH B. MAT NAWI  
(TUMPAT)**

**TARIKH : 2 MAC 2022 (RABU)**

**SOALAN**

**DATO' HAJI CHE ABDULLAH BIN MAT NAWI [ TUMPAT ]** minta **MENTERI DALAM NEGERI** menyatakan pelan komprehensif oleh Kementerian bagi menyekat jenayah penyeludupan dadah yang masih berleluasa dari negara Thailand ke Jajahan Tumpat.

**JAWAPAN**

Tuan Yang Di Pertua,

Kementerian melalui PDRM sentiasa komited dalam usaha membanteras kegiatan pengedaran dan penagihan dadah di seluruh negara dan ianya tidak terkecuali bagi Negeri Kelantan yang menjadi salah satu laluan dan pintu masuk utama negara. Tidak dinafikan kedudukan geografi sempadan negeri Kelantan dan Thailand agak mudah untuk diakses melalui wujudnya laluan-laluan tikus, pangkalan dan jeti haram yang banyak menyebabkannya sukar dikawal.

PDRM juga mengambil pendekatan mengadakan kerjasama yang baik dengan agensi-agensi penguatkuasa tempatan seperti Angkatan Tentera Malaysia (ATM), Jabatan Kastam Diraja Malaysia, Agensi Penguatkuasaan Maritim Malaysia (APMM) dan Kementerian Kesihatan Malaysia (KKM). Unit Sekretariat Nukleus Narkotik (SNN) juga telah diwujudkan di sempadan negara termasuk di Kelantan untuk mengumpul maklumat risikan mengenai aktiviti penyeludupan dadah oleh sindiket antarabangsa. Selain daripada itu kerjasama juga dijalankan dengan kerjasama erat dengan agensi penguatkuasa dadah di Thailand iaitu pihak *Office of Narcotics Control Board (ONCB)*, *Narcotics Suppression Bureau (NSB)* dan *Royal Thai Police (RTP)* dalam usaha bersama mengekang aktiviti pengedaran dadah rentas sempadan di antara kedua-dua negara.

Tuan Yang DiPertua,

PDRM sentiasa melaksanakan operasi-operasi pembenterasan dadah secara berterusan. Operasi-operasi bersepadu berskala besar seperti OP Tapis Khas dan operasi-operasi terancang narkotik telah diadakan secara berkala bagi tujuan mengambil tindakan terhadap pengedar dan penagih dadah di seluruh Malaysia termasuk di Negeri Kelantan. Bagi Jajahan Tumpat, seramai 29 orang telah ditangkap dengan rampasan pelbagai jenis dadah berjumlah 242.20 gram dan 35.95 liter berjaya dirampas dalam tempoh pelaksanaan Op Tapis baru-baru ini yang dilaksanakan pada 21 – 23 Januari 2022.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB DATUK WILSON UGAK ANAK KUMBONG  
(HULU RAJANG)**

**TARIKH : 2 MAC 2022 (RABU)**

**SOALAN**

**DATUK WILSON UGAK ANAK KUMBONG [ HULU RAJANG ]** minta **MENTERI DALAM NEGERI** menyatakan status Balai Polis Daerah Kapit dan status Balai Polis Daerah Belaga .

**JAWAPAN**

Tuan Yang Di-Pertua,

Kompleks Ibu Pejabat Polis Daerah (IPD) Kapit mula digunakan sejak tahun 1979 dan beroperasi di tapak seluas 5.10 ekar. IPD Kapit beroperasi dengan perjawatan seramai 116 orang yang diketuai oleh Ketua Polis Daerah berpangkat Deputy Superintendan (DSP). Perumahan kompleks ini terdiri daripada satu (1) buah rumah jenis banglo, tiga (3) blok rumah teres setingkat, lapan (8) buah rumah teres dua tingkat dan satu (1) blok pangsapuri/flat dengan jumlah keseluruhan sebanyak 109 unit. Di bawah perbelanjaan semasa tahun 2020, IPD Kapit telah menerima kelulusan peruntukan bagi pembaikan pejabat dan kuarters berjumlah RM443,358.00.

Kajian sedang dijalankan bagi mengenalpasti keperluan penambahbaikan balai tersebut yang seterusnya akan disenaraikan bagi program pembangunan fizikal Rancangan Malaysia dalam memenuhi aspirasi dan harapan penduduk sekitar dalam menjaga keamanan serta keselamatan setempat.

Tuan Yang Di-Pertua,

Kompleks Balai Polis Belaga adalah di dalam kompleks yang sama dengan Ibu Pejabat Polis Daerah (IPD) Belaga. Kompleks ini mula digunakan sejak tahun 1996 dengan keluasan tapak 7.26 ekar. IPD Belaga beroperasi dengan perjawatan seramai 65 orang diketuai oleh Ketua Polis Daerah berpangkat Deputy Superintendan (DSP) manakala Balai Polis Belaga beroperasi dengan perjawatan seramai 26 orang yang diketuai oleh Ketua Polis Balai berpangkat Sarjan Mejar.

Bangunan IPD dan Balai Polis Belaga musnah sepenuhnya dalam kebakaran pada 14 Disember 2020 dan kini beroperasi sementara menggunakan kabin. Kerajaan telah meluluskan projek bagi pembinaan baru IPD Belaga dalam *Rolling Plan* Kedua (RP2) Tahun 2022, Rancangan Malaysia Ke-12 pada pembentangan bajet Oktober 2021 dengan status terkini melibatkan proses penyelarasan projek oleh pihak Jabatan Kerja Raya (JKR) dan KDN.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN RAMKARPAL SINGH  
A/L KARPAL SINGH (BUKIT GELUGOR)**

**TARIKH : 2 MAC 2022 (RABU)**

**SOALAN**

**TUAN RAMKARPAL SINGH A/L KARPAL SINGH [ BUKIT GELUGOR ]** minta **MENTERI DALAM NEGERI** menyatakan sama ada siasatan terhadap Tan Sri Azam Baki berkenaan isu pemilikan saham atas nama beliau masih berjalan walaupun Suruhanjaya Sekuriti telah memuktamadkan dan menutup siasatan terhadap beliau dan sekiranya tidak, apakah sebab-sebab siasatan diberhentikan dan/atau tidak diteruskan.

**JAWAPAN**

Tuan Yang Di Pertua,

PDRM masih meneruskan siasatan berhubung isu pemilikan saham di atas nama Tan Sri Azam Baki, berkait Dang Wangi report 396/2022 bertarikh 06 Januari 2022, dengan membuka Kertas Enkuiri Polis (KEP). Setakat ini, siasatan masih berterusan. Sehubungan itu, Kementerian tidak berhasrat untuk mengulas lebih lanjut berhubung kes ini supaya tidak mengganggu siasatan yang masih berlangsung.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : TUAN ANYI NGAU (BARAM)**

**TARIKH : 2 MAC 2022 (RABU)**

**SOALAN**

**TUAN ANYI NGAU (BARAM)** minta **MENTERI PEMBANGUNAN LUAR BANDAR** Nyatakan status pelaksanaan naik taraf Jalan Balak Fasa 4 di kawasan Parlimen Baram yang melibatkan Rumah Panjang Tanjong Tepalit/Long Tungan/Long Lellang /Lio Mato/ Ba Muboi dan lain-lain.

**JAWAPAN**

**Tuan Yang di-Pertua,**

Untuk makluman Yang Berhormat, Projek Naik taraf Jalan-Jalan Balak Fasa 4: Bahagian Miri di kawasan Parlimen Baram yang melibatkan Rumah Panjang Long Tungan/Long Lellang /Ba Abang/ Ba Muboi telah diluluskan di bawah *Rolling Plan* Pertama, Rancangan Malaysia Sebelas (RP-1, RMKe-11) dengan kos sebanyak RM70.6 juta.

Skop projek yang diluluskan adalah naik taraf jalan sepanjang 9.53km daripada jalan *gravel* kepada jalan berturap dengan spesifikasi JKR R1. Status semasa projek ini adalah dalam peringkat kerja-kerja awalan oleh perunding dan dijangka dapat ditender pada suku pertama tahun 2023 setelah proses rekabentuk selesai.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN AHMAD FAHMI BIN MOHAMED  
FADZIL [ LEMBAH PANTAI ]**

**TARIKH : 2 MAC 2022 (RABU)**

**SOALAN**

**TUAN AHMAD FAHMI BIN MOHAMED FADZIL [LEMBAH PANTAI]** minta **MENTERI KESIHATAN** menyatakan apakah langkah-langkah Kerajaan untuk mendekati dan mengubah sikap kelompok anti-vaksin, terutama dalam usaha program vaksinasi mengatasi wabak COVID-19.

**JAWAPAN**

Tuan Yang di-Pertua,

1. Kementerian Kesihatan sedar tentang tindakan-tindakan serta aktiviti-aktiviti yang dijalankan oleh kelompok anti-vaksin ini. Kementerian Kesihatan akan terus berusaha memberikan penjelasan dan berkongsi maklumat yang sahih kepada rakyat menggunakan pelbagai media dan saluran yang ada.
2. Kementerian Kesihatan juga tidak teragak-agak untuk membuat laporan polis sekiranya ada kenyataan yang dikeluarkan oleh kumpulan anti-vaksin ini adalah palsu, memberi gambaran yang tidak benar mengenai program imunisasi atau menyebabkan kegusaran awam. Sekiranya suatu laporan polis dibuat mengenai golongan anti-vaksin atau mana-mana orang yang cuba untuk mempengaruhi pencapaian Program Imunisasi COVID-19 Kebangsaan (PICK), pihak polis akan membuka kertas siasatan sewajarnya di bawah seksyen 233 Akta Komunikasi dan Multimedia 1998 [Akta 588] dan juga seksyen 505 Kanun Keseksaan [Akta 574].
3. Kementerian Kesihatan meneruskan usaha advokasi dan memberi penerangan mengenai kepentingan pengambilan vaksin COVID-19 kepada masyarakat, di samping menambahbaik pelaksanaan Program Imunisasi COVID-19 Kebangsaan bagi menggalakkan penerimaan vaksin COVID-19 oleh masyarakat di setiap pelusuk negara ini.
4. Inisiatif yang dilaksanakan ini telah menunjukkan hasil yang memberangsangkan. Sehingga 1 Mac 2022, 97.5% penduduk dewasa di Malaysia telah menerima dos lengkap manakala 62.6% telah menerima dos penggalak. Bagi remaja berumur 12 hingga 17 tahun pula, 90% telah menerima dos lengkap manakala bagi vaksinasi kanak-kanak berumur 5 hingga 11 tahun yang baru dimulakan pada 28 Februari 2021 baru-baru ini, 25.5% telah mendapatkan dos pertama.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN HAJI WAN HASSAN BIN  
MOHD RAMLI [ DUNGUN ]**

**TARIKH : 2 MAC 2022 (RABU)**

**SOALAN**

**TUAN HAJI WAN HASSAN BIN MOHD RAMLI [ DUNGUN ]** minta **MENTERI KESIHATAN** menyatakan langkah pemantauan yang rapi oleh Kementerian terhadap penjualan ubat-ubatan dalam talian memandangkan masih begitu banyak ubat-ubatan yang berbahaya dan tidak berdaftar sedang diiklankan secara berleluasa pada waktu ini.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) sentiasa menjalankan pemantauan dan penguatkuasaan bagi memastikan produk-produk kesihatan dan ubat-ubatan yang dipasarkan di Malaysia berdaftar dengan Pihak Berkuasa Kawalan Dadah (PBKD) sebelum dijual kepada orang awam. Produk kesihatan yang berdaftar mempunyai nombor pendaftaran MAL serta pelekat keselamatan hologram pada labelnya.
2. Bagi mengekang penjualan produk kesihatan tidak berdaftar pihak KKM menjalankan tindakan pemeriksaan dan operasi serbuan secara berterusan ke atas premis-premis atau penjual tersebut berdasarkan pemantauan dalaman dan pengesahan ke atas aduan yang diterima daripada orang awam. Syarikat atau individu yang didapati memiliki atau menjual produk kesihatan tidak berdaftar akan disiasat dan didakwa di mahkamah di bawah Akta Jualan Dadah 1952.
3. Bahagian Penguatkuasaan Farmasi, KKM telah menerima sebanyak 1,107 aduan mengenai penjualan ubat tidak berdaftar secara dalam talian sepanjang tahun 2021 sehingga Januari 2022. Berdasarkan pengesahan aduan yang dijalankan, sebanyak 1,202 premis telah diserbu pada tahun 2021 dengan nilai rampasan berjumlah RM22,275,319 dan sehingga 31 Januari 2022, sebanyak 130 premis telah diserbu dengan nilai rampasan berjumlah RM1,681,532.
4. Bahagian Penguatkuasaan Farmasi juga telah meningkatkan pemantauan dan tindakan penguatkuasaan melibatkan pengiklanan dan penjualan ubat tidak berdaftar secara dalam talian. Sejak tahun 2020, pihak syarikat pengendali platform telah diarahkan untuk menyekat sebarang produk ubat-ubatan tidak berdaftar. Sebanyak 8,145 iklan produk tidak berdaftar telah diarahkan untuk diturunkan di platform e-dagang dalam negara sepanjang tahun 2021.
5. Kementerian Kesihatan Malaysia melalui Bahagian Penguatkuasaan Farmasi turut terlibat dalam operasi antarabangsa dan



aktiviti antarabangsa yang memberi tumpuan kepada laman sesawang dan media sosial yang menawarkan ubat-ubatan yang berbahaya seperti Operasi Pangea, Projek Energia dan penyediaan Toolkit to Combat Illegal Internet Medical Product Sales. Kerjasama dengan pihak INTERPOL dan agensi penguatkuasaan lain dalam dan luar negara juga diadakan secara berkala bagi memastikan ubat-ubatan yang dijual secara dalam talian tidak dapat dibawa masuk ke Malaysia.

6. KKM juga menjalankan pelbagai usaha pendidikan untuk meningkatkan kesedaran awam mengenai penggunaan produk kesihatan berdaftar melalui dialog awam, ceramah, Kempen Kenali Ubat Anda, Duta Kenali Ubat Anda dan Kempen Waspada Pembelian Ubat Dalam Talian di seluruh negara. Melalui kempen tersebut, maklumat berkaitan produk kesihatan atau ubat-ubatan berdaftar disampaikan kepada pelbagai golongan masyarakat untuk menyedarkan masyarakat supaya lebih berhati-hati semasa membeli produk kesihatan di pasaran.

7. Orang awam turut digalakkan untuk mengemukakan aduan dan menyalurkan maklumat produk kesihatan yang meragukan sebagai usaha bersama pihak kementerian untuk membanteras penjualan produk-produk kesihatan yang tidak berdaftar bagi melindungi kesihatan dan kesejahteraan orang awam. Aduan dan maklumat berkenaan boleh disalurkan kepada Bahagian Penguatkuasaan Farmasi, KKM melalui laman sesawang <https://www.pharmacy.gov.my> ATAU melalui Portal Sistem Pengurusan Aduan Agensi Awam (SisPAA) di alamat <https://moh.spab.gov.my> atau mana-mana Cawangan Penguatkuasaan Farmasi yang berdekatan ATAU melalui talian 03-7841 3200 agar tindakan sewajarnya dapat diambil bagi membanteras penjualan produk tidak berdaftar di pasaran.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN IGNATIUS DORELL LEIKING**

**TARIKH : 02 MAC 2022 (RABU)**

**SOALAN**

**DATUK IGNATIUS DARELL LEIKING [ PENAMPANG ]** minta **MENTERI  
DALAM NEGERI** menyatakan :-

(a) adakah Pas Residen Sementara Sabah (PRESS) pada tahun 2016 adalah sama dengan Pas Sementara Sabah pada tahun 2019; dan

(b) apakah perbezaan PRESS, PSS dan Kad Warga Asing kepada Pendatang Asing Tanpa Izin (PATI).

**JAWAPAN**

Tuan Yang Di Pertua,

Untuk makluman Ahli Yang Berhormat, cadangan pelaksanaan Pas Residen Sementara Sabah (PRESS) dan Pas Sementara Sabah (PSS) merupakan hasil keputusan daripada mesyuarat JKPWAS Induk pada tahun 2016 dan 2019. Pas Sementara Sabah (PSS) merupakan suatu jenis pas baharu yang pernah dicadangkan dengan elemen kawalan yang dipertingkatkan berbanding cadangan pelaksanaan PRESS sebelum itu. Cadangan pelaksanaan PSS pada masa itu adalah bagi tujuan pendataan pendatang dan orang asing di Sabah bagi memudahkan pemantauan dan operasi penguatkuasaan oleh pihak berkuasa. PSS telah dicadangkan dikeluarkan dalam bentuk kad yang mempunyai ciri-ciri keselamatan yang dipertingkatkan dan mempunyai nombor ID yang unik berbanding dengan dokumen sijil banci, kad burung-burung dan IMM13 sebagai mekanisme kawalan keberadaan dan pergerakan warga asing di Sabah. Cadangan PSS ini telah dibatalkan pada 22 Januari 2020 atas keputusan Kerajaan Negeri Sabah.

Cadangan pemberian Kad Warga Asing kepada warga asing yang bermastautin di Sabah telah dibincang semasa Mesyuarat Jawatankuasa Induk Pengurusan Warga Asing (JKPWAS-Induk) Bilangan 1 Tahun 2022 pada 10 Februari 2022. Antara lain, cadangan Kad Warga Asing ini bertujuan untuk pendataan warga asing di Sabah bagi memastikan pihak berkuasa dapat mengetahui dan mengenal pasti keberadaan golongan warga asing ini. Cadangan perwujudan Kad Warga Asing ini sedang diteliti oleh sebuah jawatankuasa kerja yang diterajui oleh Kerajaan Negeri Sabah.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' RAMLI BIN DATO' MOHD NOR  
(CAMERON HIGHLAND)**

**TARIKH : 2 MAC 2022 (RABU)**

**SOALAN**

**DATO' RAMLI BIN DATO' MOHD NOR (CAMERON HIGHLAND)** minta **MENTERI PEMBANGUNAN LUAR BANDAR** menyatakan adakah pihak Kementerian bercadang untuk menggunakan teknologi lain untuk menjana elektrik seperti solar ataupun hidro untuk seluruh perkampungan masyarakat Orang Asli di negara ini.

**JAWAPAN**

**Tuan Yang di-Pertua,**

Untuk makluman Yang Berhormat, sehingga kini terdapat 853 perkampungan Orang Asli (KOA) yang diiktiraf. Sehingga Disember 2021, terdapat 686 buah Kampung Orang Asli (KOA) yang sedang menggunakan bekalan elektrik jenis talian grid, 15 KOA lagi menggunakan bekalan elektrik jenis tenaga suria (solar). Manakala, masih terdapat 152 buah perkampungan Orang Asli di Malaysia yang masih tidak mempunyai bekalan elektrik. Perkampungan Orang Asli yang tidak mempunyai bekalan elektrik ini merupakan kampung yang terletak di kawasan pedalaman dan ekstrem yang menyebabkan kos penyediaan bekalan elektrik talian grid ke kampung tersebut tinggi.

Walau bagaimanapun, di bawah Rancangan Malaysia ke-12 (2021-2025) Kementerian melalui JAKOA akan meneruskan permohonan dan pelaksanaan projek bagi usaha menyediakan bekalan elektrik di perkampungan Orang Asli.

Kementerian juga turut mempertimbangkan pelbagai alternatif bagi menyelesaikan isu berkenaan, antaranya ialah penggunaan tenaga boleh diperbaharui seperti tenaga suria (solar) dan hidro mini. Pada ketika ini Kementerian telah bekerjasama dengan Jabatan Kerja Raya (JKR) untuk melaksanakan Projek Rintis Lampu Jalan Kampung Menggunakan Solar LED di KOA yang bersesuaian.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN HASSAN BIN ABDUL KARIM  
[ PASIR GUDANG ]**

**TARIKH : 2 MAC 2022 (RABU)**

**SOALAN**

**TUAN HASSAN BIN ABDUL KARIM [ PASIR GUDANG ]** minta **MENTERI KESIHATAN** menyatakan kemajuan pembinaan Hospital Pasir Gudang. Adakah Hospital Pasir Gudang itu nanti menyediakan kepakaran tertentu dalam bidang perubatan.

**JAWAPAN**

Tuan Yang di-Pertua,

1. Untuk makluman Ahli Yang Berhormat, Projek Hospital Pasir Gudang dengan kapasiti 304 katil telah diluluskan oleh Unit Perancang Ekonomi, Jabatan Perdana Menteri (UPE, JPM) di bawah *Rolling Plan 1* (RP1), Rancangan Malaysia Kesebelas (RMK-11) dengan kos keseluruhan sebanyak RM500 juta. Jabatan Kerja Raya Malaysia (JKR) adalah Agensi Pelaksana projek ini.
2. Projek Hospital Pasir Gudang kini dalam fasa pembinaan. Tempoh pelaksanaan projek adalah selama 48 bulan dari 15 September 2020 dan tarikh siap projek adalah pada 15 November 2024. Sehingga 31 Januari 2022, status kemajuan fizikal projek adalah mendahului jadual iaitu sebenar 20.04% berbanding jadual 12.35%.

3. Hospital Pasir Gudang telah dirancang untuk menjadi sebuah hospital pakar major setelah siap pembinaannya kelak. Bagi sebuah hospital berpakar major, sasaran kepakaran dan subkepakaran yang ditetapkan adalah sebanyak 20 iaitu:

- a. perubatan am;
- b. nefrologi;
- c. dermatologi;
- d. perubatan respiratori;
- e. penyakit berjangkit;
- f. pembedahan am;
- g. pediatrik;
- h. neonatologi;
- i. ortopedik;
- j. obstetrik dan ginekologi;
- k. perubatan maternal fetal;
- l. anestesiologi;
- m. perubatan kecemasan;
- n. radiologi;
- o. patologi;
- p. psikiatri;
- q. otolarinkologi;
- r. oftalmologi;
- s. pergigian (pediatrik); dan
- t. pembedahan oro-maksilo-fasial.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATO' HAJI MOHD FASIAH BIN HAJI MOHD  
FAKEH ( SABAK BERNAM )**

**TARIKH : 02 MAC 2022 (RABU)**

**SOALAN**

**DATO' HAJI MOHD FASIAH BIN HAJI MOHD FAKEH [ SABAK BERNAM ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan bilangan syarikat jualan langsung yang terdapat di negara ini dan bilangan rakyat yang terlibat dengan industri jualan langsung ini serta nyatakan langkah Kementerian untuk menarik minat dan menggalakkan lebih ramai rakyat negara ini untuk menceburkan diri di dalam industri jualan langsung ini.



**JAWAPAN**

**Tuan Yang di-Pertua,**

Untuk menjawab soalan YB Sabak Bernam, adalah dimaklumkan bahawa sehingga 31 Disember 2021, terdapat 396 syarikat jualan langsung yang mempunyai tempoh Lesen Jualan Langsung yang sah. Manakala, bilangan ahli/ pengedar Jualan Langsung aktif yang berdaftar dengan syarikat jualan Langsung adalah seramai 2,896,525 orang.

Sebelum ini, pendekatan Kementerian adalah tertumpu kepada aktiviti perlesenan perniagaan jualan langsung yang melibatkan juga penguatkuasaan sebagaimana di bawah AJLSAP1993. Kini, Kementerian telah mengorak langkah dalam membangunkan industri jualan langsung melalui advokasi dan perencanaan pembangunan industri jualan langsung. Di bawah inisiatif Bajet 2022, industri jualan langsung buat pertama kalinya diperuntukkan sebanyak RM3 juta, khusus bagi membangunkan produk jualan langsung dari penggunaan khazanah alam negara.

Selain itu, Kementerian akan mengadakan Hari Jualan Langsung pada tahun ini untuk mengetengahkan kepentingan industri jualan langsung sebagai salah satu sektor ekonomi yang amat berpotensi. Hari Jualan Langsung akan menjadi platform untuk memperluaskan pemahaman masyarakat mengenai perniagaan jualan langsung yang sah di Malaysia serta memberikan kesedaran mengenai potensi perniagaan jualan langsung sebagai sumber pendapatan individu, di samping menjana ekonomi negara.

Untuk makluman, industri jualan langsung telah mencatatkan nilai jualan sebanyak RM25.7 bilion pada tahun 2020. Malaysia kini berada pada kedudukan ke-7 di peringkat global dan tempat ke-4 di Asia Pasifik dari segi rekod Nilai jualan di dalam Laporan Jualan Peruncitan Jualan Langsung Global 2020 yang dikeluarkan oleh Persekutuan Persatuan Jualan Langsung Dunia atau *World Federation of Direct Selling Associations* (WFDSA).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : TUAN CHA KEE CHIN [ RASAH ]**

**TARIKH : 02 MAC 2022 (RABU)**

**SOALAN**

**TUAN CHA KEE CHIN [ RASAH ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan punca kepada kekurangan minyak masak jenis paket sekilogram di pasaran sejak beberapa bulan yang lepas dan kenapa tiada tindakan yang berkesan untuk mengatasi masalah ini. Apakah kekurangan ini berpunca daripada kelewatan bayaran subsidi kepada pembekal. Bilakah masalah kekurangan ini akan dapat diatasi.

**JAWAPAN**

Yang di-Pertua,

1. Kekurangan minyak masak paket jenis sekilogram ataupun minyak masak bersubsidi dalam pek polibeg 1kg di pasaran sejak beberapa bulan kebelakangan ini disebabkan oleh :

- a. Peningkatan permintaan terhadap minyak masak pek polibeg 1kg yang luar daripada kebiasaan berikutan peningkatan harga minyak masak dalam botol (tidak bersubsidi). Ini menyebabkan pengguna dan peniaga-peniaga kecil beralih daripada menggunakan minyak masak dalam botol kepada minyak masak dalam bentuk polibeg yang mana harga ditetapkan jauh lebih rendah RM2.50 bagi setiap kilogram.
- b. Terdapat kelewatan bayaran balik tuntutan subsidi kepada syarikat pembungkusan minyak masak yang juga turut menyumbang kepada kekurangan pengeluaran. Seperti mana yang sedia maklum, kenaikan harga komoditi sawit telah menyebabkan kementerian ini perlu membuat pengiraan semula peruntukan serta memohon tambahan peruntukan daripada Kementerian Kewangan. Namun demikian, bekalan kembali pulih setelah kementerian menerima peruntukan tambahan daripada Kementerian Kewangan dan semua bayaran tunggakan kepada pihak syarikat pembungkus telahpun dijelaskan sebaik sahaja Kementerian menerima peruntukan tersebut.

2. Bagi memastikan bekalan minyak masak pek polibeg 1kg ini mencukupi untuk semua rakyat Malaysia, Kementerian memohon kerjasama semua pihak untuk tidak menyalahgunakan bantuan subsidi ini. Dalam hubungan ini, Kementerian telah menetapkan supaya :

- a. Had pembelian minyak masak pek polibeg 1kg mengikut ketetapan, iaitu tidak melebihi 3 paket bagi setiap isi rumah.

Ini termasuklah pelaksanaan kawalan oleh peruncit-peruncit untuk tidak menjual melebihi had yang ditetapkan.

- b. Peniaga-peniaga khususnya peniaga di restoran perlu bertanggungjawab untuk tidak menyalahgunakan minyak masak paket bagi meningkatkan margin keuntungan makanan bermasak.
- c. Kerjasama semua pihak untuk melaporkan sekiranya ada penyalahgunaan barangan bersubsidi kepada Kementerian untuk diambil tindakan susulan. Dalam hal ini, semua pengeluar diminta untuk mencetak logo barang kawalan dan logo barang subsidi pada pek pembungkusan agar mudah dikenalpasti.

3. Kementerian juga akan meneruskan usaha untuk memastikan kekurangan dapat diatasi dengan :

- a. Memastikan agihan minyak masak pek polibeg 1kg mencukupi di negeri-negeri berdasarkan nisbah penduduk.
- b. Melaksanakan pemeriksaan, pemantauan dan penguatkuasaan secara berterusan untuk memastikan cubaan penyeludupan oleh pihak yang tidak bertanggungjawab dapat dipatahkan dan dihukum.
- c. Meningkatkan kerjasama bersama orang awam untuk mendapatkan maklumat penyalahgunaan barang bersubsidi.
- d. Meneruskan Program Mekanisme Kawalan Harga Minyak Masak iaitu subsidi minyak masak dalam botol sehingga 31 Mac 2022, bagi memastikan rakyat masih mempunyai pilihan dalam mendapatkan minyak masak pada kadar yang berpatutan walaupun harga komoditi sawit telah melonjak tinggi.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI AHMAD JAZLAN BIN  
YAAKUB [ MACHANG ]**

**TARIKH : 2 MAC 2022 (RABU)**

**SOALAN**

**DATUK HAJI AHMAD JAZLAN BIN YAAKUB [ MACHANG ]** minta **MENTERI KESIHATAN** menyatakan apakah saluran yang disediakan Kementerian bagi memproses sebarang aduan mengenai kesan sampingan yang diterima rakyat selepas dos penggalak. Apakah jenis pampasan yang disediakan kepada penerima kesan sampingan khususnya yang meninggal dunia dan sejauh mana urusan tuntutan pampasan tersebut dipermudahkan untuk rakyat. Nyatakan juga sehingga kini berapa banyak tuntutan pampasan yang telah diluluskan.

**JAWAPAN**

Tuan Yang di-Pertua,

1. Penerima vaksin yang mengalami Kesan Advers Susulan Imunisasi (AEFI) sama ada selepas menerima dos primer atau dos penggalak, boleh melaporkannya melalui beberapa saluran yang telah disediakan oleh Kementerian Kesihatan Malaysia (KKM) iaitu:

- (i) Notifikasi melalui aplikasi MySejahtera; boleh dibuat bagi kesan advers ringan yang telah disenaraikan dalam aplikasi tersebut.
- (ii) Laporan secara dalam talian dengan mengisi borang pelaporan untuk pengguna, iaitu *Consumer Side Effect Reporting Form*

(ConSERF) di laman sesawang NPRA ([www.npra.gov.my](http://www.npra.gov.my)) [*Consumers > Reporting Side Effects to Medicines (ConSERF) or Vaccines (AEFI)*]. Borang ini tersedia dalam Bahasa Melayu dan Bahasa Inggeris. Borang ini juga boleh dicetak untuk diisi, dan dihantar melalui e-mel atau pos ke NPRA.

- (iii) Bagi penerima vaksin yang mengalami AEFI serius dan mendapatkan rawatan di fasiliti kesihatan, laporan akan dibuat oleh kakitangan kesihatan yang merawat, melalui Sistem Pelaporan NPRA secara atas talian, menggunakan *Pharmacy Information System* (PhIS) bagi fasiliti KKM atau menggunakan borang pelaporan yang diisi secara manual dan diemel atau diposkan kepada NPRA.

2. Warganegara Malaysia yang menerima vaksin COVID-19 di bawah Program Imunisasi COVID-19 Kebangsaan (PICK) dan mendapat kesan sampingan yang serius selepas menerima vaksin COVID-19 layak memohon Bantuan Khas Kewangan Kesan Mudarat Vaksin COVID-19 oleh Kerajaan. Borang permohonan dan kaedah memohon boleh dimuat turun daripada laman sesawang <https://covid-19.moh.gov.my/garis-panduan/garis-panduan-kewangan-kkm>.

3. Bantuan Khas Kewangan Kesan Mudarat Vaksin COVID-19 ini akan dipertimbangkan berdasarkan kriteria yang perlu dipenuhi iaitu:
- a. *Adverse Events Following Immunisation* (AEFI) berlaku dalam tempoh tiga (3) bulan daripada tarikh menerima vaksin;
  - b. AEFI mesti dikategorikan sebagai serius berdasarkan laporan penilaian oleh Jawatankuasa Farmakovigilans Khas Vaksin COVID-19 (JFK);
  - c. bagi kes kematian, laporan bedah siasat hendaklah disertakan; dan
  - d. permohonan hanya dipertimbangkan sekiranya dihantar dalam tempoh satu (1) tahun dari tarikh berlaku AEFI. Bukti dan rekod dokumen berkaitan hendaklah dikemukakan.

4. Amaun Bantuan Khas Kewangan Kesan Mudarat Vaksin COVID-19 yang telah ditetapkan adalah tidak melebihi RM50,000 jika berlaku kesan advers yang serius kepada penerima vaksin COVID-19 yang memerlukan rawatan berpanjangan di hospital dan tidak melebihi RM500,000 jika berlaku hilang upaya kekal atau kematian disebabkan vaksin COVID-19. Amaun bantuan sebenar kepada individu yang terkesan oleh AEFI akan ditentukan berdasarkan perakuan oleh Jawatankuasa Teknikal Perubatan (JTP) dan diputuskan oleh Jawatankuasa Induk Bantuan Khas Kewangan Kesan Mudarat Vaksin COVID-19.
5. Sehingga 15 Februari 2022, sebanyak 187 permohonan bantuan khas kewangan kesan mudarat vaksin COVID-19 telah diterima oleh Kementerian Kesihatan.
6. Daripada jumlah tersebut, sebanyak 17 permohonan telah diluluskan oleh Jawatankuasa Induk dan dalam proses pembayaran melibatkan jumlah sebanyak RM195,000.
7. Sebanyak 147 permohonan masih dalam penilaian manakala 23 permohonan telah ditolak.
8. Daripada 147 permohonan tersebut, 86 permohonan dalam penilaian JFK manakala 61 permohonan dalam penilaian JTP.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN JUGAH ANAK MUYANG @ TAMBAT  
(LUBOK ANTU)**

**TARIKH : 2 MAC 2022 (RABU)**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **MENTERI DALAM NEGERI** menyatakan apakah inisiatif yang diambil oleh pihak Kementerian bagi mengatasi masalah segelintir penduduk terutama sekali dari kawasan luar bandar yang sehingga kini masih lagi tidak memiliki dokumen pengenalan yang sah (kad pengenalan).



**JAWAPAN**

Tuan Yang Di Pertua,

Kementerian Dalam Negeri (KDN) melalui Jabatan Pendaftaran Negara (JPN) sentiasa mengambil langkah proaktif dalam memastikan urusan pendaftaran dokumen pengenalan diri **individu yang berkecukupan** dapat dilaksanakan dengan mudah di seluruh negara termasuk di kawasan pedalaman dan luar bandar melalui inisiatif berterusan iaitu Program Menyemai Kasih Rakyat (MEKAR) yang merangkumi Program Pendaftaran Bergerak (Unit *Mobile*) dan Bas *Mobile*. Program MEKAR menyediakan pelbagai perkhidmatan termasuklah khidmat nasihat berkaitan pendaftaran Kad Pengenalan, Kelahiran dan Kematian.

Selain itu, JPN sentiasa mengkaji dari semasa ke semasa penambahbaikan yang boleh dilaksanakan bagi membantu memudahkan urusan pendaftaran dokumen pengenalan diri mengikut peraturan dan syarat-syarat yang telah ditetapkan. Berdasarkan rekod JPN pada **tahun 2021**, jumlah program MEKAR yang berjaya dilaksanakan di seluruh negara adalah sebanyak **780 program, 10,358 permohonan dan 1,404 khidmat nasihat** dalam pelbagai perkara telah diberikan bagi menyelesaikan masalah pendaftaran penduduk.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : PUAN NURUL IZZAH BINTI ANWAR  
[ PERMATANG PAUH ]**

**TARIKH : 02 MAC 2022 (RABU)**

**SOALAN**

**PUAN NURUL IZZAH BINTI ANWAR [ PERMATANG PAUH ]** minta MENTERI SUMBER MANUSIA menyatakan status terkini usaha Kementerian untuk mengawal selia syarikat e-hailing bagi memastikan dasar caruman PERKESO sebagai langkah melindungi keselamatan pekerja di sektor ekonomi gig terletak di bawah tanggungjawab syarikat.

**JAWAPAN**

**Tuan Yang di-Pertua,**

Seperti semua sedia maklum, Pertubuhan Keselamatan Sosial (PERKESO) pada masa kini mentadbir 3 buah Akta yang berkaitan dengan perlindungan keselamatan social, iaitu Akta Keselamatan Sosial Pekerja 1969 [*Akta 4*], Akta Keselamatan Sosial Pekerjaan Sendiri 2017 [*Akta 789*] dan Akta Sistem Insurans Pekerjaan 2017 [*Akta 800*]. Namun, buat masa ini pekerja gig hanya tertakluk di bawah Akta 789 sahaja kerana pekerja gig didefinisikan sebagai orang yang bekerja sendiri, tidak mempunyai hubungan *master and servant* sepertimana pekerja-pekerja formal yang lain.

Akta 789 menghendaki caruman sebelah pihak sahaja, iaitu orang yang bekerja sendiri yang dalam hal ini adalah pekerja gig. Untuk mengawal selia syarikat e-hailing supaya bertanggungjawab mencarumkan pekerja e-hailing di bawah Akta ini adalah tidak wajar kerana tidak diperuntukkan dalam Akta. Walau bagaimanapun, Kerajaan melalui Kementerian Sumber Manusia sentiasa mempromosikan kepentingan dan keperluan Akta 789 kepada penyedia-penyedia platform dan pekerja dalam sektor ekonomi gig.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATO' SRI BUNG MOKTAR BIN RADIN  
[ KINABATANGAN ]**

**TARIKH : 02 MAC 2022 (RABU)**

**SOALAN**

**DATUK SERI PANGLIMA BUNG MOKTAR BIN RADIN [ KINABATANGAN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah usaha yang dibuat oleh Kementerian bagi memastikan barangan keperluan harian seperti gula, minyak masak dan telur sentiasa mencukupi di pasaran dan harga sentiasa dipantau bagi mengelakkan pengguna daripada terbeban ekoran kenaikan harga yang tidak terkawal.

**JAWAPAN**

**Yang di-Pertua,**

Usaha-usaha yang dilakukan oleh Kementerian ini bagi memastikan barangan keperluan asas seperti gula, minyak masak, ayam dan telur sentiasa mencukupi di pasaran adalah seperti berikut:

- i. Menjalankan pemeriksaan harian ke premis-premis perniagaan runcit, borong dan juga pengilang bagi memantau tahap keberadaan (*availability*) dan kedudukan bekalan 10 jenis barangan asas di pasaran. Secara purata, dianggarkan 850 buah premis perniagaan diperiksa oleh anggota penguat kuasa di seluruh negara dan dilaporkan kepada Ibu pejabat setiap hari.

- ii. Mewujudkan pangkalan data perbekalan barangan keperluan asas melalui mekanisma kutipan data pengeluaran, pengedaran dan kedudukan bekalan daripada peniaga-peniaga terpilih. Hasil analisa data-data tersebut akan diterjemah dalam bentuk *trend* pengeluaran, pengedaran dan kedudukan bekalan bagi memantau situasi semasa bekalan barangan di pasaran.
- iii. Menjalankan pemantauan ke atas 20 syarikat pengeluar ayam pedaging utama yang merangkumi 3 syarikat *integrator* dan 17 syarikat *non-integrator*. Pemantauan ini dilakukan bagi mengesan lebih awal risiko-risiko gangguan bekalan ayam pedaging di peringkat pengeluaran supaya tindakan sewajarnya dapat diambil bagi memastikan bekalan ayam di pasaran sentiasa stabil.
- iv. Mengeluarkan arahan kepada syarikat-syarikat pengeluar gula untuk mewujudkan inventori stok penimbal (*stockpile*) bagi gula putih bertapis pada had 21,000 dan 32,000 metrik tan. Stok penimbal ini boleh digunakan untuk menampung bekalan di kawasan-kawasan yang mengalami kekurangan bekalan gula.
- v. Membuat kajian berhubung rantai perbekalan ayam, telur, bawang dan cili bagi mendalami ekosistem perbekalan komoditi tersebut dari peringkat penghasilan baka hingga kepada penggunaan rakyat Malaysia per kapita. Kajian ini bertujuan bagi mempelajari industri komoditi tersebut bagi membantu Kementerian mengesan lebih awal situasi kekurangan bekalan dan untuk mengambil langkah-langkah responsif dengan segera.
- vi. Sebagai Kementerian yang bertanggungjawab untuk memastikan bekalan gula, ayam, telur dan minyak masak kembali stabil, KPDNHEP akan terus mengadakan sesi libat urus bersama pemain industri dan agensi-agensi Kerajaan yang terlibat bagi mengenalpasti punca dan mencari kaedah penyelesaian yang adil dan kondusif bagi memastikan isu kekurangan bekalan barang-barang keperluan asas ketika ini dapat diatasi segera.

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK HAJI SHABUDIN BIN YAHAYA  
(TASEK GELUGOR)**

**TARIKH : 2 MAC 2022 (RABU)**

**SOALAN**

**DATUK HAJI SHABUDIN BIN YAHAYA (TASEK GELUGOR)** minta **MENTERI BELIA DAN SUKAN** menyatakan apakah tindakan yang diambil bagi mengelakkan krisis dalam persatuan sukan menjejaskan masa depan atlet serta mengelakkan mereka tawar hati untuk mewakili negara pada masa depan.

**JAWAPAN**

**Tan Sri Yang di-Pertua,**

Kementerian amat mengambil berat mengenai krisis dalaman badan sukan. Krisis ini boleh menjejaskan pembangunan sukan negara termasuklah penyertaan Malaysia di peringkat antarabangsa dan kemahiran serta kepakaran teknikal suatu sukan.

Antara isu-isu yang melibatkan badan sukan adalah:

- i. Penyingkiran badan induk kebangsaan sebagai ahli gabungan di peringkat antarabangsa;
- ii. Kehilangan kelayakan pemegang jawatan disebabkan oleh bankrap;
- iii. Perebutan kuasa dalam Jawatankuasa Tertinggi badan sukan;
- iv. Keengganan untuk menerima ahli gabungan seperti syarat pendaftaran; dan

v. Tafsiran perlembagaan yang berbeza.

Berdasarkan isu-isu ini, pertikaian yang berlaku dalam badan sukan berpunca daripada kepimpinan dalam mentadbir badan sukan, perlembagaan badan sukan yang tidak lagi relevan dan tidak jelas, tiada kesepakatan di kalangan ahli dan perebutan kuasa dalam pucuk pimpinan.

Setiap badan sukan mempunyai kaedah penyelesaian yang berbeza tertakluk kepada perlembagaan masing-masing memandangkan setiap badan sukan mempunyai obligasi terhadap badan induk masing-masing. Sebagai contoh, Persatuan Bolasepak Malaysia (FAM) adalah tertakluk kepada Peraturan-Peraturan di bawah Persekutuan Bolasepak Antarabangsa (FIFA) dan Persatuan Badminton Malaysia (BAM) tertakluk kepada Peraturan-Peraturan di bawah Persekutuan Badminton Dunia (BWF). Penglibatan pihak Kerajaan atau Kementerian dalam menangani isu badan sukan adalah terhad walaupun sering dirujuk oleh badan-badan sukan. Campur tangan Kerajaan secara langsung dalam tadbir urus badan sukan boleh menyebabkan suatu badan sukan itu dikenakan tindakan oleh badan sukan antarabangsa.

Akta 576 memperuntukkan kuasa Pesuruhjaya Sukan dalam urusan berkaitan pendaftaran dan penyeliaan badan sukan terutamanya dalam memastikan setiap badan sukan mematuhi perlembagaan masing-masing. Pesuruhjaya Sukan boleh mengambil tindakan menggantung atau membatalkan pendaftaran badan sukan ke atas mana-mana badan sukan yang gagal untuk mematuhi perlembagaan badan sukan itu dengan menggunakan kuasanya di bawah peruntukan Akta 576.

Seksyen 25 (1) Akta 576 memperuntukkan mana-mana badan sukan apabila telah dibatalkan atau digantung, tidak boleh menganjurkan atau menjalankan apa-apa aktiviti, tidak boleh menerima bantuan kewangan dari Kerajaan, tidak boleh mewakili Malaysia bagi mana-mana sukan di Malaysia dan badan sukan tidak boleh menghantar peserta ke mana-mana pertandingan sama ada di dalam atau luar Malaysia.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : YB TUAN CHANG LIH KANG  
(TANJONG MALIM)**

**TARIKH : 2 MAC 2022 (RABU)**

**SOALAN**

**TUAN CHANG LIH KANG (TANJONG MALIM)** minta **MENTERI PERUMAHAN DAN KERAJAAN TEMPATAN** menyatakan jumlah unit rumah transit yang telah dibina oleh Kementerian sejak tahun 2020. Adakah sasaran Kementerian tercapai.



**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sedang dalam perancangan untuk membina tiga (3) projek Rumah Transit Belia (RTB) di Wilayah Persekutuan Kuala Lumpur dan Selangor. Dua (2) RTB yang dirancang di Wilayah Persekutuan Kuala Lumpur ialah RTB Mukim Batu yang melibatkan pembinaan 1,048 unit rumah manakala RTB Mukim Batu, Petaling melibatkan pembinaan 400 unit rumah. Perancangan pembinaan RTB di negeri Selangor pula melibatkan pembinaan 3,000 unit rumah di Mukim Rawang.

Inisiatif RTB ini diharap dapat membantu golongan muda untuk mendiami rumah tersebut bagi suatu tempoh yang dirasakan cukup sehingga mereka dapat mengukuhkan kedudukan kewangan dan seterusnya memiliki kediaman sendiri. Keutamaan pengisian akan diberikan kepada golongan belia yang berumur 30 tahun dan ke bawah. Sekiranya masih terdapat kekosongan, permohonan akan juga diperluaskan kepada yang berumur 30 tahun ke atas.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN NIK MOHAMAD ABDUH  
BIN NIK ABDUL AZIZ [ BACHOK ]**

**TARIKH : 2 MAC 2022 (RABU)**

**SOALAN**

**TUAN NIK MOHAMAD ABDUH BIN NIK ABDUL AZIZ [ BACHOK ]** minta **MENTERI KESIHATAN** menyatakan langkah-langkah keberkesanan dan keselamatan pemberian vaksin kepada kanak-kanak 5 hingga 11 tahun untuk melindungi golongan ini daripada COVID-19.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) melalui Bahagian Regulatori Farmasi Negara (NPRA) telah menganalisa data-data keselamatan dan keberkesanan penggunaan vaksin COVID-19 kepada kanak-kanak 5 hingga 11 tahun. Vaksin COVID-19 ini telah menjalani kajian klinikal yang sangat ketat dan teliti bagi memastikan kualiti, keselamatan, serta keberkesanan vaksin tersebut.
2. Sehingga 1 Mac 2022, Pihak Berkuasa Kawalan Dadah (PBKD) bersetuju untuk memberikan kelulusan bersyarat kepada Vaksin Comirnaty 10mcg *Concentrate for Dispersion* (Pfizer-BioNTech) pada 6 Januari 2022 untuk kegunaan kanak-kanak berusia 5 hingga 11 tahun. Hasil dapatan kajian klinikal vaksin Comirnaty menunjukkan keberkesanan sebanyak 90.7% serta berupaya untuk meningkatkan tindak balas imun yang tinggi terhadap penyakit COVID-19.

3. Vaksin Comirnaty formulasi khas kanak-kanak telah digunakan di beberapa negara termasuklah Amerika Syarikat, Kanada, Australia dan Singapura. *Real World Data* melaporkan insiden miokarditis atau radang otot jantung setelah pengambilan vaksin mRNA adalah sangat rendah. Sebagai contoh, Amerika Syarikat telah melaksanakan pemberian vaksin ini hampir 8.7 juta dos menggunakan formulasi khas kanak-kanak dan data awal *Adverse Event Following Immunization* (AEFI), telah mendapati insiden AEFI adalah jauh lebih rendah berbanding insiden AEFI dikalangan remaja berumur 12 hingga 17 tahun.

Tuan Yang di-Pertua,

4. Melihat kepada keperluan untuk memastikan keselamatan kepada kanak-kanak yang akan menerima vaksin COVID-19 ini, KKM akan sentiasa memantau perkembangan terkini terutamanya pola AEFI tersebut di peringkat global.

5. Walau bagaimanapun, KKM ingin menegaskan bahawa manfaat penerimaan vaksin adalah jauh mengatasi kesan negatifnya. Sehubungan itu, KKM menyeru kepada semua ibu bapa untuk mendaftarkan anak-anak yang layak menerima vaksin COVID-19 dengan segera.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATO' SRI HASAN BIN ARIFIN [ ROMPIN ]**

**TARIKH : 02 MAC 2022 (RABU)**

**SOALAN**

**DATO' SRI HASAN BIN ARIFIN [ ROMPIN ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan dijangkakan kadar inflasi akan meningkat. Apakah langkah-langkah Kementerian untuk mengatasi masalah inflasi supaya ia tidak membebankan rakyat.

**JAWAPAN**

Secara umumnya, inflasi merupakan satu **kenaikan harga** yang berlaku bagi barangan dan perkhidmatan dalam satu tempoh masa tertentu. Kadar inflasi diukur melalui pengiraan **Indeks Harga Pengguna (IHP)** sebagai medium pengukuran bagi perubahan harga bakul tetap barangan dan perkhidmatan dalam satu tempoh masa.

Walau bagaimanapun, tanggapan rakyat apabila kadar inflasi menunjukkan peningkatan secara keseluruhannya, ada yang membuat kesimpulan secara umum bahawa harga bagi semua barangan dan perkhidmatan telah naik sehingga rakyat merasakan harga bagi semua barangan semakin mahal. Tanggapan ini adalah tidak benar sama sekali.

Nilai inflasi terdapat di setiap item sama ada barangan mahupun perkhidmatan di mana setiap item masing-masing mempunyai nilai inflasi yang berbeza. Ada item yang nilai inflasinya tinggi dan ada item yang nilainya rendah. Jika kita meneliti nilai inflasi setiap item barangan dan perkhidmatan ini, kita dapati bukan semua item mencatatkan peningkatan harga. Pengguna juga tidak membeli kesemua item-item di dalam bakul

tetap barangan dan perkhidmatan ini, sebaliknya membeli mengikut keperluan individu.

Namun, tidak dinafikan kenaikan kadar inflasi ketika ini sedikit sebanyak membebankan rakyat dari segi kenaikan harga barang makanan. Oleh itu, sebagai Kerajaan yang prihatin, Kementerian telah mengambil inisiatif dengan melaksanakan perkara-perkara berikut:

- i) Pelaksanaan **Program Jualan Keluarga Malaysia (PJKM)** di 222 kawasan Parlimen. PJKM dianjurkan setiap minggu secara serentak di lokasi yang berdekatan dengan golongan sasaran B40 dan M40 bagi membantu golongan berkenaan mendapatkan barangan keperluan harian seperti ayam, ikan, telur, sayur-sayuran, minyak masak, gula, tepung, beras serta barangan proses dengan harga sehingga 20 peratus lebih murah daripada harga pasaran setempat;
- ii) Melaksanakan **Skim Harga Maksimum Musim Perayaan (SHMMP)** dan juga **Skim Harga Maksimum Keluarga Malaysia (SHMKM)** bagi membantu rakyat mendapatkan barang keperluan pada paras harga yang berpatutan dan munasabah, terutamanya semasa permintaan tinggi barang-barang tertentu pada musim-musim perayaan utama; dan
- iii) Pelaksanaan **Program Penyeragaman Harga**. Ini bagi membolehkan penduduk di luar bandar dan pedalaman membeli barang keperluan asas seperti beras, gula, tepung gandum, minyak masak, LPG dan Community Drumming (petrol dan diesel) pada harga yang ditetapkan atau dikawal oleh Kerajaan seperti mana di bandar.

Selain program-program ini, Kementerian juga sentiasa mempergiatkan aktiviti-aktiviti penguatkuasaan di bawah **Akta Kawalan Harga dan Antipencatutan 2011** yang bertujuan mengawal peniaga daripada mengambil keuntungan yang tidak munasabah dan secara tidak langsung barangan dapat dijual pada harga berpatutan oleh peniaga dan menguatkuasakan **Perintah Kawalan Harga (Penandaan Harga oleh Penjual Runcit) 1993** dengan mewajibkan peniaga meletak tanda harga bagi membantu rakyat membuat perbandingan harga dan akhirnya membuat pilihan harga yang lebih murah serta berpatutan.

Pengguna juga perlu memainkan peranan untuk mengurangkan kesan kenaikan harga barang dengan mengamalkan perbelanjaan harian secara bijak dan berhemah dengan mengamalkan langkah-langkah seperti berikut:

- Merancang perbelanjaan dengan baik dengan membuat perancangan sebelum pergi membeli-belah;
- Menukar kecenderungan atau *preference* dalam keadaan wujud item pengganti bagi item yang menunjukkan peningkatan harga diluar kemampuan pengguna;
- Sentiasa membuat perbandingan harga untuk memastikan pengguna memilih harga yang berpatutan;
- Pengguna juga boleh membuat perbandingan harga menerusi aplikasi Price Catcher supaya dapat membantu pengguna membuat keputusan pembelian yang bijak;
- Membeli barangan dalam kuantiti yang sewajarnya; dan
- Tidak membuat *panic buying* atau berbelanja dalam kuantiti yang melebihi keperluan sebenar yang akan menyebabkan harga melonjak naik.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN MASIR ANAK KUJAT [ SRI AMAN ]**

**TARIKH : 2 MAC 2022 (RABU)**

**SOALAN**

**DATO' MASIR KUJAT [ SRI AMAN ]** minta **MENTERI DALAM NEGERI** menyatakan bilakah perakuan status Bumiputera diberikan kepada anak-anak hasil dari perkahwinan campuran di antara salah seorang adalah kaum pribumi (native).

**JAWAPAN**

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) melalui Jabatan Pendaftaran Negara (JPN) hanya berperanan untuk mendaftarkan maklumat individu seperti keturunan. **Penentuan atau pemberian taraf Bumiputera Sarawak/Anak Negeri Sabah adalah di luar bidang kuasa JPN.** Dalam hal ini, perkara berhubung pemberian taraf bumiputera kepada kaum pribumi (*native*) adalah di bawah bidang kuasa Kerajaan Negeri Sabah dan Sarawak seperti di Perkara 13 di Senarai IIA Jadual 9, Perlembagaan Persekutuan.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATUK ROBERT LAWSON CHUAT  
[ BETONG ]**

**TARIKH : 02 MAC 2022 (RABU)**

**SOALAN**

**DATUK ROBERT LAWSON CHUAT [ BETONG ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan adakah Kementerian berhasrat untuk menyemak Dasar Pengguna Negara.

**JAWAPAN**

**Yang di-Pertua,**

1. Untuk makluman Yang Berhormat, Kementerian Perdagangan Dalam Negeri dan Hal Ehwal Pengguna (KPDNHEP) sedang menjalankan Kajian Semakan Semula Dasar Pengguna Negara (DPN) untuk menambah baik DPN sedia ada. Kajian tersebut dilaksanakan oleh perunding dengan menggunakan peruntukan pembangunan dan dijangka siap pada penghujung tahun 2022.

Sekian, terima kasih.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI PANGLIMA HAJAH AZIZAH  
BINTI DATUK SERI PANGLIMA HAJI  
MOHD DUN (BEAUFORT)**

**TARIKH JAWAB : 2 MAC 2022 (RABU)**

**SOALAN**

**DATUK SERI PANGLIMA HAJAH AZIZAH BINTI DATUK SERI  
PANGLIMA HAJI MOHD DUN (BEAUFORT) minta  
MENTERI PERUMAHAN DAN KERAJAAN TEMPATAN menyatakan  
setakat ini berapa jumlah kes penempatan setinggian di Sabah.**

**JAWAPAN**

**Tuan Yang di-Pertua,**

Saya mengucapkan terima kasih kepada Ahli Yang Berhormat kerana prihatin akan persoalan penempatan setinggan di Sabah. Kementerian Perumahan dan Kerajaan Tempatan (KPKT) sememangnya bertanggungjawab menyediakan perumahan yang berkualiti, kondusif serta berdaya huni (*livable*) kepada pelbagai kumpulan sasar terutamanya golongan berpendapatan rendah termasuk penduduk setinggan.

Untuk makluman Ahli Yang Berhormat, berdasarkan maklumat dari Kementerian Kerajaan Tempatan & Perumahan, Sabah jumlah penempatan setinggan di negeri Sabah adalah sebanyak 22,170 unit rumah. Perincian bagi setiap daerah adalah seperti berikut:

<b>Bil.</b>	<b>Pihak Berkuasa Tempatan (PBT)</b>	<b>Penempatan Koloni</b>	<b>Bilangan Unit Rumah</b>
1.	Majlis Perbandaran Sandakan	38	6,219
2.	Majlis Perbandaran Tawau	25	4,036
3.	Majlis Daerah Semporna	18	4,212
4.	Majlis Daerah Lahad Datu	15	3,772
5.	Majlis Daerah Keningau	9	481
6.	Majlis Daerah Beaufort	8	177
7.	Majlis Daerah Putatan	6	525
8.	Majlis Daerah Telupid	6	68

**SOALAN NO : 54**

<b>Bil.</b>	<b>Pihak Berkuasa Tempatan (PBT)</b>	<b>Penempatan Koloni</b>	<b>Bilangan Unit Rumah</b>
9.	Majlis Daerah Pitas	5	473
10.	Lembaga Bandaran Kudat	4	550
11.	Majlis Daerah Beluran	4	403
12.	Majlis Daerah Papar	7	217
13.	Majlis Daerah Kunak	3	475
14.	Majlis Daerah Tenom	3	47
15.	Majlis Daerah Nabawan	3	48
16.	Majlis Daerah Sipitang	3	60
17.	Majlis Daerah Kinabatangan	2	101
18.	Majlis Daerah Tongod	2	40
19.	Majlis Daerah Tambunan	2	2
20.	Majlis Daerah Kota Marudu	1	9
21.	Majlis Daerah Penampang	1	255
22.	Majlis Daerah Kota Belud	0	0
23.	Majlis Daerah Kuala Penyu	0	0
24.	Majlis Daerah Ranau	0	0
25.	Majlis Daerah Tuaran	0	0
	<b>Jumlah Keseluruhan</b>	<b>165</b>	<b>22,170</b>

## **SOALAN NO : 54**

KPKT sentiasa komited dalam memastikan semua rakyat mempunyai rumah untuk didiami samada disewa atau dimiliki selaras dengan slogan yang telah diucapkan oleh YAB Perdana Menteri semasa Mesyuarat Perumahan Mampu Milik Negara (MPMMN) Bilangan 1/2022 iaitu “1 Keluarga 1 Rumah”. Bagi golongan B40 dan juga setingan, KPKT menyediakan Program Perumahan Rakyat (PPR) dan Rumah Mesra Rakyat (RMR). Sehingga 31 Januari 2022, sebanyak 38 projek PPR merangkumi 26,099 unit telah siap dibina dan sebanyak 1,293 unit RMR telah siap dibina di Sabah.

KPKT sentiasa terbuka untuk bekerjasama dengan Kerajaan Negeri bagi mengenal pasti tapak lokasi yang sesuai untuk dibangunkan program perumahan mampu milik khususnya untuk golongan B40 dan M40. Bagi PPR, lokasi sesuai yang telah dikenal pasti akan dikemukakan untuk pertimbangan Unit Perancangan Ekonomi (EPU) dan Kementerian Kewangan (MOF).

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN LIM LIP ENG [ KEPONG ]**

**TARIKH : 2 MAC 2022 (RABU)**

**SOALAN**

**TUAN LIM LIP ENG [ KEPONG ]** minta **MENTERI KESIHATAN** menyatakan bilangan bekalan vaksin COVID-19, jarum dan picagari yang berkaitan yang telah dibeli oleh Kerajaan mengikut jenis jenama vaksin dan kosnya sejak tahun 2020. Berapa jumlah dos vaksin mengikut jenis vaksin yang perlu dilupuskan dan sebab-sebab pelupusan ini.

**JAWAPAN**

Tuan Yang di-Pertua,

1. Sehingga 18 Februari 2022 itu, KKM telah menempah sebanyak **88.1 juta dos** vaksin dengan anggaran kos berjumlah **RM4.72 bilion** untuk kegunaan populasi dewasa, remaja dan kanak-kanak.

2. Perincian perolehan vaksin COVID-19 adalah seperti berikut:

BIL.	PENGELUAR	BIL. DOS	LIPUTAN POPULASI
1.	<b>COVAX Facility</b> AstraZeneca	<b>6.4 juta</b> (2 dos/seorang)	<b>10%</b> (3.2 juta penduduk)
2.	<b>Pfizer &amp; BioNTech</b> (BNT162b2) - Dewasa & Remaja	<b>44.8 juta</b> (2 dos/seorang)	<b>70%</b> (22.4 juta penduduk)
3.	<b>Pfizer &amp; BioNTech</b> (BNT162b2) - Paediatrik	<b>6.6 juta</b> (2 dos/seorang)	<b>10.31%</b> (3.3 juta kanak-kanak)
4.	<b>AstraZeneca /</b> University of Oxford (AZD1222)	<b>6.4 juta</b> (2 dos/seorang)	<b>10%</b> (3.2 juta penduduk)
5.	<b>Sinovac Biotech</b> Ltd./Pharmaniaga Lifescience Sdn. Bhd. (CoronaVac)	<b>20.4 juta</b> (2 dos/seorang)	<b>31.88%</b> (10.2 juta penduduk)
6.	<b>CanSino Biologics Inc.</b> (AD5-nCOV)	<b>3.5 juta</b> (1 dos/seorang)	<b>10.94%</b> (3.5 juta penduduk)

BIL.	PENGELUAR	BIL. DOS	LIPUTAN POPULASI
	<b>JUMLAH</b>	<b>88.1 juta dos</b>	<b>143.13 % (46.03 juta penduduk dewasa, remaja &amp; kanak-kanak)</b>

3. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam Prosiding Jawatankuasa Kira-Kira Wang Negara (PAC), Mesyuarat Khas Parlimen Keempat Belas yang diadakan pada 2 Ogos 2021.

4. Perolehan pembekalan item *Low Dead Volume (LDV) syringe* dan jarum telah dilaksanakan bagi tujuan administrasi vaksin COVID-19 dengan jumlah kuantiti sebanyak 89,089,900 unit dan kos berjumlah RM36.83 juta. Dalam masa yang sama, KKM juga turut menerima sumbangan LDV Syringe dan jarum sebanyak 2.7 juta unit bernilai RM891,000.00.

5. Sejak Program Imunisasi Kebangsaan (PICK) bermula pada bulan Februari 2021, KKM telah menerima empat (4) jenis vaksin COVID-19. Proses penerimaan dan pengagihan vaksin COVID-19 di bawah PICK telah dipantau secara berterusan bagi memastikan pengendalian dan penggunaan vaksin adalah pada tahap yang optimum.

6. Untuk tujuan tersebut, Garis Panduan Pengurusan Produk Vaksin COVID-19 di Fasiliti Kesihatan telah dikeluarkan dan dikemaskini dari semasa ke semasa bagi memastikan pengurusan vaksin dilaksanakan mengikut peruntukan undang-undang, polisi dan garis panduan yang berkuat kuasa. Garis Panduan ini telah menetapkan keperluan Pusat Simpanan Vaksin (PSV) dan Pusat Pemberian Vaksin (PPV) untuk

melaporkan sebarang insiden melibatkan pengurusan produk yang telah atau berpotensi menjadi pembaziran atau sebaliknya.

7. KKM dari semasa ke semasa sentiasa memantau dan menyemak secara terperinci jumlah kerugian disebabkan bekalan vaksin yang rosak serta puncanya. Antara punca pembaziran vaksin COVID-19 di Pusat Pemberian Vaksin dan Pusat Simpanan Vaksin adalah disebabkan oleh penyimpangan suhu yang berlaku dimana aspek kualiti, keselamatan dan keberkesanan vaksin COVID-19 telah terjejas.

8. Maklumat dan data kerugian perlu diteliti secara terperinci untuk memastikan ia adalah betul dan tepat sebelum dimaklumkan kepada umum. Pada masa ini, KKM sedang menjalankan proses kompilasi serta verifikasi maklumat pelupusan vaksin, dan proses ini dilaksanakan secara berterusan sehingga PICK selesai.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN RAMKARPAL SINGH  
A/L KARPAL SINGH [ BUKIT GELUGOR ]**

**TARIKH : 2 MAC 2022 (RABU)**

**SOALAN**

**TUAN RAMKARPAL SINGH A/L KARPAL SINGH [BUKIT GELUGOR]** minta **MENTERI KESIHATAN** menyatakan langkah-langkah proaktif yang diambil oleh Kerajaan bagi membendung penularan COVID-19 yang semakin meningkat baru-baru ini dan sama ada Kerajaan bercadang untuk mewajibkan suntikan penggalak (*booster shot*) ke atas rakyat Malaysia pada masa akan datang bagi membendung penularan virus tersebut.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) telah menjangkakan peningkatan kes COVID-19 susulan kes Omicron pertama yang dikesan di Malaysia sejak 3 Disember 2021. Situasi ini bukan sahaja berlaku di Malaysia, malah kebanyakan negara di seluruh dunia juga menghadapi peningkatan kes mendadak disebabkan varian Omicron. Menyedari situasi peningkatan kes mendadak yang sama juga berlaku di Malaysia, KKM telah mempersiapkan beberapa langkah proaktif sebagaimana berikut:

- (i) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambahbaik pengurusan COVID-19 melalui pendekatan *FTTIS (Find, Test,*

*Trace, Isolate and Support*) yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera dikemaskini dalam MySejahtera pengguna. Kes positif dan kontak rapat akan diberikan Perintah Pengawasan dan Pemerhatian (*Home Surveillance Order*, HSO) dan juga Pelepasan Perintah Pengawasan dan Pemerhatian (*Release Order*, RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);

- (ii) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut:
- Mengenalpasti pesakit yang memenuhi kriteria untuk dipantau di rumah;
  - Menilai dan memantau perkembangan pesakit sepanjang tempoh pengasingan;
  - Mengenalpasti dan menyelaras pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital;
  - Menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.
- (iii) Memastikan sistem kesihatan di Malaysia tidak lumpuh dengan peningkatan kes secara mendadak, KKM telah mengadakan usahasama dengan fasiliti kesihatan swasta dalam pengurusan kes COVID-19. Hospital-hospital swasta telah bekerjasama

## SOALAN NO : 56

dalam menyediakan katil bagi merawat kes COVID-19. Pengamal-pengamal perubatan swasta juga dilibatkan dalam pemantauan kes-kes positif yang diasingkan di rumah;

- (iv) Membangunkan *COVID-19 Clinical Care Pathway* bagi tujuan memulakan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk. Rawatan antiviral ini akan meliputi pesakit di Klinik Kesihatan, CAC, PKRC dan juga hospital bagi pesakit yang dimasukkan ke wad. Rawatan akan dimulakan setelah bekalan ubat antiviral tersebut tersedia di Malaysia;
- (v) Mengaktifkan semula *National COVID-19 Rapid Response Task Force* (RRTF 2.0) bermula 7 Februari 2022 susulan peningkatan kes COVID-19 melebihi 10,000 kes sehari. Pasukan RRTF 2.0 ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19. Antara objektif utama penubuhan pasukan RRTF 2.0 adalah bagi:
- Menyelamatkan nyawa dengan memastikan akses ke Pusat Kuarantin dan Rawatan COVID-19 Berisiko Rendah (PKRC) dan hospital terjamin serta melakukan pemantauan kes positif COVID-19 melalui Pusat Penilaian COVID-19 secara maya (VCAC);
  - Memastikan akses kecemasan dan darurat tersedia apabila diperlukan, seperti menyediakan jumlah ambulans yang mencukupi dan tepat waktu melalui sistem pengurusan berpusat;
  - Memastikan kebajikan individu yang terkesan dengan jangkitan COVID-19 tidak terabai termasuk anak-anak kepada kes positif selain menitikberatkan kesihatan mental mereka; dan
  - Memastikan pengendalian dan penyampaian komunikasi

strategik yang berkesan bagi mengurangkan serta meredakan kegusaran dalam kalangan masyarakat umum.

Tuan Yang di-Pertua,

2. Salah satu cara penting bagi pencegahan dan kawalan penyakit berjangkit adalah dengan pemberian vaksin COVID-19 kepada semua individu yang layak. Selain dari ianya dapat mengurangkan penularan jangkitan, vaksin ini juga berkesan bagi mengurangkan risiko jangkitan serius dan kematian.

3. Bermula 24 Februari 2021, kerajaan telah memulakan pemberian vaksin *primary series* kepada individu yang layak dan kemudian diikuti dengan pemberian dos penggalak pada 13 Oktober 2021.

4. Semua individu yang layak adalah amat digalakkan untuk mengambil vaksin dos penggalak ini bagi mengurangkan jangkitan, jangkitan serius dan kematian. Buat masa ini **kerajaan tidak bercadang** untuk mewajibkan pengambilan dos penggalak ini kepada rakyat Malaysia yang layak. Walaupun begitu, bagi memastikan tahap perlindungan yang optimum, Kementerian Kesihatan telah membuat ketetapan agar semua penerima vaksin *primary series* dari jenis CoronaVac keluar Sinovac serta warga emas yang menerima mana-mana jenis vaksin *primary series* untuk mendapatkan dos penggalak bagi mengekalkan status vaksinasi lengkap mereka sebelum 31 Mac 2022.

5. Sehingga 1 Mac 2022, seramai 14,736,569 individu telah menerima vaksin dos penggalak bersamaa 62.6% dari jumlah penerima dos lengkap dalam kalangan dewasa berumur 18 tahun dan ke atas.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : DATUK SRI RICHARD RIOT ANAK JAEM  
[SERIAN]**

**TARIKH : 2 MAC 2022 (RABU)**

**SOALAN**

**DATUK SRI RICHARD RIOT ANAK JAEM [SERIAN]** minta **MENTERI KESIHATAN** menyatakan bilakah Kementerian akan menaik taraf Klinik Kesihatan Tebakang, Bunan Gega dan Tebedu.

**JAWAPAN**

Tuan Yang di-Pertua,

1. Klinik Kesihatan (KK) Tebakang, Bunan Gega dan Tebedu merupakan klinik kesihatan jenis 6 dengan fasiliti jenis kayu dan konkrit. Ketiga-tiga buah KK ini terletak di dalam Bahagian Serian dengan jarak antara 18 hingga 38 km dari pusat bandar.

2. Untuk makluman, terdapat beberapa projek naik taraf telahpun dijalankan di ketiga-tiga KK tersebut seperti berikut;

(i) KK Tebakang

Naik taraf jalan tidak berturap ke jalan berturap dalam kawasannya pada tahun 2019.

(ii) KK Bunan Gega

Naik taraf unit kecemasan dan pembinaan bangunan makmal pada tahun 2018 serta naik taraf jabatan pesakit luar dan unit farmasi pada tahun 2019.

(iii) Klinik Kesihatan Tebedu

Naik taraf pendawaian elektrik dan pembinaan unit farmasi yang baharu pada 2021.

3. Dengan adanya projek-projek penambahbaikan ini, kualiti perkhidmatan dapat ditingkatkan sekali gus membolehkan perkhidmatan lawatan kepakaran dapat diperluaskan dalam Bahagian Serian.

4. KKM akan terus memantau dari semasa ke semasa sekiranya terdapat keperluan-keperluan lain untuk meningkatkan mutu perkhidmatan kesihatan di Sarawak khasnya dan seluruh Malaysia umumnya.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN SU KEONG SIONG [ KAMPAR ]**

**TARIKH : 2 MAC 2022 (RABU)**

**SOALAN**

**TUAN SU KEONG SIONG [ KAMPAR ]** minta **MENTERI KESIHATAN** menyatakan rancangan Kementerian menangani gelombang Omicron ini dan berapa peratusan penduduk Perak yang telah mendapat dos penggalak.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) telah menjangkakan peningkatan kes COVID-19 susulan kes Omicron pertama yang dikesan di Malaysia sejak 2 Disember 2021. Situasi ini bukan sahaja berlaku di Malaysia, malah negara-negara lain juga menghadapi peningkatan kes mendadak disebabkan varian Omicron. Menyedari situasi peningkatan kes mendadak yang sama juga berlaku di Malaysia, KKM telah mempersiapkan beberapa langkah proaktif:

- (i) Memperkukuhkan pengurusan COVID-19 melalui pendigitalan pengurusan kesihatan. Ia dilaksanakan dengan menambahbaik pengurusan COVID-19 melalui pendekatan *FTTIS (Find, Test, Trace, Isolate and Support)* yang diautomasikan. Antara lain melalui pendekatan ini, individu yang menjalani ujian pengesanan COVID-19 sendiri boleh melaporkan keputusan ujian mereka ke dalam aplikasi MySejahtera – selain melakukan ujian tersebut di fasiliti kesihatan. Keputusan ujian akan segera dikemaskini dalam MySejahtera pengguna. Kes positif dan kontak rapat akan diberikan Perintah Pengawasan dan Pemerhatian (*Home Surveillance Order*, HSO) dan juga Pelepasan Perintah Pengawasan dan Pemerhatian (*Release Order*, RO) secara digital dan tidak perlu hadir secara fizikal di Pejabat Kesihatan Daerah mahupun COVID-19 *Assessment Centre* (CAC);
- (ii) Memastikan semua CAC yang beroperasi secara fizikal (iaitu di Klinik Kesihatan dan di komuniti) mahupun secara maya bersedia untuk menerima kedatangan/ panggilan pesakit yang tinggi untuk membuat penilaian terhadap pesakit yang disahkan positif jangkitan COVID-19. Fungsi CAC meliputi perkara-perkara berikut:
  - Mengenalpasti pesakit yang memenuhi kriteria untuk dipantau di rumah;



- Menilai dan memantau perkembangan pesakit sepanjang tempoh pengasingan;
  - Mengenalpasti dan menyelaras pesakit yang perlu dirujuk Pusat Kuarantin dan Rawatan COVID-19 Berisiko Rendah (PKRC)/ hospital;
  - Menjalankan penilaian dan pelepasan (*release order*) kepada kes positif yang telah tamat tempoh pengasingan – bagi individu yang tidak menerima digital HSO.
- (iii) Memastikan sistem kesihatan di Malaysia tidak lumpuh dengan peningkatan kes secara mendadak, KKM telah mengadakan usahasama dengan fasiliti kesihatan swasta dalam pengurusan kes COVID-19. Hospital-hospital swasta telah bekerjasama dalam menyediakan katil bagi merawat kes COVID-19. Pengamal-pengamal perubatan swasta juga dilibatkan dalam pemantauan kes-kes positif yang diasingkan di rumah;
- (iv) Membangunkan *COVID-19 Clinical Care Pathway* bagi tujuan memulakan ubat antiviral terkini yang akan diberikan kepada pesakit COVID-19 berisiko tinggi pada peringkat lebih awal semasa mereka bergejala ringan bagi mencegah jangkitan menjadi lebih teruk. Rawatan antiviral ini akan meliputi pesakit di Klinik Kesihatan, CAC, PKRC dan juga hospital bagi pesakit yang dimasukkan ke wad. Rawatan akan dimulakan setelah bekalan ubat antiviral tersebut tersedia di Malaysia;
- (v) Mengaktifkan semula *National COVID-19 Rapid Response Task Force* (RRTF 2.0) bermula 7 Februari 2022 susulan peningkatan kes COVID-19 melebihi 10,000 kes sehari. Pasukan RRTF 2.0 ini ditubuhkan bagi mengelakkan krisis apabila sistem kesihatan di Malaysia semakin dibebani dengan lambakan kes COVID-19. Antara objektif utama penubuhan pasukan RRTF 2.0 adalah bagi:
- Menyelamatkan nyawa dengan memastikan akses ke Pusat

Kuarantin dan Rawatan COVID-19 Berisiko Rendah (PKRC) dan hospital terjamin serta melakukan pemantauan kes positif COVID-19 melalui Pusat Penilaian COVID-19 secara maya (VCAC);

- Memastikan akses kecemasan dan darurat tersedia apabila diperlukan, seperti menyediakan jumlah ambulans yang mencukupi dan tepat waktu melalui sistem pengurusan berpusat;
- Memastikan kebajikan individu yang terkesan dengan jangkitan COVID-19 tidak terabai termasuk anak-anak kepada kes positif selain menitikberatkan kesihatan mental mereka;
- Memastikan pengendalian dan penyampaian komunikasi strategik yang berkesan bagi mengurangkan serta meredakan kegusaran dalam kalangan masyarakat umum.

Tuan Yang di-Pertua

2. Salah satu cara bagi menangani gelombang Omicron ini juga adalah dengan meningkatkan peratusan individu yang layak menerima vaksin dos penggalak bagi mengurangkan penularan jangkitan, jangkitan serius serta kematian. Ianya bagi mengekalkan tahap kesihatan serta sistem jagaan kesihatan yang optima.

3. Bagi menggalakkan lagi individu mengambil dos penggalak ini, Kementerian Kesihatan Malaysia (KKM) telah mengambil langkah-langkah berikut:

- (i) bekerjasama dengan fasiliti swasta bagi pembukaan lebih banyak PPV termasuk PPV Integrasi di fasiliti tersebut serta PPV *Offsites* serta membenarkan pemberian vaksin secara “walk-in” di semua PPV.
- (ii) Menggunakan pendekatan “outreach” bagi kawasan yang sukar

dicapai

- (iii) Meningkatkan hebahan melalui media sosial dan media arus perdana serta di kawasan setempat.

4. Sehingga 1 Mac 2022, seramai 14,736,569 individu telah menerima vaksin dos penggalak iaitu 62.6% dari jumlah penerima dos lengkap dikalangan yang berumur 18 tahun dan ke atas. Sementara bagi negeri Perak, seramai 1,059,485 individu telah menerima vaksin dos penggalak iaitu 56.4% daripada jumlah penerima dos lengkap dalam kalangan dewasa.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATUK SERI DR. HAJI DZULKEFLY  
BIN AHMAD [ KUALA SELANGOR ]**

**TARIKH : 2 MAC 2022 (RABU)**

**SOALAN**

**DATUK SERI DR. HAJI DZULKEFLY BIN AHMAD [ KUALA SELANGOR ]** minta **MENTERI KESIHATAN** menyatakan apakah kesiapsiagaan dari Kementerian Kesihatan bagi pembukaan sempadan negara sepenuhnya mencukupi.

**JAWAPAN**

Tuan Yang di-Pertua,

1. Kementerian Kesihatan pada 1 Mac 2022 telah membentangkan cadangan SOP pembukaan sempadan negara di Mesyuarat Kuartet Menteri COVID-19. Cadangan ini seterusnya akan diangkat untuk pertimbangan Jemaah Menteri.

2. Bagi memastikan pembukaan sempadan negara dibuat secara berhati-hati, Kerajaan turut meneliti langkah-langkah kesihatan awam dengan mengambil kira:

- (i) status vaksinasi COVID-19 dalam negara;
- (ii) kapasiti kesihatan termasuklah kadar penggunaan katil di hospital dan kadar kemasukan ke ICU serta kadar penggunaan ventilator di hospital; dan
- (iii) kadar kematian termasuklah *brought in dead* (BID).

3. Berdasarkan pemerhatian terhadap perkara-perkara yang dinyatakan di atas didapati bahawa:

- (i) walaupun jumlah jangkitan COVID-19 yang meningkat akibat penularan Omicron dalam komuniti, penggunaan PKRC, penggunaan katil di hospital, penggunaan katil ICU serta ventilator adalah terkawal;
- (ii) jumlah penggunaan katil di hospital yang terkawal pada masa kini, mungkin dikaitkan dengan kadar vaksinasi COVID-19 yang tinggi dalam komuniti; dan
- (iii) *trend* kematian semasa adalah 80 hingga 90 peratus lebih rendah berbanding ketika gelombang Omicron pada tahun lalu.

4. Walau bagaimanapun, Kerajaan tidak memandangkan ringan kes COVID-19 dalam komuniti yang semakin meningkat. Sehubungan itu, Kerajaan sentiasa meningkatkan kesiapsiagaan ke arah pembukaan sempadan negara iaitu antaranya:

- (i) Tindak Balas Kesihatan Awam dan meningkatkan vaksinasi
  - (a) Menyemak semula SOP bagi mengimbangi antara kehidupan dan mata pencarian;
  - (b) Pemantauan kuarantin secara digital iaitu:
    - i. kategori 1 dan 2, kuarantin di rumah;
    - ii. kategori kes 2 b dirujuk ke CAC (*COVID-19 Assessment Centre*);
    - iii. kategori 2b bagi warga emas atau dengan komorbid dirujuk ke hospital; dan
    - iv. pemberian pelepasan [*Release Order (RO)*] secara digital.
  - (c) Meningkatkan pemberian dos penggalak;
  - (d) Pemberian vaksin COVID-19 kanak-kanak diperluaskan dengan pemberian vaksin untuk kanak-kanak di PPV terpilih seperti PPV Integrasi, PPV Offsite, sPPV, PPV HS dan PPV GP. Pelaksanaan PPV Sekolah secara berperingkat.
- (ii) Ujian COVID-19 dan surveilan.
  - (a) Bagi ujian COVID-19, KKM akan memperluaskan "*point of care test*" dan meningkatkan penggunaan RTK-Ag sendiri and profesional. Ujian akan hanya dibuat ke atas kontak rapat yang bergejala; dan
  - (b) Bagi tindakan surveilan pula, KKM akan meneruskan pemantauan makmal dan pengawasan klinikal. Selain itu, bilangan dan kapasiti makmal (awam dan swasta) bagi

pengawasan *Whole Genome Sequencing* (WGS) akan ditingkatkan daripada 3,000 hingga 5,000 sebulan bulan.

(iii) Pengurusan Data & Digitalisasi.

- (a) Menaik taraf sistem sedia ada ke arah pendigitalan sepenuhnya;
- (b) Menggalakkan penggunaan e-COVID oleh pengamal swasta; dan
- (c) Mengembangkan penggunaan pengurusan modul wabak.

(iv) Komunikasi strategik.

Menyampaikan mesej-mesej yang kerap dan konsisten berkaitan isu-isu berikut:

- (a) Pemerkasaan diri & komuniti;
- (b) *National testing strategy* (NTS);
- (c) TRIIS (Testing, Lapor, Mengasingkan, Memaklumkan, Cari);
- (d) Hidup dengan COVID-19; dan
- (e) Program Immunisasi COVID-19 Kebangsaan (PICK) *Booster* dan PICKids.

(v) *SOP Vaccine Travel Lane*.

SOP di bawah program *Vaccine Travel Lane* di pintu masuk sedia diperluaskan kepada negara Brunei, Thailand, Hong Kong, Indonesia, Korea dan lain-lain.

(vi) Memperkasakan pengurusan kes COVID-19 di fasiliti-fasiliti kesihatan.

(vii) Menambahbaik dari semasa ke semasa SOP dan langkah-langkah kawalan sempadan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : PUAN RUSNAH BINTI ALUAI  
[TANGGA BATU]**

**TARIKH : 02 MAC 2022 (RABU)**

**SOALAN**

**PUAN RUSNAH BINTI ALUAI [ TANGGA BATU ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan mengapa bekalan minyak kelapa sawit subsidi (dalam pek) semakin berkurangan sedangkan negara kita merupakan pengeluar minyak kelapa sawit kedua terbesar di dunia.



**JAWAPAN**

**Yang di-Pertua,**

Harga kawalan yang rendah iaitu RM2.50 bagi minyak masak subsidi polibeg 1 kilogram menjadi faktor asas mengapa minyak masak tersebut di sebahagian tempat mengalami kekurangan bekalan. Jurang harga yang ketara di antara minyak masak subsidi polibeg 1 kilogram dengan minyak masak botol 5 kilogram telah menyebabkan minyak masak polibeg tersebut mendapat permintaan yang tinggi di kalangan pengguna.

Walaupun Kerajaan telah menetapkan minyak masak subsidi polibeg 1 kilogram hanya untuk kegunaan isi rumah domestik, peniaga-peniaga kecil dan sederhana turut mengambil peluang untuk menggunakan minyak masak polibeg tersebut bagi mengurangkan kos operasi dalam perniagaan mereka. Pembelian dalam kuantiti yang banyak oleh peniaga dalam satu-satu masa telah mengakibatkan bekalan minyak masak polibeg itu sering kehabisan stok di kedai-kedai runcit dan pasaraya.

Sebagaimana sedia maklum, syarikat-syarikat pembungkus minyak masak diberi kuota pengeluaran bagi minyak masak subsidi polibeg 1 kilogram. Disebabkan permintaan yang tinggi bagi minyak masak polibeg tersebut, di tambah pula *trend* pembelian meningkat semasa musim-musim perayaan, kuota pengeluaran minyak masak polibeg mencapai had lebih awal dari kebiasaan. Ini menyebabkan berlaku gangguan pembekalan di peringkat pemborong terutama menjelang hujung bulan.

Selain itu, harga yang rendah berbanding negara-negara jiran telah menyebabkan minyak masak polibeg di Malaysia menjadi antara barangan yang sering diseludup keluar. Aktiviti penyeludupan tidak dinafikan turut menjadi punca berlaku kekurangan minyak masak subsidi polibeg 1 kilogram di pasaran tempatan.

**Yang di-Pertua,**

Kementerian ini sedang giat menangani isu kekurangan bekalan minyak masak subsidi di pasaran dengan mengambil langkah-langkah seperti berikut :

- i. Mengarahkan pemeriksaan dan pengauditan di setiap peringkat rantai pengedaran minyak masak;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menggantungkan kuota dan lesen ke atas syarikat yang didapati terbabit melakukan penyelewengan dan penyeludupan;
- v. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan; dan
- vi. Mempertingkatkan kerjasama dengan agensi-agensi penguatkuasaan lain seperti Jabatan Kastam Diraja Malaysia (JKDM), Angkatan Tentera Malaysia (ATM), Polis Diraja Malaysia (PDRM) dan Eastern Sabah Security Command (ESSCOM).

Pada tahun ini sehingga 21 Februari 2022, KPDNHEP telah menjalankan 6,355 pemeriksaan ke atas premis-premis yang terbabit dengan urusan minyak masak, 15 kertas siasatan telah dibuka dan 94 premis masih dalam tindakan pengauditan. Setakat ini, 15 syarikat pembungkus telah digantung kuota skim minyak masak (COSS) dan 5 syarikat pemborong telah digantung lesen urusan minyak masak (Lesen Borong CSA).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN M. KULASEGARAN A/L V.  
MURUGESON [ IPOH BARAT ]**

**TARIKH : 02 MAC 2022 (RABU)**

**SOALAN**

**TUAN M. KULASEGARAN A/L V. MURUGESON [ IPOH BARAT ]** minta  
**MENTERI DALAM NEGERI** menyatakan :-

(a) jumlah MyTravelPass yang telah diluluskan untuk warga asing yang membuat permohonan melalui Sistem Maid Online (SMO) dengan mengikut kewarganegaraan dan jantina masing-masing dari bulan April 2020 sehingga Februari 2022. Berikan pecahan untuk setiap bulan; dan

(b) adakah Sistem Maid Online (SMO) masih aktif digunapakai untuk tujuan kemasukan warga asing ke Malaysia dan adakah SMO akan berhenti digunapakai pada masa yang akan datang.

**JAWAPAN**

Tuan Yang Di Pertua,

Seperti mana Ahli Yang Berhormat sedia maklum, Perintah Kawalan Pergerakan (PKP) dikuat kuasa oleh Kerajaan bermula 18 Mac 2020 bagi membendung penularan pandemik COVID-19, dan ianya termasuklah pengukuhan kawalan pintu masuk dan sempadan negara. Bagi tujuan ini, Kerajaan memperkenalkan kawalan kemasukan warganegara asing ke Malaysia dengan penetapan syarat-syarat permohonan yang ketat melalui MyTravelPass.

Manakala Sistem Maid Online (SMO) adalah sistem penyampaian perkhidmatan secara dalam talian bagi pengambilan Pembantu Rumah Asing (PRA) daripada sembilan buah negara sumber. Proses pengambilan PRA melalui SMO dilakukan oleh majikan yang ingin menggajikan warganegara asing sebagai PRA sebelum dikeluarkan Pas Lawatan Kerja Sementara (PLKS).

Jabatan Imigresen Malaysia telah merekodkan permohonan pengambilan PRA melalui SMO yang telah diluluskan MyTravelPass bermula Ogos 2020 selaras dengan usaha kerajaan untuk menambah baik sistem penyampaian perkhidmatan kerajaan secara bersepadu. Berdasarkan rekod oleh Jabatan Imigresen Malaysia bagi tempoh pandemik iaitu bermula Ogos 2020 sehingga Disember 2021, terdapat sebanyak 9,291 permohonan pengambilan PRA yang diterima. Kesemua permohonan tersebut adalah bagi warganegara asing yang diberikan kebenaran masuk melalui MyTravelPass.

Daripada jumlah tersebut, 4,535 merupakan permohonan baharu dan 4,756 permohonan terdiri daripada pemegang Pas Lawatan Kerja Sementara PRA yang tamat ketika berada di negara asal. Daripada jumlah tersebut, 6,352 permohonan telah diluluskan dan 2,939 permohonan telah

**SOALAN NO : 61**

ditolak. Pecahan mengikut warganegara bagi jumlah keseluruhan permohonan tersebut adalah seperti berikut:

- i) Indonesia : 7,412 orang
- ii) Filipina : 1,405 orang
- iii) India : 144 orang
- iv) Sri Lanka : 87 orang
- v) Vietnam : 94 orang
- vi) Lain-lain warganegara : 149 orang

Untuk makluman Ahli Yang Berhormat, perkhidmatan pengambilan PRA melalui SMO secara dalam talian masih diteruskan sehingga kini sejak pelaksanaannya bermula pada 1 Januari 2018.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN CHARLES ANTHONY SANTIAGO  
[ KLANG ]**

**TARIKH : 02 MAC 2022 (RABU)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI SUMBER MANUSIA** menyatakan adakah perjanjian memorandum persefahaman (MoU) berhubung pengambilan pekerja Bangladesh akan dikemukakan kepada umum secara telus dan bagaimana Kerajaan bercadang untuk menghentikan sistem orang tengah dalam pengambilan pekerja asing.

**JAWAPAN**

**Tuan Yang di-Pertua,**

Kerajaan Malaysia yang diwakili oleh Menteri Sumber Manusia dan Kerajaan Bangladesh yang diwakili oleh Menteri Kebajikan Ekspatriat dan Pekerjaan Luar Negara Bangladesh telah menandatangani Memorandum Persefahaman antara Kerajaan Malaysia dan Kerajaan Republik Rakyat Bangladesh mengenai Penggajian Pekerja (*The Employment of Workers*) dengan izin pada 19 Disember 2021.

Secara keseluruhannya, Memorandum Persefahaman ini adalah sama seperti Memorandum Persefahaman dengan negara sumber yang lain di mana ianya menekankan **proses pengambilan dan penggajian pekerja asing dari Bangladesh mengikut kerjasama bilateral di antara kedua-dua negara.**

Keseluruhan isi kandungan di dalam Memorandum Persefahaman pengambilan pekerja asing dengan negara-negara sumber diperuntukkan klausa berhubung kerahsiaan yang telah dipersetujui oleh kedua-dua pihak.

Setakat ini, Kerajaan Malaysia telah menandatangani 13 Memorandum Persefahaman. Walau bagaimanapun hanya dua Memorandum Persefahaman masih berkuatkuasa iaitu:

- i. Memorandum Persefahaman Kerajaan Malaysia dan Kerajaan Republik Rakyat Bangladesh- berkuatkuasa daripada Disember 2021 sehingga Disember 2026; dan
- ii. Memorandum Persefahaman Kerajaan Malaysia dan Kerajaan Nepal- berkuatkuasa daripada Oktober 2018 sehingga Oktober 2023.

Memorandum Persefahaman dengan negara sumber yang lain masih lagi dalam peringkat perundingan dan akan ditandatangani dalam masa yang terdekat.

**Tuan Yang DiPertua,**

Bagi mengelakkan daripada sebarang penipuan oleh pihak yang tidak bertanggungjawab, Kerajaan ini menasihatkan agar majikan tidak menggunakan pihak ketiga atau orang tengah yang dikatakan boleh mempercepatkan proses permohonan untuk membawa masuk pekerja asing.

Majikan yang ingin menggaji pekerja asing perlu mengemukakan permohonan melalui *Foreign Workers Centralised Management System* dengan izin berdasarkan keperluan tenaga kerja yang layak dipohon. Manakala bagi majikan yang menggunakan khidmat agensi swasta perlu memastikan agensi itu berdaftar dan mempunyai lesen yang diperakui oleh Jabatan Tenaga Kerja Semenanjung Malaysia di bawah Akta Agensi Pekerjaan Swasta 1981.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN VIVIAN WONG SHIR YEE  
[ SANDAKAN ]**

**TARIKH : 2 MAC 2022 (RABU)**

**SOALAN**

**PUAN VIVIAN WONG SHIR YEE [ SANDAKAN ]** minta **MENTERI KESIHATAN** menyatakan apakah yang telah berlaku kepada janji yang telah dibuat pada tahun lepas untuk membangunkan sistem token untuk membantu mereka yang tiada telefon pintar untuk mendaftar masuk ke pelbagai premis.

**JAWAPAN**

Tuan Yang di-Pertua,

1. Sistem token ini ialah peranti di dalam bentuk *bluetooth dongle* seperti yang dilaksanakan di Singapura. Di negara tersebut, penggunaan *bluetooth dongle* yang dikenali *TraceTogether token* adalah pengganti kepada telefon pintar untuk tujuan membanteras penularan wabak COVID-19 dengan anggaran kos token sekitar SGD 20 satu unit.
2. Penggunaan *bluetooth dongle* ini adalah sebahagian daripada cadangan kemudahan dalam *Find, Trace, Test, Isolate and Support* (FTTIS) yang dilaksanakan secara digital untuk membantu pihak berwajib melaksanakan pengesanan kontak. MOSTI selaku Kementerian yang membangunkan teknologi akan memastikan teknologi yang dibangunkan memenuhi keperluan KKM.
3. Setakat ini, projek sistem token/*bluetooth dongle* ini masih di peringkat perancangan untuk perolehan oleh MOSTI. Sekiranya diteruskan, penggunaan sistem token/*bluetooth dongle* ini kelak akan dilakukan secara rintis untuk tempoh sekurang-kurangnya selama tiga bulan oleh pihak MIMOS. MIMOS akan membangunkan algoritma yang dilengkapi ciri-ciri keselamatan. *Bluetooth dongle* ini akan saling beroperasi (interoperable) dengan aplikasi MySejahtera.
4. Tujuan dilakukan secara rintis adalah untuk memastikan kesesuaian dan keberkesanan pelaksanaan penggunaan *bluetooth dongle* oleh individu yang tidak mempunyai telefon pintar.
5. Laporan projek rintis akan disediakan untuk pertimbangan pihak-pihak berkepentingan. Proses untuk *roll-out bluetooth dongle* ke seluruh negara akan dilaksanakan oleh pihak KKM.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN VIVIAN WONG SHIR YEE  
[ SANDAKAN ]**

**TARIKH : 2 MAC 2022 (RABU)**

**SOALAN**

**PUAN VIVIAN WONG SHIR YEE [ SANDAKAN ]** minta **MENTERI KESIHATAN** menyatakan :-

- (a) adakah sistem penjagaan kesihatan dan hospital awam kita telah dilengkapi untuk mengendalikan peningkatan COVID-19 lagi apabila sempadan antarabangsa dibuka semula pada Mac seperti yang dicadangkan oleh Majlis Pemulihan Negara; dan
- (b) adakah Kementerian akan mewujudkan wad-wad pengasingan yang lebih besar di hospital utama di Sabah untuk menampung jumlah yang besar bagi pesakit COVID-19.

**JAWAPAN**

Tuan Yang di-Pertua

1. Kementerian Kesihatan Malaysia pada 1 Mac 2022 telah membentangkan cadangan SOP pembukaan sempadan negara di Mesyuarat Kuartet Menteri COVID-19. Cadangan ini seterusnya akan diangkat untuk pertimbangan Jemaah Menteri.
2. KKM sememangnya telah mempunyai pelan kesiapsiagaan bagi menghadapi sebarang peningkatan kes COVID-19 terutama apabila sempadan antarabangsa dibuka semula.
3. Secara umumnya Hospital-hospital KKM kini difokuskan untuk merawat pesakit-pesakit COVID-19 yang memerlukan intervensi klinikal dan rawatan lanjut untuk kemasukan ke wad, manakala pesakit-pesakit COVID-19 yang tidak bergejala dan mempunyai gejala ringan serta tidak memerlukan rawatan lanjut di wad akan menjalani isolasi di rumah. Berdasarkan langkah-langkah yang telah diambil semasa peningkatan pesakit COVID-19 variant Delta pada tahun 2021, fasiliti di hospital-hospital KKM telah ditambahbaik merangkumi perolehan tambahan kelengkapan peralatan di wad-wad dan unit rawatan rapi atau ICU serta perolehan Hybrid ICU. KKM juga telah menambahbaik keperluan ventilator dan pembekalan oksigen di hospital-hospital KKM bagi memastikan keperluan mencukupi dapat disediakan.
4. Pelan pengurusan disaster di hospital KKM juga telah disusun bagi menghadapi sebarang peningkatan bilangan pesakit yang memerlukan rawatan termasuk:
  - a. Bilangan katil bagi rawatan pesakit COVID-19 dan Hospital COVID-19 secara Full COVID-19 dan Hybrid COVID-19 akan ditambah dari semasa ke semasa. Kapasiti maksimum pada tahun 2021 adalah sekitar 30,000 manakala bilangan semasa pada 2022 adalah pada sekitar 11,000 katil di 125 hospital COVID-19.

- b. Bilangan katil rawatan rapi juga akan ditambah melalui penggunaan Hybrid ICU dan repurpose ICU. Kapasiti maksimum ICU untuk pesakit COVID-19 pada tahun 2021 adalah sekitar 1,900 manakala bilangan semasa pada 2022 adalah 826 katil ICU.
- c. Pusat Kuarantin dan Rawatan COVID-19 turut dibuka bagi merawat pesakit-pesakit COVID-19 yang bersesuaian.
- d. Kerjasama awam-swasta melalui outsourcing diperluaskan bagi memastikan pesakit selain COVID-19 terus mendapat rawatan.

Tuan Yang di-Pertua,

5. Sehingga 16 Februari 2022, sebanyak 22 buah hospital KKM di negeri Sabah disediakan bagi perawatan pesakit COVID-19 dengan jumlah katil bukan kritikal sebanyak 1,602 buah. Jumlah katil ini telah ditingkatkan sebanyak 37% berbanding 1,168 buah katil pada 01 Januari 2022.

6. Hospital-hospital di Sabah akan menambah kapasiti katil secara berfasa mengikut situasi dan keperluan semasa bagi mengimbangi keperluan perawatan untuk pesakit COVID-19 dan juga pesakit bukan COVID-19.

7. Terdapat juga 11 buah Pusat Kuarantin dan Rawatan COVID-19 (PKRC) di seluruh Sabah dengan jumlah katil 2,196 buah dan kadar penggunaan katil (BOR) sebanyak 52% pada 16 Februari 2022. Sekiranya terdapat keperluan, 3 buah fasiliti PKRC bersedia untuk dibuka (*in standby mode*) dengan tambahan katil 332 buah yang akan menempatkan pesakit COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN ISNARAISSAH MUNIRAH  
MAJILIS [ KOTA BELUD ]**

**TARIKH : 2 MAC 2022 (RABU)**

**SOALAN**

**PUAN ISNARAISSAH MUNIRAH MAJILIS [ KOTA BELUD ]** minta **MENTERI KESIHATAN** menyatakan jumlah kos yang telah dibelanjakan oleh Kementerian bagi penyumberluaran pesakit bukan COVID-19 ke hospital tahun lalu dan apakah perancangan Kementerian bagi menyelesaikan 50,000 kes tertangguh membabitkan pembedahan dan prosedur perubatan bukan COVID-19 di hospital Kerajaan.

**JAWAPAN**

Tuan Yang di-Pertua,

1. Pada tahun 2021, sebanyak RM174.3 juta telah dibelanjakan bagi pelaksanaan inisiatif penyumberluaran pesakit ke hospital swasta.

	<b>2020</b>	<b>2021</b>
Jumlah peruntukan	RM 56 Juta	RM 213.2 Juta
Jumlah perbelanjaan untuk penyumberluaran	RM 41.6 Juta (74.3 %)	RM 174.3 Juta (81.8%)

2. Sehingga 31 Disember 2021, jumlah kes tertunggak di hospital KKM adalah sebanyak 37,963 kes berbanding 57,355 kes pada 30 September 2021.

	<b>30 September 2021</b>	<b>31 Disember 2021</b>
Jumlah Kes Pembedahan Tertunggak	53,785	33,111
Jumlah Kes Bukan Pembedahan Tertunggak	3,570	4,852
Jumlah Kes Keseluruhan	57,355	37,963

3. Pada Disember 2021, terdapat pengurangan kes tertunggak sebanyak 33.8% berbanding bulan September 2021. Beberapa inisiatif telah dilakukan bagi menangani isu kes tertunggak ini seperti:

- a. penyumberluaran kepada hospital swasta sebagai KPI 100 hari YB Menteri Kesihatan yang telah berjaya mengurangkan kes backlog disiplin pembedahan am mengikut sasaran yang ditetapkan. Perkhidmatan penyumberluaran ini akan diteruskan bagi mengurangkan bilangan kes tertunggak;

## SOALAN NO : 65

- b. pembukaan semula dewan-dewan bedah elektif di hospital-hospital KKM secara berperingkat bermula pada bulan Oktober 2021;
  - c. inisiatif pembedahan elektif hari Sabtu dari jam 8 pagi hingga 5 petang di hospital-hospital berpakar di seluruh negara bermula pada bulan Disember 2021; dan
  - d. melaksanakan pembedahan secara besar-besaran (*Mass Surgery Initiative*) di beberapa negeri seperti:
    - i. *Mass Urology Surgery Initiative* di Hospital Selayang yang telah mula berlangsung pada 10 Februari 2022 sehingga 13 Februari 2022;
    - ii. *Program Mass Cataract Surgery Initiative* akan akan dilaksanakan di Hospital Tawau Sabah pada bulan Mac 2022.
4. Melalui pelaksanaan inisiatif sedia ada, kes yang tertangguh dijangka akan dapat diselesaikan tidak lama lagi.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA, PARLIMEN  
KEEMPAT BELAS 2022**

**PERTANYAAN : LISAN**

**DARIPADA : DATUK SERI DR. HAJI DZULKEFLY  
BIN AHMAD [ KUALA SELANGOR ]**

**TARIKH : 2 MAC 2022 (RABU)**

**SOALAN**

**DATUK SERI DR. HAJI DZULKEFLY BIN AHMAD  
[ KUALA SELANGOR ]** minta **MENTERI KESIHATAN** menyatakan  
pertimbangan kepentingan mengiktiraf bidang- bidang kepakaran  
seumpama Penyelidikan Klinikal dan Medico-legal, sesuai dengan  
kemajuan pesat di bidang perubatan-kesihatan.

**JAWAPAN**

Tuan Yang di-Pertua,

1. Untuk makluman, sebelum 1 Julai 2017, sebarang urus tadbir berkaitan kepakaran adalah di bawah kerjasama antara pihak Kementerian Kesihatan Malaysia, Akademi Perubatan Malaysia dan juga Agensi Kelayakan Malaysia secara pentadbiran dengan mengambil kira keperluan masyarakat dan sumber negara dari segi keperluan perkhidmatan dan kesihatan nasional. Selepas Akta Perubatan 1971 (Pindaan 2012) dikuatkuasakan pada 1 Julai 2017, kawal selia pengiktirafan bagi sebarang bidang kepakaran ataupun subkepakaran ke dalam National Specialist Register (NSR) adalah di bawah bidang kuasa Majlis Perubatan Malaysia (MPM) dan senarai kelayakankepakaran sedia ada telah diterima pakai dan diiktiraf oleh pihak MPM .

2. Dengan kemajuan pesat dalam bidang pengetahuan perubatan dan teknologi kesihatan, pengkhususan dan subpengkhususan dalam amalan perubatan tidak dapat dielakkan.
3. Bidang kepakaran sedia ada adalah meliputi cabang-cabang utama bidang perubatan termasuklah perubatan, surgery, obstetrik dan ginekologi, perubatan kanak-kanak (paediatric), kesihatan awam dan lain-lain. Bidang subkepakaran pula meliputi pengkhususan daripada cabang utama bidang perubatan contohnya bagi bidang perubatan dalaman iaitu respiratori, kardiologi, nefrologi dan sebagainya. Bidang kepakaran dan subkepakaran ini adalah secara langsung melibatkan pengurusan dan perawatan kesihatan secara amnya dan melibatkan pesakit.
4. Namun demikian, bidang-bidang lain tertentu seperti penyelidikan klinikal dan *medico-legal* adalah tidak melibatkan kepada pengurusan dan perawatan kesihatan mahupun penglibatan pesakit. Tambahan, pengenalan bidang-bidang baru seperti yang dinyatakan tersebut tidak seharusnya dilakukan dengan tergesa-gesa dan adalah penting untuk mengambil kira keperluan masyarakat dan sumber negara bagi memastikan tidak mendatangkan kemudaratan kepada sistem penjagaan kesihatan negara secara keseluruhannya.
5. Pihak MPM akan menilai sebarang permohonan bagi mengiktiraf bidang kepakaran/ subkepakaran yang baru untuk disenaraikan ke dalam NSR berdasarkan keperluan dan manfaat negara. Sehubungan itu, sebarang permohonan pengiktirafan bidang kepakaran/subkepakaran perlu melalui proses yang telah ditetapkan oleh MPM.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN NIK NAZMI BIN NIK AHMAD  
[ SETIAWANGSA ]**

**TARIKH : 2 MAC 2022 (RABU)**

**SOALAN**

**TUAN NIK NAZMI BIN NIK AHMAD [ SETIAWANGSA ]** minta **MENTERI KESIHATAN** menyatakan tentang tindakan susulan penyerahan tuntutan Kesatuan Pekerja Swasta Perkhidmatan Sokongan Hospital Kerajaan Semenanjung Malaysia tentang masalah kebajikan mereka tempoh hari.

**JAWAPAN**

Tuan Yang di-Pertua,

1. Syarikat Edgenta Mediserve Sdn. Bhd. (anak syarikat kepada UEM Edgenta Berhad) merupakan salah satu (1) daripada syarikat konsesi yang dipertanggungjawabkan untuk menguruskan Perkhidmatan Sokongan Hospital (PSH) bagi 32 buah hospital/ institusi di negeri Pulau Pinang, Kedah, Perlis dan Perak yang terlibat dengan pertikaian dan tuntutan dengan pihak Kesatuan Pekerja Swasta Perkhidmatan Sokongan Hospital Kerajaan Semenanjung Malaysia (NUWHSAS).
2. Pihak Kesatuan telah mengemukakan tuntutan berhubung penghapusan sistem kontrak, pemerasan ahli-ahli kesatuan dan pemberian elaun COVID-19 kepada pekerja pembersihan hospital di negeri Pulau Pinang, Kedah, Perlis dan Perak.
3. Menteri Kesihatan telah mengadakan sesi pertemuan dengan pihak UEM Edgenta Berhad pada 14 Februari 2022 untuk mendapatkan penjelasan lanjut berhubung isu-isu yang dibangkitkan oleh pihak Kesatuan. Berdasarkan penjelasan pihak UEM, syarikat telah melaksanakan beberapa inisiatif bagi memastikan kebajikan para pekerja pembersihan dijaga terutamanya sejak bermulanya pandemik COVID-19. Selain itu isu-isu berkaitan perundangan juga sedang dalam perbicaraan di mahkamah bagi memuktamadkan tindakan penyelesaian.
4. Kementerian juga telah meminta pihak syarikat untuk memberi perhatian serius dalam mempertimbangkan tuntutan-tuntutan oleh pihak Kesatuan yang tidak mengganggu perkhidmatan dan tidak melanggar mana-mana peraturan dan undang-undang, terutamanya berkaitan aspek kebajikan pekerja. Perbincangan di antara kedua-dua pihak sangat digalakkan bagi mengelakkan sebarang masalah komunikasi Langkah positif perlulah diwujudkan bagi memperbaiki hubungan antara pihak syarikat dengan pihak Kesatuan supaya perkhidmatan sokongan di hospital-hospital KKM tidak terjejas.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN WONG SHU QI (KLUANG)**

**TARIKH : 2 MAC 2022 (RABU)**

**SOALAN**

**PUAN WONG SHU QI (KLUANG)** minta **MENTERI PERUMAHAN DAN KERAJAAN TEMPATAN** menyatakan jumlah unit rumah yang dimiliki oleh warga asing mengikut kewarganegaraan serta jumlah warga Malaysia di bawah projek Country Garden Pacificview setakat ini.

**JAWAPAN**

**Tuan Yang di-Pertua,**

Untuk makluman Ahli Yang Berhormat, berdasarkan data yang diperolehi dari Pejabat Tanah dan Galian (PTG) Johor, sehingga 24 Februari 2022, jumlah pemilikan hak milik strata yang berdaftar di bawah projek Country Garden Pacific View Sdn. Bhd. iaitu di Forest City, Mukim Tanjung Kupang, Johor Bahru adalah seperti di **Jadual 1**.

**Jadual 1:** Pemilikan Hak Milik Strata bagi Projek Country Garden Pacific View Sdn. Bhd.

<b>Pemilikan</b>	<b>Jumlah Unit</b>
Warganegara Malaysia	29
Warganegara Asing	399
<b>Jumlah</b>	<b>428</b>

Pecahan pemilikan oleh warga asing mengikut kewarganegaraan pula adalah seperti di **Jadual 2**.

**Jadual 2:** Perincian Pemilikan Warga Asing Mengikut Kewarganegaraan

<b>Bil.</b>	<b>Kewarganegaraan</b>	<b>Jumlah Unit</b>
1	China	340
2	Hong Kong	28
3	Singapura	9
4	Taiwan	6
5	Kanada	3
6	Indonesia	3
7	Jerman	2
8	Vietnam	2
9	Amerika Syarikat	2
10	Korea Selatan	1
11	Jepun	1
12	India	1
13	Rusia	1
<b>Jumlah</b>		<b>399</b>

Kuasa bagi menetapkan kuota penjualan kepada warganegara atau warga asing adalah di bawah bidang kuasa kerajaan negeri. Walaupun kebanyakan negeri membenarkan pemilikan kediaman kepada warga asing, namun kadar pemilikan oleh warga asing di negara ini masih rendah iaitu kurang daripada 1% berbanding pemilikan keseluruhan bagi rumah yang dikategorikan sebagai kediaman mewah.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN CHARLES ANTHONY A/L SANTIAGO**

**TARIKH : 02 MAC 2022 (RABU)**

**SOALAN**

**TUAN CHARLES ANTHONY SANTIAGO [ KLANG ]** minta **MENTERI DALAM NEGERI** menyatakan kesediaan Kerajaan untuk memansuhkan pernyataan larangan bekerja atau diambil bekerja yang tertera pada setem visa pasangan bukan warganegara memandangkan ia memberi kesan buruk kepada wanita di dalam perkahwinan dwi nasional dan ia juga termasuk dalam perkara-perkara yang diberikan perhatian dalam semakan 2018 CEDAW.

**JAWAPAN**

Tuan Yang Di Pertua,

Untuk makluman Ahli Yang Berhormat, Pas Lawatan (Sosial) Jangka Panjang adalah satu kemudahan yang dikeluarkan oleh Jabatan Imigresen Malaysia (JIM) kepada pasangan warganegara asing yang berkahwin dengan warganegara Malaysia dan menetap di dalam Negara untuk suatu tempoh tertentu.

Jabatan Imigresen Malaysia melaksanakan prosedur catatan/endorsan pernyataan larangan bekerja atau diambil bekerja yang tertera pada pas pasangan bukan warganegara adalah bertujuan supaya pemegang pas tahu bahawa mereka tidak dibenarkan bekerja secara

## SOALAN NO : 69

automatik namun sebaliknya perlu memohon agar kawalan dapat dilakukan dari segi jenis / sektor pekerjaan dan sebagainya. Secara tidak langsung, ini dapat memastikan pasangan (suami / isteri) asing kepada warganegara Malaysia tersebut tidak terlibat dalam apa-apa pekerjaan atau perniagaan yang tidak sah di bawah undang-undang dan peraturan-peraturan yang berkaitan yang berkuatkuasa di Malaysia. Di samping itu, ini juga bagi memastikan bahawa keabsahan perkahwinan tersebut adalah sah dari segi undang-undang dan bukan sekadar *marriage of convenience* yang bertujuan untuk memperoleh pas.

Untuk makluman Ahli Yang Berhormat, Kerajaan sentiasa prihatin akan kebajikan pasangan (suami / isteri) asing kepada warganegara Malaysia. Sehubungan itu, Kerajaan telah membuat keputusan untuk membenarkan semua pasangan (suami / isteri) asing kepada warganegara Malaysia bekerja secara sah dan teratur di Negara ini tanpa perlu melalui proses dan prosedur yang rumit seperti perlu menukar Pas Lawatan Sosial Jangka Panjang mereka kepada pas kerja yang bersesuaian dan perlu mendapatkan pas kerja yang baharu setiap kali bertukar jawatan / majikan. Pasangan warga asing tersebut hanya perlu hadir ke Jabatan Imigresen Malaysia yang terdekat bagi memohon kebenaran bekerja.

Justeru itu, amalan meletakkan catatan/endorsan larangan bekerja di atas pas pasangan (suami / isteri) asing kepada warganegara Malaysia sebenarnya tidak mendiskriminasi pasangan asing (khususnya wanita), malah kelonggaran juga telah diberikan kepada pemegang pas pasangan untuk bekerja di Malaysia.

Namun atas faktor keselamatan dan bagi melindungi kebajikan pasangan (suami / isteri) asing kepada warganegara Malaysia daripada dieksploitasi dan terjebak di dalam aktiviti yang memudaratkan institusi keluarga dan negara, maka pada ketika ini Kerajaan tidak berhasrat untuk menamatkan amalan meletakkan catatan/endorsan larangan bekerja di atas pas pasangan (suami / isteri) asing kepada warganegara Malaysia.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN WONG TACK (BENTONG)**

**TARIKH JAWAB : 2 MAC 2022 (RABU)**

**SOALAN**

**TUAN WONG TACK (BENTONG)** minta **MENTERI PERUMAHAN DAN KERAJAAN TEMPATAN** menyatakan butiran penuh proses kelulusan projek perumahan PR1MA di Lot 4623, PA8569, Bentong yang terletak berdekatan Hutan Simpan Kuala Raka dan Taman Shahbandar Heights, Bentong.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Perbadanan PR1MA Malaysia (PR1MA) merupakan sebuah agensi perumahan di bawah Kementerian Perumahan dan Kerajaan Tempatan (KPKT) yang ditubuhkan melalui Akta Perumahan Rakyat 1Malaysia (PR1MA) 2012 (Akta 739) dengan mandat menyediakan perumahan mampu milik untuk golongan M40.

PR1MA kini mempunyai 61 projek yang berdaya maju di seluruh negara dengan pelbagai peringkat kemajuan iaitu 35 projek dengan jumlah unit 27,821 telah siap dibina, 26 projek dengan jumlah unit 19,316 sedang dalam pembinaan dan 2,264 unit sedang dalam perancangan.

Untuk makluman Ahli Yang Berhormat, PR1MA mempunyai 3 (tiga) projek di negeri Pahang di mana ketiga-tiganya berada di daerah Kuantan. Projek PR1MA di Lot 4623, PA8569, Bentong yang dinyatakan oleh Yang Berhormat ini adalah projek di bawah Kerajaan Negeri Pahang. Sehubungan itu, kelulusan projek ini bukanlah di bawah seliaan PR1MA.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN SYED SADDIQ BIN SYED ABDUL  
RAHMAN [ MUAR ]**

**TARIKH : 2 MAC 2022 (RABU)**

**SOALAN**

**TUAN SYED SADDIQ BIN SYED ABDUL RAHMAN [ MUAR ]** minta **MENTERI KESIHATAN** menyatakan apakah persediaan Kementerian sekiranya berlaku pilihan raya pada waktu pandemik COVID-19. Adakah Kementerian telah membentuk garis panduan (SOP) yang seiring dengan amalan terbaik antarabangsa dan memenuhi keperluan kesihatan awam negara dan rakyat bagi tujuan pelaksanaan pilihan raya. Pada masa sama, apakah langkah untuk memastikan hak demokratik dan kebebasan rakyat tidak diabaikan dalam usaha Kementerian memastikan kes jangkitan di tahap terkawal.

**JAWAPAN**

Tuan Yang di-Pertua,

1. Semasa tempoh pandemik COVID-19, Kerajaan telah mengadakan dua (2) Pilihan Raya Kecil (PRK) (iaitu di Chini, Pahang dan Batu Sapi, Sabah) dan tiga (3) Pilihan Raya Negeri (PRN) (iaitu di negeri Sabah, Sarawak dan Melaka) pada tahun 2020 dan 2021. Pengalaman dalam mengendalikan pilihan raya khususnya semasa PRN Sabah menjadi panduan bagi mengurangkan risiko penularan jangkitan COVID-19 dalam komuniti.
2. Bagi setiap pilihan raya tersebut, satu Prosedur Operasi Standard (SOP) khusus disediakan bagi memastikan pelaksanaan hak mengundi

dilakukan mengikut tatacara yang ditetapkan agar risiko penularan jangkitan COVID-19 dapat diminimumkan. Semua SOP tersebut dibangunkan secara bersama oleh agensi-agensi berkepentingan, yang meliputi Suruhanjaya Pilihan Raya (SPR), Majlis Keselamatan Negara (MKN) dan KKM serta Kerajaan Negeri yang berkaitan.

Tuan Yang di-Pertua,

3. SOP yang disediakan ini mengambilkira hak mengundi individu dengan membenarkan mereka yang bergejala untuk mengundi di khemah khas yang disediakan. Mereka yang bergejala ini terus diasingkan apabila mereka dikesan di pintu masuk pusat mengundi melalui saringan gejala. Pada masa yang sama, individu yang diarahkan menjalani kuarantin kerana menjadi kontak rapat atau disebabkan baru pulang dari luar negara, yang dikenali sebagai *person under surveillance* (PUS) dibenarkan keluar mengundi setelah mendapatkan kebenaran daripada Pegawai Kesihatan Daerah. Status kesihatan mereka dinilai sama ada bergejala dan dipastikan ujian RTK antigen mereka negatif COVID-19 sebelum dibenarkan ke pusat mengundi. Ia bagi memastikan risiko penularan jangkitan COVID-19 daripada mereka kepada para pengundi yang lain adalah benar-benar rendah.

4. Walau bagaimanapun, individu positif COVID-19 tidak dibenarkan sama sekali untuk hadir ke pusat mengundi kerana mereka berisiko tinggi untuk menularkan jangkitan kepada orang lain.

5. Selain itu, pelaksanaan disinfeksi tempat mengundi sebelum dan selepas digunakan, disinfeksi berkala setiap dua (2) jam, mewajibkan pemakaian pelitup muka dan sarung tangan pakai-buang serta penjarakan fizikal 1 meter antara individu yang perlu dipatuhi oleh semua yang hadir ke pusat mengundi juga diambil bagi mengurangkan risiko jangkitan. Pemantauan dan penguatkuasaan dijalankan sepanjang tempoh pilihan raya bagi memastikan pematuhan SOP dan amalan norma baharu oleh semua calon, penyokong dan komuniti.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN JUGAH ANAK MUYANG @ TAMBAT  
(LUBOK ANTU)**

**TARIKH : 2 MAC 2022 (RABU)**

**SOALAN**

**TUAN JUGAH ANAK MUYANG @ TAMBAT [ LUBOK ANTU ]** minta **MENTERI DALAM NEGERI** menyatakan bagaimana Kementerian melihat keperluan untuk menubuhkan satu jawatankuasa khas bagi membantu dalam membanteras masalah sosial seperti penyalahgunaan dadah serta judi di kawasan luar bandar.

**JAWAPAN**

Tuan Yang Di Pertua,

Kementerian Dalam Negeri melalui Polis Diraja Malaysia (PDRM) sentiasa memantau dan menjalankan operasi secara terancang dan berterusan bagi membanteras kegiatan perjudian di kawasan bandar dan luar bandar. Antara usaha-usaha dan langkah-langkah yang telah dilaksanakan oleh PDRM bagi membanteras kegiatan perjudian adalah seperti berikut:

- i) Mengadakan operasi dan serbuan secara berterusan melalui Op Dadu termasuklah operasi bersepadu dengan kerjasama agensi-agensi lain seperti Pihak Berkuasa Tempatan (PBT) untuk melumpuhkan kegiatan ini;

- ii) Bekerjasama dengan Suruhanjaya Komunikasi dan Multimedia Malaysia (SKMM) bagi sekatan laman sesawang perjudian di bawah Seksyen 263(2) Akta Komunikasi dan Multimedia;
- iii) Bekerjasama dengan syarikat-syarikat utiliti seperti Tenaga Nasional Berhad (TNB) dan syarikat bekalan air untuk tindakan pemotongan bekalan elektrik dan air ke atas premis yang sering digunakan oleh sindiket perjudian;
- iv) Mengambil tindakan ke atas pihak-pihak yang terlibat dalam kegiatan perjudian haram di bawah peruntukan undang-undang berkaitan judi sedia ada seperti Akta Rumah Judi Terbuka 1957 dan Akta Pertaruhan 1953; dan
- v) Tindakan yang lebih keras diambil di bawah peruntukan undang-undang lain yang berkaitan iaitu Akta Pencegahan Jenayah 1959 (POCA) serta Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001.

Dalam usaha membanteras gejala dadah, jentera penyelarasan pelaksanaan dasar membanteras gejala dadah di peringkat Kebangsaan, Negeri dan Daerah telah diwujudkan melalui Arahan YAB Perdana Menteri No.1 Tahun 2004. Melalui arahan ini, Jawatankuasa Kabinet Membanteras Gejala Dadah (JKMD) telah ditubuhkan dan disokong pelaksanaannya melalui lima (5) jawatankuasa kerja seperti berikut:

- i) Jawatankuasa Bertindak Penguatkuasaan Undang-undang (JPU);
- ii) Jawatankuasa Bertindak Rawatan dan Pemulihan (JRP);
- iii) Jawatankuasa Bertindakan Pencegahan, Pendidikan dan Publisiti (JPPP);
- iv) Majlis Tindakan Membanteras Dadah (MTMD) Negeri; dan
- v) Majlis Tindakan Membanteras Dadah (MTMD) Daerah/ Bahagian.

Selain itu, usaha-usaha untuk membantu penagih dan bekas penagih dalam komuniti digerakkan melalui Jawatankuasa Pemulihan Dadah Peringkat Daerah (JKPD). Sehingga Disember 2021, terdapat sebanyak 99

JKPD yang bergerak aktif di daerah seluruh Malaysia. Antara fungsi dan peranan JKPD adalah seperti berikut:

- i) untuk menggalakkan penyertaan masyarakat dalam membantu penagih dadah/bekas penagih supaya tidak kembali menagih khususnya dalam mengintegrasikan semula mereka ke dalam masyarakat;
- ii) merancang, menyelaraskan dan melaksanakan program / aktiviti untuk bekas-bekas penagih;
- iii) membantu pegawai-pegawai AADK Daerah dalam mengawasi, menyelia dan memberi bimbingan kepada penagih/bekas penagih dadah yang sedang menjalani Perintah Pengawasan dalam komuniti; dan
- iv) membantu mendapatkan peluang-peluang latihan dan pekerjaan bagi penagih/bekas penagih yang sedang menjalani Perintah Pengawasan dalam Komuniti.

Oleh yang demikian, KDN berpandangan mekanisme sedia ada pada masa ini memadai bagi menggerakkan dasar-dasar membanteras gejala dadah di seluruh negara dan berupaya mengembleng tenaga serta penglibatan semua agensi kerajaan berkaitan, Pertubuhan Bukan Kerajaan (NGO), sektor swasta dan masyarakat umum.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN WONG CHEN (SUBANG)**

**TARIKH : 2 MAC 2022 (RABU)**

**SOALAN**

**TUAN WONG CHEN [ SUBANG ]** minta **MENTERI DALAM NEGERI** menyatakan :-

- (a) kedudukannya untuk memberikan kewarganegaraan kepada seseorang yang ibunya adalah warganegara pada masa kelahiran; dan
- (b) apakah pelepasan sementara seperti tempat tinggal, kesihatan dan pendidikan yang boleh diberikan kepada anak-anak ibu ini.

**JAWAPAN**

Tuan Yang Di Pertua,

- a) Untuk makluman Ahli Yang Berhormat, individu yang dilahirkan oleh ibu bertaraf warganegara sewaktu kelahiran di dalam negara adalah bertaraf warganegara secara kuat kuasa undang-undang di bawah Perkara 14, Perlembagaan Persekutuan.
- b) Individu tersebut adalah bertaraf warganegara dan layak untuk menerima hak-hak seperti warganegara yang lain dari segi tempat tinggal, kesihatan, pendidikan dan lain-lain, tertakluk kepada perundangan dan dasar agensi kawal selia yang berkaitan.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN MA'MUN BIN SULAIMAN  
[ KALABAKAN ]**

**TARIKH : 02 MAC 2022 (RABU)**

**SOALAN**

**TUAN MA'MUN BIN SULAIMAN [ KALABAKAN ]** minta **MENTERI DALAM NEGERI** menyatakan status terkini jumlah pendatang tanpa izin dan orang tidak bernegara (stateless people) yang berada di negeri Sabah. Apakah tindakan yang tuntas dan berkesan yang telah diambil oleh Kementerian dalam menghantar balik pendatang-pendatang tanpa izin ke negara asal mereka. Bagaimana pula dengan tindakan yang sepatutnya diambil ke atas orang tidak bernegara yang telah lama bermastautin di negeri Sabah.

**JAWAPAN**

Tuan Yang Di Pertua,

Untuk makluman Ahli Yang Berhormat, Kementerian Dalam Negeri (KDN) memandang serius berkaitan masalah Pendatang Asing Tanpa Izin (PATI) di negara ini yang memerlukan strategi pembanterasan secara berterusan. Justeru, sebagai langkah memperkukuhkan tadbir urus dan menambah baik sistem kerja penguatkuasaan sedia ada, KDN sedang memperhalusi pelan strategik penguatkuasaan PATI yang lebih komprehensif dan menyeluruh.

Berdasarkan rekod Jabatan Imigresen Malaysia, jumlah terkini pendatang tanpa izin yang ditahan di empat buah Depot Imigresen di Negeri Sabah adalah seramai 6, 628 orang. Manakala bagi tahanan yang dikategorikan orang tidak berdokumen (*undocumented*) adalah seramai 12 orang.

Berdasarkan pelaksanaan aktiviti penguatkuasaan melibatkan premis-premis perniagaan ataupun perusahaan, pada tahun 2019 sebanyak 8,512 operasi telah dilaksanakan oleh JIM Negeri Sabah dengan tangkapan seramai 27,960 orang PATI dan 903 orang majikan. Pada tahun 2020 pula sebanyak 8,512 operasi telah dilaksanakan dengan tangkapan seramai 27,960 orang PATI dan 903 orang majikan. Sepanjang tahun 2021, sebanyak 6,877 operasi penguatkuasaan telah dilaksanakan dengan tangkapan sebanyak 22,671 orang PATI dan 389 majikan. Manakala, bermula 1 Januari hingga 17 Februari 2022, JIM Negeri Sabah telah melaksanakan 173 operasi penguatkuasaan melibatkan tangkapan 302 orang PATI daripada pelbagai negara dan lima majikan atas pelbagai kesalahan imigresen.

Bagi memastikan usaha pengusiran dilaksanakan dengan cekap, dan isu kesesakan atau kepadatan di Depot Imigresen khususnya di Negeri Sabah tidak berterusan, Kementerian Dalam Negeri melalui Jabatan Imigresen

Malaysia Negeri Sabah mengambil tindakan secara konsisten seperti berikut:

- (i) melaksanakan pemindahan banduan dari depot berkapasiti tinggi ke depot yang kurang berkapasiti tinggi;
- (ii) menggiatkan usaha pengusiran PATI ke negara asal; dan
- (iii) mengadakan rundingan secara berkala dengan pihak Kedutaan Negara Filipina dan Indonesia bekerjasama bagi mempercepatkan proses penghantaran pulang tahanan ke negara asal.

Jabatan Imigresen telah merekodkan seramai 7, 053 PATI diusir dari empat Depot Imigresen di Negeri Sabah pada tahun 2020. Bagi tahun 2021 seramai 2, 659 orang PATI telah diusir dan pada tahun ini (sehingga 20 Februari 2022) seramai 46 orang PATI telah diusir.

Untuk makluman Ahli Yang Berhormat, perihal pengurusan warga asing di Sabah termasuk masyarakat pelarian telah dibincangkan dalam Jawatankuasa Pengurusan Warga Asing di Sabah (JKPWAS) yang ditubuhkan oleh Kerajaan susulan daripada syor Suruhanjaya Siasatan Diraja (*Royal Commission of Inquiry - RCI*) Mengenai Pendatang Asing di Sabah. Kementerian Dalam Negeri sentiasa peka terhadap isu dokumentasi bagi orang yang tidak berdokumen (*undocumented*) di Sabah. Suka untuk saya tegaskan bahawa perihal pengurusan warga asing di Sabah memerlukan *political will* serta komitmen yang tinggi daripada semua pihak. Ini termasuklah daripada pemimpin politik, ketua-ketua masyarakat dan kaum untuk mencari persamaan dan kesepakatan dalam mendapatkan penyelesaian kepada isu yang telah lama berpanjangan ini.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : PUAN ALICE LAU KIONG YIENG  
[ LANANG ]**

**TARIKH : 02 MAC 2022 (RABU)**

**SOALAN**

**PUAN ALICE LAU KIONG YIENG [ LANANG ]** minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan sebab utama selalu berlakunya kekurangan bekalan minyak masak bersubsidi 1kg di pasaran dan apakah usaha serta merta yang diambil oleh Kementerian supaya bekalan minyak bersubsidi ini sentiasa cukup dan kekal ada di pasaran untuk pengguna terutamanya pengguna di Sarawak.

**JAWAPAN**

**Yang di-Pertua,**

Harga kawalan yang rendah iaitu RM2.50 bagi minyak masak subsidi polibeg 1 kilogram menjadi faktor utama mengapa minyak masak tersebut di sebahagian tempat mengalami kekurangan bekalan. Jurang harga yang ketara di antara minyak masak subsidi polibeg 1 kilogram dengan minyak masak botol 5 kilogram telah menyebabkan minyak masak polibeg tersebut mendapat permintaan yang tinggi di kalangan pengguna.

Walaupun Kerajaan telah menetapkan minyak masak subsidi polibeg 1 kilogram hanya untuk kegunaan isi rumah domestik, peniaga-peniaga kecil dan sederhana turut mengambil peluang untuk menggunakan minyak masak polibeg tersebut bagi mengurangkan kos operasi dalam perniagaan mereka. Pembelian dalam kuantiti yang banyak oleh peniaga dalam satu-satu masa telah mengakibatkan bekalan minyak masak polibeg itu sering kehabisan stok di kedai-kedai runcit dan pasaraya.

Sebagaimana sedia maklum, syarikat-syarikat pembungkus minyak masak diberi kuota pengeluaran bagi minyak masak subsidi polibeg 1 kilogram. Oleh disebabkan permintaan yang tinggi bagi minyak masak polibeg tersebut, di tambah pula *trend* pembelian meningkat semasa musim-musim perayaan, kuota pengeluaran minyak masak polibeg mencapai had lebih awal dari kebiasaan. Ini menyebabkan berlaku gangguan pembekalan di peringkat pemborong terutama menjelang hujung bulan.

Selain itu, harga yang rendah berbanding negara-negara jiran telah menyebabkan minyak masak polibeg di Malaysia menjadi antara barangan yang sering diseludup keluar. Aktiviti penyeludupan tidak dinafikan turut menjadi punca berlaku kekurangan minyak masak subsidi polibeg 1 kilogram di pasaran tempatan.

**Yang di-Pertua,**

Kementerian ini sedang giat menangani isu kekurangan bekalan minyak masak subsidi di pasaran dengan mengambil langkah-langkah seperti berikut:

- i. Mengarahkan pemeriksaan dan pengauditan di setiap peringkat rangkaian pengedaran minyak masak;
- ii. Menjalankan pemeriksaan pematuhan permit ke atas peniaga-peniaga kecil dan pengusaha restoran;
- iii. Membuat risikan ke atas pengilang, pembungkus, pemborong dan peruncit dengan sasaran terpilih yang disyaki menyeleweng minyak masak bersubsidi termasuk risikan ke negara jiran seperti Thailand;
- iv. Menggantungkan kuota dan lesen ke atas syarikat yang didapati terbabit melakukan penyelewengan dan penyeludupan;
- v. Menetapkan had pembelian minyak masak polibeg sebanyak 3 paket untuk memastikan lebih ramai pengguna isi rumah dapat menikmati subsidi yang diberikan oleh Kerajaan; dan
- vi. Mempertingkatkan kerjasama dengan agensi-agensi penguatkuasaan lain seperti Jabatan Kastam Diraja Malaysia (JKDM), Angkatan Tentera Malaysia (ATM), Polis Diraja Malaysia (PDRM) dan Eastern Sabah Security Command (ESSCOM).

Pada tahun ini sehingga 21 Februari 2022, KPDNHEP telah menjalankan 6,355 pemeriksaan ke atas premis-premis yang terbabit dengan urusan minyak masak, 15 kertas siasatan telah dibuka dan 94 premis masih dalam tindakan pengauditan. Setakat ini, 15 syarikat pembungkus telah digantung kuota skim minyak masak (COSS) dan 5 syarikat pemborong telah digantung lesen urusan minyak masak (Lesen Borong CSA).

Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : DATIN PADUKA DR. TAN YEE KEW  
[ WANGSA MAJU ]**

**TARIKH : 02 MAC 2022 (RABU)**

**SOALAN**

**DATIN PADUKA DR. TAN YEE KEW [ WANGSA MAJU ]** minta **MENTERI SUMBER MANUSIA** menyatakan kewujudan peluang-peluang dalam sektor pekerjaan baharu mengikut sektor ekonomi dan jenis pekerjaan dan gaji yang ditawarkan.

**JAWAPAN**

**Tuan Yang Di-Pertua,**

Kerajaan telah memperkenalkan laman web **MYFutureJobs** sejak tahun **2020** sebagai **laman rasmi** dalam **mencari peluang pekerjaan** kepada pencari kerja yang kehilangan pekerjaan, lepasan graduan dan peningkatan kerjaya.

Daripada 1 Januari 2020 sehingga 18 Februari 2022 sebanyak 96,661 majikan berdaftar manakala kekosongan jawatan sebanyak 3,884,972. Daripada jumlah tersebut sehingga kini sebanyak 431,989 kekosongan aktif masih terbuka.

Kementerian ini menyedari bahawa terdapat anjakan atau perubahan terhadap lanskap peluang pekerjaan yang ditawarkan pada masa ini. Ekoran daripada kemajuan ekonomi dan perubahan ke arah Revolusi Perindustrian 4.0 dan pendigitalan, pekerjaan baharu berlandaskan

kemahiran teknologi dan kemahiran sistem maklumat dijangka akan mempunyai permintaan tinggi pada masa hadapan.

Berdasarkan data dan statistik dari laman MYFutureJobs dari 1 Januari 2021 sehingga 24 Februari 2022, sebanyak **11,846 peluang-peluang** dalam sektor pekerjaan baharu atau *emerging occupation* dengan izin telah direkodkan.

Antara **industri atau sektor utama** yang dikenalpasti mendapat **permintaan tinggi** adalah sektor **Komunikasi dan Maklumat, Pembuatan, Pengangkutan, Aktiviti Profesional, Saintifik dan Teknikal** serta **Pendidikan**.

Manakala **pekerjaan baharu** yang kini mendapat **permintaan tinggi** di kalangan majikan adalah ***Data analyst, ICT system analyst, User interface developer, Data Scientist, ICT system architect, Database Developer, Embedded Systems, Software Developer, Research Engineer, Logistics Analyst, ICT Business Analyst, Digital Media Designer, Digital Games Developer*** dan ***Digital Forensics Expert***.

Berdasarkan data pengiklanan yang diperolehi menerusi MYFutureJobs, Kementerian ini melaporkan jawatan-jawatan tersebut **menawarkan gaji** secara umumnya antara **RM5,000 hingga RM10,000 ke atas, bergantung kepada tahap pendidikan, pengalaman dan kemahiran yang dimiliki oleh pencari pekerja**.



**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN M. KULASEGARAN (IPOH BARAT)**

**TARIKH : 2 MAC 2022 (RABU)**

**SOALAN**

**TUAN M. KULASEGARAN (IPOH BARAT) minta MENTERI  
PERPADUAN NEGARA menyatakan :-**

- a) apakah yang telah dilakukan oleh Unit Transformasi Masyarakat India Malaysia (MITRA) untuk menaikkan taraf sosial dan ekonomi kaum India di negara ini dan sejauh manakah kejayaan mereka; dan
- b) mengapakah MITRA dianggap gagal menangani isu masyarakat India.

**JAWAPAN**

**Tuan Yang Di-Pertua,**

1. Penubuhan MITRA adalah bermatlamatkan untuk membantu meningkatkan pembangunan sosioekonomi masyarakat India B40. Bagi tujuan tersebut, MITRA melaksanakan pelbagai program pembangunan sosioekonomi melalui **tiga (3) kluster** iaitu:

- i. Modal Insan,
- ii. Keusahawanan; dan
- iii. Kesejahteraan Sosial.

2. Seramai **992,406 orang** telah **menerima manfaat** hasil dari pelbagai latihan serta bantuan melalui program-program yang telah dilaksanakan bagi tahun 2020 dan 2021, iaitu dalam tempoh MITRA di bawah Kementerian Perpaduan Negara.

3. Pada tahun 2021, Kementerian Perpaduan Negara dengan kerjasama Universiti Sains Malaysia juga telah membangunkan **Pelan Tindakan Masyarakat India (PTMI)** sebagai panduan pelaksanaan program bagi meningkatkan taraf sosioekonomi masyarakat India B40.

4. Bagi memastikan terdapatnya penyelarasan usaha-usaha pembangunan sosioekonomi masyarakat India secara menyeluruh, **kerajaan telah bersetuju menubuhkan Jawatankuasa Kabinet Mengenai Pembangunan Sosioekonomi Masyarakat India yang akan dipengerusikan oleh YAB Perdana Menteri.** Jawatankuasa ini akan diurusetikan oleh Unit Perancangan Ekonomi, Jabatan Perdana Menteri (UPE, JPM).

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : LISAN**

**DARIPADA : YB TUAN WONG HON WAI (BUKIT BENDERA)**

**TARIKH : 2 MAC 2021 (RABU)**

**SOALAN**

**TUAN WONG HON WAI (BUKIT BENDERA)** minta **MENTERI PERUMAHAN DAN KERAJAAN TEMPATAN** menyatakan apakah kemajuan perundangan Penginapan Kediaman Jangka Pendek ataupun *Short Term Residential Accommodation* (STRA) termasuk homestay dan Airbnb yang sedang digariskan dan sama ada ia akan dilesenkan dan seterusnya pengutipan cukai dan penguatkuasaan yang akan dilaksanakan terhadap STRA.

**JAWAPAN**

**Tuan Yang di-Pertua,**

Untuk makluman Ahli Yang Berhormat, Kementerian Perdagangan Antarabangsa dan Industri (MITI) melalui Malaysia Productivity Corporation (MPC) telah menyediakan draf Garis Panduan Penginapan Kediaman Jangka Pendek ataupun *Short Term Residential Accommodation* (STRA). Draf Garis Panduan ini telah dibawa ke Mesyuarat Garis Panduan STRA pada 12 Oktober 2020 di MITI. Kementerian Pelancongan dan Kebudayaan Malaysia (MOTAC) dan Kementerian Perumahan dan Kerajaan Tempatan (KPKT) telah turut dilibatkan untuk meneliti Garis Panduan ini dengan lebih lanjut. Kementerian ini berpandangan bahawa draf Garis Panduan ini perlu diperhalusi dengan lebih mendalam oleh MPC kerana mempunyai implikasi perundangan dan penguatkuasaan. Sekian, terima kasih.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

---

**PERTANYAAN : LISAN**

**DARIPADA : TUAN SIM CHEE KEONG  
[ BUKIT MERTAJAM ]**

**TARIKH : 2 MAC 2022 (RABU)**

**SOALAN**

**TUAN SIM CHEE KEONG [ Bukit Mertajam ]** minta **MENTERI BELIA DAN SUKAN** menyatakan maklumat lanjut senarai nama atlet yang dibayar elaun latihan, jumlah yang diterima sebelum dan selepas penyelarasan elaun terkini, serta senarai atlet yang ditamatkan elaun dan sebabnya.

**JAWAPAN**

**Tan Sri Yang Di Pertua,**

Pihak Kementerian melalui Majlis Sukan Negara (MSN) telah menyusun semula program persediaan atlet ke arah temasya sukan utama bagi tahun 2022 susulan daripada pengumuman Bajet yang telah diumumkan dalam Belanjawan pada 29 Oktober 2021 yang tidak memperuntukkan bajet bagi Program Podium.

Berhubung soalan yang dibangkitkan mengenai senarai nama atlet yang dibayar elaun secara terperinci, maklumat ini adalah maklumat peribadi atlet yang sulit. Walau bagaimanapun pada tahun 2021, seramai 536 atlet di bawah Program Podium dibayar elaun setiap bulan berjumlah sebanyak RM1.148 juta. Setelah penyelarasan dan penyusunan semula Skim Elaun Latihan Atlet pada awal tahun 2022, bilangan atlet adalah seramai 294 atlet termasuk lantikan baru dan naik taraf dengan jumlah elaun sebanyak RM 642,200.00 sebulan.

Untuk makluman YB, atlet-atlet di dalam program MSN tidak digugurkan tetapi mereka tidak ditawarkan dengan kontrak yang baharu. Penilaian ini dibuat berdasarkan kepada prestasi semasa atlet yang dibincangkan secara bersama menerusi Mesyuarat Jawatankuasa Kerja (JKK) yang membabitkan penglibatan Persatuan Sukan Kebangsaan (PSK), Majlis Olimpik Malaysia (MOM), Majlis Paralimpik Malaysia (MPM), Kementerian Pendidikan (KPM) serta agensi-agensi yang berkaitan.

Syarat kelayakan utama penyambungan kontrak atlet adalah berdasarkan prestasi yang dipamerkan sejak tahun 2018 selain tahap kecederaan serta laporan perubatan yang disediakan oleh pakar perubatan oleh ISN. MSN juga mengambil kira pengumuman persaraan dan penarikan diri atlet dari program latihan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN TERESA KOK SUH SIM [ SEPUTEH ]**

**TARIKH : 2 MAC 2022 (RABU)**

**SOALAN**

**PUAN TERESA KOK SUH SIM [ SEPUTEH ]** minta **MENTERI KESIHATAN** menyatakan sama ada hospital Kerajaan menetapkan had tempoh untuk mengeluarkan laporan pemeriksaan badan yang diminta oleh pegawai penyiasat polis ataupun mangsa kes jenayah. Apa yang akan dilakukan oleh Kementerian untuk mengatasi masalah peningkatan kes kelewatan pengeluaran laporan perubatan sehingga menjejaskan proses pendakwaan penjenayah oleh pegawai polis.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) telah menetapkan tempoh bagi penyediaan laporan perubatan bagi hospital berpakar adalah empat (4) minggu dan hospital tanpa pakar adalah dua (2) minggu seperti yang telah dinyatakan di dalam **Garis Panduan Penyediaan Laporan Perubatan di Hospital – hospital dan Institusi Perubatan KKM**.

2. Bagi menambahbaik proses penyediaan laporan perubatan, KKM akan melaksanakan inisiatif **e-Laporan Perubatan melalui sistem HIS@KKM** iaitu. Sistem ini telah dilaksanakan secara perintis di Hospital Raja Permaisuri Bainun, Ipoh dan Hospital Raja Perempuan Zainab II, Kota Bharu. Sistem ini akan diperluaskan ke negeri Sembilan pada tahun 2022 dan lain-lain secara berfasa. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB DATO' MOHD AZIS BIN JAMMAN  
(SEPANGGAR)**

**TARIKH : 2 MAC 2022 (RABU)**

**SOALAN**

**DATUK MOHD. AZIS BIN JAMMAN [ SEPANGGAR ]** minta **MENTERI DALAM NEGERI** menyatakan rancangan menyeluruh Kerajaan bagi jangka pendek, sederhana dan panjang dalam memperkasa dan memperkukuhkan kawalan keselamatan di Sabah khususnya di Pantai Timur Sabah.

**JAWAPAN**

Tuan Yang Di Pertua,

Kerajaan sentiasa komited dalam memperkasa dan memperkukuhkan kawalan keselamatan di Sabah khususnya di Pantai Timur Sabah. Antara pendekatan yang telah diambil oleh Kerajaan melalui *Eastern Sabah Security Command* (ESSCOM) adalah seperti berikut:

- i. Mewujudkan '*Road Check Point*' (RCP) di kawasan strategik dan laluan utama penduduk yang melibatkan anggota PDRM seperti di RCP Sapi Nangoh dan RCP Kalabakan dalam membendung aktiviti penyeludupan PATI, barang kawalan dan sebagainya;
- ii. Melaksanakan Op Benteng bagi mengekang kemasukan PATI dan jenayah rentas sempadan;

- iii. Melaksanakan tiga (3) Op Cegah PATI (OCP) iaitu OCP Utara (Sandakan dan Kudat), OCP Timur (Semporna) dan OCP Selatan (Tawau) yang merangkumi hampir keseluruhan pesisir pantai timur Sabah melibatkan aset laut dari pelbagai agensi di bawah ESSCOM;
- iv. Mempertingkatkan dan menambahbaik kesiap-siagaan anggota dan aset di pos-pos kawalan hadapan khususnya di kawasan 72 laluan tikus yang sering digunakan oleh PATI di sepanjang sempadan ESSZONE; dan
- v. Penguatkuasaan Arahan Perintah Berkurung juga masih diteruskan di Pantai Timur Sabah yang melibatkan tujuh (7) buah daerah iaitu Tawau, Semporna, Kunak, Lahad Datu, Kinabatangan, Sandakan dan Beluran. Ia bertujuan untuk mengawal pergerakan dan mencegah berlakunya jenayah seperti pencerobohan PATI ke dalam negara dan penculikan *Kidnapping For Ransom* (KFR).

Selain itu, bagi perancangan masa hadapan serta tujuan peningkatan keupayaan ESSCOM, KDN melalui *Rolling Plan* Ketiga (RP-3), Rancangan Malaysia Kedua Belas (RMKe-12), Tahun 2023 telah mengemukakan permohonan sebanyak RM483 juta yang meliputi pembinaan kompleks pentadbiran dan perumahan ESSCOM, pos keselamatan dan operasi hadapan (*Forward Operation Base*) serta perolehan radar dan pemasangan kamera jarak jauh untuk tujuan pengesanan dan pemantauan keselamatan di ESSZONE. Ini adalah tambahan kepada kelulusan pembinaan tiga (3) pos kawalan keselamatan iaitu Pos Manalunan, Pos Simanggaris dan Pos Kuala Meruap.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN SU KEONG SIONG [ KAMPAR ]**

**TARIKH : 02 MAC 2022 (RABU)**

**SOALAN**

**TUAN SU KEONG SIONG [ KAMPAR ]** minta **MENTERI SUMBER MANUSIA** menyatakan langkah-langkah yang diambil untuk mengkaji semula jumlah gaji minima yang berpatutan pada masa kini. Adakah Kerajaan berhasrat untuk meningkatkan gaji minima ke tahap RM1,500 sebulan.

**JAWAPAN**

**Tuan Yang di-Pertua,**

Seksyen 25 Akta Majlis Perundingan Gaji Negara 2011 [Akta 732] memperuntukkan bahawa kajian semula perintah gaji minimum hendaklah dilaksanakan sekurang-kurangnya sekali dalam setiap dua tahun. Memandangkan perintah gaji minimum 2020 dikuatkuasakan bermula pada 1 Februari 2020, maka kajian semula Perintah ini perlu dilaksanakan sebagaimana keperluan undang-undang.

Dalam melaksanakan Kajian Semula perintah gaji minimum 2020, langkah-langkah yang telah diambil adalah seperti yang berikut:

- (i) menjalankan kajian bagi menilai impak berkaitan perintah gaji minimum 2020 kepada majikan dan pekerja;

- (ii) mengadakan sesi perundingan awam melibatkan persatuan majikan/ majikan, kesatuan sekerja/ pekerja, badan bukan kerajaan dan orang awam bagi mendapatkan pandangan berkaitan kesan perintah gaji minimum 2020 serta gaji minimum akan datang; dan
- (iii) membuat analisa dan kajian terhadap data-data sosioekonomi negara semasa seperti pendapatan garis kemiskinan, penengah gaji (keupayaan majikan untuk membayar gaji), kadar pengangguran, produktiviti buruh dan perubahan indeks harga pengguna yang mencerminkan kos sara hidup. Indikator-indikator sosioekonomi ini akan mencerminkan pasaran tenaga kerja semasa.

Setelah meneliti semua input dan dapatan kajian, Jawatankuasa Teknikal Perundingan Gaji Negara akan membuat syor tentang kadar dan liputan gaji minimum kepada Majlis Perundingan Gaji Negara. Majlis Perundingan Gaji Negara akan menimbang syor ini menggunakan pendekatan seimbang (*balanced approach*) dengan mengambil kira kepentingan pihak majikan, pekerja dan kerajaan sebelum mengemukakan syor untuk pertimbangan dan persetujuan Kerajaan.

Kerajaan akan menimbang kadar gaji minima yang dapat meningkatkan pendapatan asas pekerja terutamanya pekerja kategori paling bawah yang terkesan dengan peningkatan kos sara hidup semasa.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN MUHAMMAD BAKHTIAR BIN WAN CHIK  
[BALIK PULAU]**

**TARIKH : 02 MAC 2022 (RABU)**

**SOALAN**

**TUAN MUHAMMAD BAKHTIAR BIN WAN CHIK [ BALIK PULAU ]** minta **MENTERI SUMBER MANUSIA** menyatakan perancangan Kementerian terhadap kadar penyertaan buruh apabila Jabatan Statistik Negara menyatakan kadar penyertaan tenaga buruh (KPTB) wanita masih rendah pada kadar 55.3% pada 2020 jika dibandingkan dengan negara Asia Tenggara lain seperti Singapura (69.7%) dan Thailand (66.8%).

**JAWAPAN**

**Tuan Yang Di Pertua,**

Kerajaan telah dan akan melaksanakan beberapa inisiatif bagi tujuan meningkatkan kadar penyertaan tenaga buruh termasuk golongan wanita dalam pasaran pekerjaan.

Inisiatif-inisiatif tersebut adalah seperti berikut:

- i. Sistem perantisan melalui Sistem Latihan Dual Nasional telah membuka seluas-luasnya program TVET kepada golongan wanita dalam memastikan mereka terlibat dalam latihan TVET seterusnya meningkatkan penyertaan wanita dalam tenaga kerja negara. Sehingga Disember 2021, sebanyak 20,638 Sijil Kemahiran Malaysia telah dianugerahkan kepada wanita yang telah berjaya mengikuti program ini.
- ii. SPS Prihatin Wanita adalah inisiatif di bawah Skim Keselamatan Sosial Pekerjaan Sendiri khususkan kepada semua wanita yang bekerja sendiri daripada pelbagai sektor tidak formal. Berdasarkan statistik sehingga 31 Disember 2021, seramai **21,350 iaitu 35.58%** orang wanita yang bekerja sendiri telah dilindungi di bawah skim ini dan melibatkan jumlah caruman sebanyak **RM4.97 juta**. Insentif yang sama turut akan dipanjangkan bagi pengambilan pekerja golongan wanita yang telah menganggur melebihi tempoh setahun, ibu tunggal dan suri rumah dalam Program JaminKerja-Insentif Penggajian di bawah Sistem Insurans Pekerjaan yang dijangka akan memanfaatkan 300,000 pencari kerja di seluruh negara.

- iii. **PENJANA HRDCorp** iaitu *Place & Train, B40 Development, SME Development, Industrial Revolution 4.0* dan **Gerak Insan Gemilang (GIG)**. Skim-skim ini diwujudkan untuk membantu rakyat termasuk golongan wanita mendapat penempatan pekerjaan, *self-employed* serta menambah dan meningkatkan kemahiran mereka. Sehingga Februari 2022, PSMB telah meluluskan sebanyak **85,527 pelatih** bagi mengikuti skim-skim yang melibatkan penempatan pekerjaan dan pekerjaan sendiri ini. Daripada jumlah tersebut, seramai 34,400 iaitu 40% adalah terdiri daripada pelatih wanita.
- iv. HRDCorp sedang membangunkan *Housewives Enhancement and Reactivate Talent Scheme* (HEARTS) yang akan menyediakan platform latihan kemahiran kepada wanita termasuk ibu tunggal yang tidak bekerja untuk menjana pendapatan. Inisiatif ini akan meningkatkan kadar penyertaan pekerjaan dalam sektor formal dan tidak formal khusus untuk wanita bagi meningkatkan taraf ekonomi mereka. Sesi libat urus dengan pelbagai pihak sedang dijalankan bagi merealisasikan program ini. Setiap peserta yang akan menyertai program ini akan diberi latihan, peluang menjana pendapatan dan penempatan pekerjaan.
- v. **Aktiviti latihan, perkembangan latihan peningkatan kemahiran dan latihan kemahiran semula** yang dilaksanakan oleh Pembangunan Sumber Manusia Berhad. Setakat 2021, sebanyak **588,686 tempat latihan telah diluluskan meliputi 16 sektor daripada 35 bidang kemahiran**. Berdasarkan statistik ini, lebih daripada **40% wanita telah mengambil bahagian**.

- vi. **Program Penglibatan Kembali Wanita Dalam Kerjaya**, program usahasama TalentCorp dengan syarikat GLC/GLIC serta sektor swasta terkemuka negara untuk menggalakkan golongan profesional wanita yang keluar sementara daripada sektor pekerjaan kembali bekerja; dan
- vii. Menggalakkan para majikan untuk melaksanakan **Work-Life Practices** ke arah keseimbangan yang lebih baik antara integrasi kerja dan kehidupan serta menyediakan persekitaran kerja yang mesra keluarga. **Work-Life Practices** telah diklasifikasikan kepada tiga (3) kategori utama iaitu **Flexible Work Arrangements (FWAs)** merujuk kepada aturan kerja yang lebih fleksibel, **Work-Life Benefits** iaitu menyokong pekerja dalam mencapai keseimbangan antara kerja dan kehidupan, serta **Family-Friendly Facilities** merujuk kepada kemudahan yang ditaja oleh organisasi / majikan di tempat kerja untuk memberi sokongan kepada ibu bapa yang bekerja.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN TEH KOK LIM [ TAIPING ]**

**TARIKH : 2 MAC 2022 (RABU)**

**SOALAN**

**TUAN TEH KOK LIM [ TAIPING ]** minta **MENTERI KESIHATAN** menyatakan jumlah kes operasi yang tertangguh akibat COVID-19 dan usaha pihak Kementerian untuk mengatasi masalah tersebut dan juga jumlah kes yang terkorban sementara menunggu giliran operasi untuk setiap tahun 2019 dan 2020 serta 2021.

**JAWAPAN**

Tuan Yang di-Pertua,

1. Walaupun negara dilanda pandemik COVID-19 selama dua tahun ini, rawatan bagi kes-kes bukan COVID-19 terutama yang memerlukan rawatan pembedahan segera dan kes-kes kecemasan tetap diteruskan melalui pembukaan dewan bedah kecemasan di hospital-hospital KKM.
2. Dalam masa yang sama pengurusan pesakit bukan COVID-19 juga diberi perhatian melalui mobilisasi tenaga kerja di hospital bukan COVID-19 serta hospital-hospital daerah melalui pelaksanaan inisiatif **hospital kluster** dan **inisiatif pembedahan global**.
3. Pembedahan yang ditangguhkan semasa COVID-19 pada tahun 2020 dan 2021 adalah kes elektif. Kes kecemasan dan kes pembedahan kanser diberi keutamaan untuk pembedahan agar morbiditi dan mortaliti dapat dikurangkan.

4. Bagi menangani isu kes tertangguh, beberapa inisiatif turut dilakukan iaitu:

- (i) Penyumberluaran perkhidmatan kepada hospital swasta sejak awal pandemik lagi.
- (ii) Pembukaan semula dewan-dewan bedah elektif di hospital-hospital KKM secara berperingkat bermula pada bulan Oktober 2021.
- (iii) Pada bulan Disember 2021, inisiatif pembedahan elektif hari Sabtu telah dimulakan dari jam 8 pagi hingga 5 petang di hospital-hospital berpakar di seluruh negara;
- (iv) Selain dari itu, KKM turut meningkatkan jumlah pelaksanaan pembedahan di hospital-hospital KKM di seluruh negara melalui inisiatif *mass surgery* melibatkan pelbagai disiplin perkhidmatan; dan
- (v) Kerjasama awam-swasta dalam menjalankan pembedahan seperti yang telah dijalankan baru-baru ini di Hospital Selayang di mana pihak hospital universiti dan juga swasta telah membantu dalam menjalankan pembedahan secara pro-bono.

5. Jumlah kes pembedahan yang tertangguh sehingga 30 September 2021 adalah 53,785 manakala sehingga 31 Disember 2021 adalah 33,111 dimana pengurangan adalah sebanyak 38.4% berbanding bulan September 2021. Melalui pelaksanaan inisiatif sedia ada, kes yang tertangguh dijangka akan dapat diselesaikan tidak lama lagi.

Sekian, terima kasih.



**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : TUAN STEVEN CHOONG SHIAU  
YOON [ TEBRAU ]**

**TARIKH : 2 MAC 2022 (RABU)**

**SOALAN**

**TUAN STEVEN CHOONG SHIAU YOON [ TEBRAU ]** minta **MENTERI KESIHATAN** menyatakan apakah kriteria dan garis panduan dalam membuka atau menaik taraf klinik kesihatan di suatu tempat, sebagai contoh Klinik Kesihatan Kg. Cahaya Baru Masai yang sudah lama tidak boleh menampung jumlah orang yang datang untuk menerima rawatan.

**JAWAPAN**

Tuan Yang di-Pertua,

1. Kementerian Kesihatan Malaysia (KKM) mengambil kira beberapa indikator untuk pembukaan atau naik taraf sesuatu klinik kesihatan. Ini termasuklah keperluan setempat, seperti beban kedatangan harian pesakit ke klinik kesihatan dan kepadatan penduduk di dalam kawasan liputan terbabit.
2. Bagi Klinik Kesihatan (KK) Cahaya Baru, Masai, Johor, beban kedatangan adalah lebih dari 200 pesakit sehari. Klinik Kesihatan ini dinaik taraf kepada klinik kesihatan jenis 5 pada tahun 2013.
3. Pada masa ini, klinik ini disokong oleh perkhidmatan Klinik Kesihatan Jenis 2 Taman Chendana, yang ditambah baik melalui Rancangan Malaysia ke-12 (*Rolling Plan* 1). KK baharu nanti ini adalah lebih besar, mampu menampung kapasiti pesakit lebih 800 orang sehari dan terletak 6 km dari KK Cahaya Baru.
4. Dengan pembinaan KK baharu ini, kedatangan pesakit ke KK Cahaya Baru dapat dikurangkan memandangkan pesakit di kawasan ini boleh mendapatkan rawatan daripada klinik lain iaitu KK Masai dan KK Chendana, yang kesemuanya terletak berdekatan, dalam lingkungan 5 hingga 6 km sahaja.
5. KKM akan terus berusaha untuk menaik taraf semua fasiliti kesihatan termasuk klinik kesihatan dan klinik desa mengikut keperluan setempat dan mengikut kemampuan kewangan Kerajaan dari semasa ke semasa.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DR. AZMAN BIN ISMAIL [ KUALA KEDAH ]**

**TARIKH : 2 MAC 2022 (RABU)**

**SOALAN**

**DR. AZMAN BIN ISMAIL [ KUALA KEDAH ]** minta **MENTERI KESIHATAN** menyatakan kesan-kesan buruk (adverse effects) selepas vaksinasi yang direkodkan di Malaysia setakat ini. Berapa kes yang menyebabkan kematian atau ilat kekal.

**JAWAPAN**

Tuan Yang di-Pertua,

1. Seperti vaksin dan ubat-ubatan lain, vaksin COVID-19 juga boleh menyebabkan kesan sampingan. Walau bagaimanapun, kebanyakan kesan sampingan yang dilaporkan adalah ringan dan sederhana seperti sakit di tempat suntikan, demam, pening serta keletihan dan biasanya akan pulih dalam masa beberapa hari.
2. Selepas 64.7 juta dos vaksin COVID-19 diberikan pada 11 Februari 2022, Bahagian Regulatori Farmasi Negara (NPRA) telah menerima sejumlah 24,990 laporan Kesan Advers Susulan Imunisasi (AEFI) bersamaan kadar pelaporan 386 laporan bagi setiap juta dos. Majoriti kes yang dilaporkan adalah tidak serius dan kebiasaannya akan sembuh dalam tempoh beberapa hari tanpa atau dengan rawatan.
3. Melalui pemantauan NPRA juga, kes serius jarang dilaporkan. Sehingga 11 Februari 2022, sejumlah 1,747 laporan kesan sampingan

serius termasuk kes kematian telah diterima iaitu bersamaan 27 laporan bagi setiap sejuta dos. Kes kematian di kalangan penerima vaksin COVID-19 yang diterima pula adalah 592 laporan dengan kadar 9.2 laporan bagi setiap sejuta dos. Tiada kes yang mengakibatkan kecacatan kekal diterima sehingga kini.

4. Walau bagaimanapun, perlu diingatkan bahawa statistik yang dinyatakan adalah berdasarkan jumlah laporan AEFI yang diterima yang mana hubungkait kesan advers dengan vaksin masih belum lagi dinilai dan disahkan. Untuk makluman, NPRA menerima semua jenis laporan AEFI yang disyaki atau berkemungkinan disebabkan vaksin.

5. Semua kes serius yang dilaporkan akan disiasat secara menyeluruh oleh pasukan penyiasat yang ditubuhkan di fasiliti kesihatan yang berkenaan. Laporan penyiasatan ini seterusnya akan diserahkan kepada Jawatankuasa Farmakovigilans Khas Vaksin COVID-19 (JFK) untuk penilaian hubungkait antara kesan sampingan dan vaksin diambil berdasarkan hasil penyiasatan yang telah dijalankan. *Literature review* juga akan dijalankan bagi melihat laporan yang berkaitan di peringkat global. Hasil penilaian pihak JFK akan dimaklumkan kepada fasiliti kesihatan.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : DATO' SRI TIONG KING SING [ BINTULU ]**

**TARIKH : 2 MAC 2022 (RABU)**

**SOALAN**

**DATO' SRI TIONG KING SING [ BINTULU ]** minta **MENTERI KESIHATAN** menyatakan :-

- (a) jumlah keseluruhan dos vaksin COVID-19 yang dibeli dan harganya serta jumlah dos vaksin keluaran Pfizer yang dibeli dan jumlah pembaziran vaksin Pfizer yang tidak digunakan; dan
- (b) adakah pihak Kementerian sedia melaksanakan audit terhadap pembaziran vaksin keluaran Pfizer yang tidak digunakan dan apakah sebab-sebab pembaziran vaksin berlaku?

**JAWAPAN**

Tuan Yang di-Pertua,

1. Sebanyak **87.9 juta dos** vaksin untuk kegunaan dos lengkap dan dos penggalak bagi populasi dewasa dan remaja telah ditempah oleh KKM melalui Fasilitas COVAX dan rundingan terus bersama beberapa syarikat pengeluar vaksin COVID-19 iaitu Pfizer, AstraZeneca, Sinovac, Cansino dan Gamaleya yang melibatkan implikasi kewangan sebanyak **RM4.64 billion** meliputi kos perolehan dan logistik vaksin.
2. Walau bagaimanapun, perjanjian bersama pihak **Gamaleya** telah **null and void** pada **23 November 2021** dan dikeluarkan daripada portfolio perolehan vaksin COVID-19 memandangkan pihak pengeluar gagal mendapatkan kelulusan PBKD. Selanjutnya, KKM juga telah membuat perolehan secara rundingan terus bersama Pfizer (Malaysia) Sdn. Bhd. bagi pembekalan vaksin COVID-19 (paediatric) sebanyak **6.6 juta dos** yang meliputi **3.3 juta populasi kanak-kanak**. Sehubungan itu, kuantiti sebenar vaksin yang telah ditempah oleh KKM untuk kegunaan populasi dewasa, remaja dan kanak-kanak tanpa mengambil kira vaksin Gamaleya adalah sebanyak **88.1 juta dos** dengan anggaran kos berjumlah **RM4.72 bilion**.
3. Memandangkan Kerajaan Malaysia terikat dengan *Non Disclosure Agreement* (NDA) iaitu syarat kerahsiaan yang ditetapkan syarikat pengeluar vaksin, maklumat-maklumat terperinci setiap perjanjian tidak boleh didedahkan termasuklah harga vaksin. Walau bagaimanapun, kos perolehan bagi setiap jenis vaksin telah dijelaskan dalam Prosiding Jawatankuasa Kira-Kira Wang Negara (PAC), Mesyuarat Khas Parlimen Keempat Belas yang diadakan pada 2 Ogos 2021.
4. Jumlah dos vaksin yang telah diperoleh secara rundingan terus bersama Pfizer (Malaysia) Sdn. Bhd. adalah sebanyak **44,799,300 dos** untuk kegunaan populasi dewasa dan remaja, dan **6,600,000 dos** untuk kegunaan kanak-kanak.

5. Berkenaan pembaziran vaksin COVID-19 keluaran Pfizer, buat masa ini, Kementerian Kesihatan masih memantau dan menyemak secara terperinci jumlah kerugian disebabkan bekalan vaksin yang rosak serta puncanya. Antara punca pembaziran vaksin COVID-19 di Pusat Pemberian Vaksin (PPV) dan Pusat Simpanan Vaksin (PSV) adalah disebabkan oleh penyimpangan suhu melebihi julat dan tempoh masa yang dibenarkan semasa dalam pengedaran atau semasa simpanan stok atas pelbagai faktor seperti kerosakan peti sejuk, gangguan bekalan elektrik dan sebagainya sehingga menjejaskan aspek kualiti, keselamatan dan keberkesanan vaksin tersebut.

6. Maklumat dan data kerugian ini perlu diteliti secara terperinci bagi memastikan ia adalah betul dan tepat sebelum pelaporan dikeluarkan. Proses kompilasi dan verifikasi maklumat sedang dijalankan secara berterusan sehingga Program Imunisasi COVID-19 Kebangsaan (PICK) selesai.

7. KKM sentiasa komited dalam memastikan stok vaksin COVID-19 digunakan secara optimum. Pemantauan dan penyeliaan secara berterusan dilaksanakan ke atas semua fasiliti yang menyimpan stok vaksin COVID-19 bagi memastikan fasiliti tersebut sentiasa mematuhi prosedur kerja dan garis panduan pengurusan rangkaian sejuk.

8. Untuk makluman juga, pihak Jabatan Audit Negara sedang melaksanakan pengauditan terhadap pengurusan PICK di peringkat KKM dan negeri meliputi peruntukan, perbelanjaan, pengurusan PPV, pencapaian program serta pengurusan produk vaksin COVID-19.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN MOHAMAD B. SABU (KOTA RAJA)**

**TARIKH : 2 MAC 2022 (RABU)**

**SOALAN**

**TUAN HAJI MOHAMAD BIN SABU [ KOTA RAJA ]** minta **MENTERI DALAM NEGERI** menyatakan sejauh manakah perancangan pihak Kerajaan untuk jangka masa sederhana dan jangka masa panjang dalam meningkatkan perolehan aset bagi mengawasi perairan negara khususnya berkait dengan Agensi Penguatkuasaan Maritim rentetan daripada sempadan laut negara yang luas.

**JAWAPAN**

Tuan Yang Di Pertua,

Agensi Penguatkuasaan Maritim Malaysia (APMM) telah membangunkan Pelan Perancangan Strategik Maritim Malaysia 2040 bagi memacu hala tuju serta merangka pelan peningkatan keupayaan dan aset maritim untuk tempoh jangka masa pendek dan jangka masa panjang secara holistik.

Bagi mempertingkatkan tahap kesiapsiagaan, APMM sentiasa berusaha untuk meningkatkan perolehan aset untuk mengawal perairan negara menerusi permohonan projek pembangunan pada setiap *Rolling Plan* (RP) Rancangan Malaysia seperti berikut:

- a) Di bawah *Rolling Plan* Pertama (RP-1) Tahun 2021 dan *Rolling Plan* Kedua (RP-2) Tahun 2022 Rancangan Malaysia Ke-12, pihak APMM telah diluluskan projek pembangunan yang



melibatkan kerja menaik taraf jeti operasi, perolehan *floating jetty*, perolehan kapal *offshore patrol vessel* (OPV), perolehan helikopter medium lift, dan perolehan *multi purpose mission ship* (MPMS); dan

- b) Di bawah *Rolling Plan* Ketiga (RP-3) Tahun 2023, APMM meneruskan usaha bagi menambah bilangan aset yang diperlukan dalam membantu APMM meningkatkan pengoperasian dan mengawal keselamatan di perairan negara dengan membuat permohonan projek seperti perolehan *maritime surveillance aircraft*, perolehan kapal ronda generasi baru (NGPC), perolehan bot pemintas, perolehan kenderaan pangkalan hadapan carilamat (PHC) serta perolehan sistem pengawasan laut (SWASLA) di Pantai Timur Semenanjung Malaysia dan Sarawak.

Selaras dengan Pelan Perancangan Strategik Maritim Malaysia 2040, Kerajaan mensasarkan menjelang tahun 2040, APMM akan memiliki sebanyak 116 kapal ronda (96 buah kapal bersaiz sederhana dan 20 buah bersaiz besar), 228 bot yang bersaiz 20 meter ke bawah (95 bot pemintas dan 133 *Rigid Hull Inflated Boat*-RHIB), 27 pesawat (15 pesawat helikopter dan 12 pesawat sayap kaku - *fixed wing*) dan Sistem Pengawasan Laut (SWASLA) yang meliputi keseluruhan kawasan Zon Maritim Malaysia.

**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS TAHUN 2022**

**PERTANYAAN : JAWAB LISAN**

**DARIPADA : TUAN SYED IBRAHIM BIN SYED NOH  
[LEDANG]**

**TARIKH : 02 MAC 2022 (RABU)**

**SOALAN**

**TUAN SYED IBRAHIM BIN SYED NOH [ LEDANG ]** minta **MENTERI SUMBER MANUSIA** menyatakan secara terperinci berkenaan impak pandemik COVID-19 kepada sektor TVET dan garis masa realistik bagi melihat perkembangan positif dalam usaha pemerkasaan pembangunan TVET negara.

**JAWAPAN**

**Tuan Yang di-Pertua,**

Penularan wabak COVID-19 telah menyebabkan perubahan dan memberi impak ke atas ekosistem pelaksanaan program berteraskan Pendidikan dan Latihan Teknikal dan Vokasional (TVET).

Dalam persekitaran norma baharu akibat pandemik Covid-19, ianya memberi kesan langsung dan cabaran kepada sektor TVET seperti penutupan institusi semasa tempoh Perintah Kawalan Pergerakan, pelaksanaan pengajaran dan pembelajaran secara fizikal tidak dapat diteruskan, amali dan praktikal tidak dapat dilaksanakan.

Rentetan itu, pelbagai inisiatif khususnya melalui Majlis Pendidikan Teknikal dan Latihan Vokasional bagi memperkasa pembangunan TVET negara selari dengan strategi di dalam Rancangan Malaysia ke 12. Sebagai langkah praktikal dan realistik pembangunan TVET, Kerajaan telah membuat perancangan yang bersesuaian dengan situasi norma baharu pandemik COVID-19 antaranya :

- i. penyusunan semula takwim akademik;
- ii. pelaksanaan pengajaran dan pembelajaran secara hibrid;
- iii. menambah baik struktur kemudahan teknologi digital dalam pelaksanaan pengajaran dan pembelajaran;
- iv. pengubahsuaian tempoh dan mode latihan industri;
- v. mempertingkat kemahiran pensyarah; dan
- vi. program *reskilling* dan *upskilling* kepada graduan.

Kerajaan melihat proses pemerikasaan TVET sebagai proses yang berterusan. Kerajaan melalui Jabatan dan Agensi berkaitan TVET memainkan peranan aktif dalam merancang agenda pemerikasaan dan pelaksanaan TVET secara komprehensif.

Di antara inisiatif yang digariskan di dalam Pelan Pelaksanaan Dasar RMKe-12 ialah Mempertingkatkan Program TVET serta memperkukuh pembudayaan Program Sepanjang Hayat; Memperkasa TVET melalui pembelajaran Digital; Menangani Pertindihan Tadbir urus TVET dengan merombak sistem tadbir urus TVET, mempromosi jenama TVET, meningkatkan kualiti program dan mewujudkan pangkalan data TVET.

Usaha memperkasa TVET dan menambah baik ekosistem TVET negara turut dilaksanakan melalui penubuhan Majlis TVET Negara dan telah meluluskan 6 inisiatif utama iaitu:

- i. Merangka model pembiayaan mampan
- ii. Membangunkan polisi untuk menggalakkan penyertaan industri melalui *Government-Industry TVET Coordination Body*
- iii. Mewujudkan pelan penjenamaan TVET nasional
- iv. Menubuhkan *TVET Collaboration Hub*
- v. Mewujudkan polisi penyelarasan penawaran program TVET melalui inisiatif Rasionalisasi Program TVET
- vi. Membangunkan *One Stop TVET Data Centre*

Garis masa realistik bagi melihat perkembangan positif dalam usaha pemerkasaan pembangunan TVET negara dijangka dapat direalisasikan menjelang penghujung tahun 2025 selari dengan Rancangan Malaysia ke 12.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB PUAN KASTHURIRAANI A/P PATTO  
(BATU KAWAN)**

**TARIKH : 2 MAC 2022 (RABU)**

**SOALAN**

**PUAN KASTHURIRAANI A/P PATTO [ BATU KAWAN ]** minta **MENTERI DALAM NEGERI** menyatakan bilangan permohonan, kelulusan dan penolakan kewarganegaraan dari pemohon di bawah umur 18 tahun (bayi dan kanak-kanak), ibu-ibu warganegara Malaysia yang melahirkan anak di luar negara, pemain bola sepak atau atlit lain dan permohonan kewarganegaraan yang lain serta apakah dasar dan polisi Kerajaan berhubung penganugerahan kewarganegaraan bagi pemain bola sepak, selebriti serta pasangan kepada VIP berbanding dengan beribu permohonan kanak-kanak, lelaki, wanita, warga emas serta permohonan ibuibu warganegara Malaysia untuk anak mereka yang lahir di luar negara yang sudah lama menunggu untuk respon atau kelulusan permohonan mereka yang lengkap dokumentasi mereka.

**JAWAPAN**

Tuan Yang Di Pertua,

Berdasarkan rekod Jabatan Pendaftaran Negara (JPN) dari tahun 2013 hingga 15 Februari 2022, sebanyak **56,792 permohonan** kewarganegaraan yang diterima untuk individu di bawah umur 18 tahun dan dari jumlah itu, sejumlah **6,991 permohonan** kewarganegaraan telah diluluskan dan **19,958 permohonan** telah ditolak.

Bagi tempoh yang sama, sejumlah **4,870 permohonan** kewarganegaraan yang diterima untuk individu dilahirkan di luar negara yang mempunyai ibu bertaraf warganegara berkahwin dengan bapa bertaraf bukan warganegara dan dari jumlah itu, sejumlah **117 permohonan** kewarganegaraan telah diluluskan dan **1,728 permohonan** telah ditolak.

Manakala bagi tempoh yang sama, sejumlah **61,716 permohonan** kewarganegaraan yang diterima untuk perkara-perkara selain perkara yang telah disebutkan dan dari jumlah itu, sejumlah **20,315 permohonan** kewarganegaraan telah diluluskan dan **16,215 permohonan** telah ditolak.

Untuk makluman Ahli Yang Berhormat, penganugerahan kewarganegaraan Malaysia kepada individu bertaraf bukan warganegara merupakan anugerah tertinggi dan hak eksklusif Kerajaan Persekutuan yang tidak ditawarkan dan diberikan dengan sewenang-wenangnya. Dalam mempertimbangkan permohonan kewarganegaraan Malaysia, beban untuk membuktikan kelayakan untuk dianugerahkan kewarganegaraan Malaysia ini pula adalah di bawah tanggungjawab setiap pemohon dan proses pertimbangan adalah tertakluk kepada syarat-syarat di bawah Bahagian III, Perlembagaan Persekutuan, Kaedah-Kaedah Kewarganegaraan 1964 [L.N.82/1964] serta perundangan berkaitan yang berkuatkuasa dalam isu pendaftaran perkahwinan, pengangkatan, kesahtarafan anak, dan peraturan-peraturan imigresen. Fakta dan dokumen bukti yang dikemukakan oleh setiap pemohon akan diteliti mengikut giliran yang sewajarnya sebelum keputusan dikeluarkan. Sehubungan dengan itu, tiada tempoh tertentu yang ditetapkan bagi pengeluaran keputusan dan ia berbeza-beza mengikut keperluan kes.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS**

**PERTANYAAN : LISAN**

**DARIPADA : TUAN LIM LIP ENG [ KEPONG ]**

**TARIKH : 2 MAC 2022 (RABU)**

**SOALAN**

**TUAN LIM LIP ENG [ KEPONG ]** minta **MENTERI KESIHATAN** menyatakan adakah mesyuarat Ahli-ahli Parlimen Kerajaan di Jalan Bellamy pada 3 Julai 2021, di Wisma Perwira pada 5 Julai 2021 dan di Wisma Perwira pada 1 Ogos 2021 ketika tempoh total *lockdown* menyalahi Akta Pencegahan dan Pengawalan Penyakit Berjangkit 1988. Berapa jumlah kompaun bagi kesalahan melanggar Prosedur Operasi Standard di bawah akta tersebut yang telah dikeluarkan sejak tahun 2020.

**JAWAPAN:**

Tuan Yang di-Pertua,

1. Untuk makluman Ahli Yang Berhormat, pihak KKM tidak menerima sebarang aduan daripada mana-mana pihak berhubung perjumpaan yang dimaksudkan. Oleh yang demikian, tidak dapat dipastikan sekiranya telah berlaku pelanggaran kepada mana-mana SOP berhubung perkara ini. Walau bagaimanapun, ingin ditegaskan bahawa KKM tidak berkompromi terhadap sebarang ketidakpatuhan SOP yang dilakukan oleh mana-mana pihak tanpa mengira darjat dan kedudukan.
2. Merujuk kepada jumlah kompaun pula, kompaun yang telah dikeluarkan bagi kesalahan melanggar Prosedur Operasi Standard di bawah akta dan peraturan Pencegahan dan Pengawalan Penyakit Berjangkit semenjak 1 April 2020 sehingga 14 Februari 2022 adalah 217,301 kompaun dan sebanyak 102,644 kompaun telah dibayar dengan nilai RM87.6 juta. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB TUAN LARRY SOON @ LARRY SNG WEI  
SHIEN [ JULAU ]**

**TARIKH : 02 MAC 2022 (RABU)**

**SOALAN**

**TUAN LARRY SOON @ LARRY SNG WEI SHIEN [ JULAU ]** minta  
**MENTERI DALAM NEGERI** menyatakan :-

(a) berapa jumlah anggaran pekerja buruh asing tanpa dokumentasi yang sah masih bekerja di dalam negara, nyatakan secara spesifik pecahan sektor bidang kerja yang mereka ceburi di dalam pasaran kerja; dan

(b) usaha pihak Kementerian dalam mengenal pasti atau mencari pekerja buruh asing tanpa dokumen yang sah yang masih bekerja di dalam negara serta tindakan Kementerian dalam membantu mereka untuk memperoleh dokumentasi yang sah.



**JAWAPAN**

Tuan Yang Di Pertua,

Untuk makluman Ahli Yang Berhormat, data berkenaan buruh asing di Malaysia adalah berdasarkan kepada jumlah Pas Lawatan Kerja Sementara (PLKS) yang dikeluarkan oleh Jabatan Imigresen Malaysia. Justeru, hanya data buruh asing sahaja yang direkodkan oleh Kerajaan. Merujuk kepada soalan Ahli Yang Berhormat, Kerajaan telah melaksanakan Pelan Rekalibrasi PATI yang mempunyai dua komponen utama iaitu Program Rekalibrasi Pulang mulai 16 November 2020 hingga 30 Jun 2022 dan Program Rekalibrasi Tenaga Kerja mulai 16 November 2020 hingga 31 Disember 2021. Pelan ini diperkenalkan untuk mencapai empat objektif berikut:

- (i) pertama, merekodkan pendataan PATI di Malaysia untuk tujuan perancangan penguatkuasaan;
- (ii) kedua, mencegah penularan wabak COVID-19 dalam kalangan PATI;
- (iii) ketiga, membantu memulihkan pembangunan ekonomi negara dengan membekalkan tenaga kerja yang berdokumen; dan
- (iv) keempat menghapuskan amalan dan risiko pemerdagangan manusia, penyeludupan migran dan buruh paksa.

Sehingga 21 Februari 2022, bagi Program Rekalibrasi Pulang yang membenarkan PATI pulang ke negara asal secara sukarela, seramai 219,383 PATI telah berdaftar. Daripada jumlah tersebut, 189,046 PATI telah pulang ke negara asal yang menyumbang kepada hasil negara melalui kutipan kompaun dan Pas Khas sebanyak RM105,367,300.00.

## **SOALAN NO : 92**

Manakala bagi Program Rekalisasi Tenaga Kerja yang bertujuan untuk meregularisasikan PATI sebagai pekerja asing yang sah, seramai 418,414 PATI telah berdaftar. Daripada jumlah tersebut seramai 232,688 PATI telah hadir untuk verifikasi di Jabatan Imigresen Malaysia, manakala baki 185, 726 PATI sedang dalam urusan tapisan. Sehingga 21 Februari 2022, Kerajaan telah menjana hasil sebanyak RM51,643,893.50 daripada pelaksanaan Program Rekalisasi Tenaga Kerja.

Dengan mengambil kira jumlah keseluruhan pendaftaran PATI di bawah Pelan Rekalisasi PATI, Kerajaan telah berjaya merekodkan maklumat 637, 797 orang PATI melalui Program Rekalisasi Pulang dan Program Rekalisasi Tenaga Kerja. Data PATI yang direkodkan ini lengkap dengan maklumat biometrik akan dioptimumkan untuk tujuan penguatkuasaan di bawah Pelan Holistik Penguatkuasaan PATI yang sedang dirancang.

Kementerian Dalam Negeri ingin menegaskan bahawa tempoh masa yang lama telah diberikan kepada semua PATI dan majikan untuk mendapatkan dokumen pekerja asing yang sah iaitu sehingga 31 Disember 2021. Justeru, Kerajaan tidak akan teragak-agak untuk mengambil tindakan undang-undang di bawah Akta Imigresen 1959/63 terhadap mana-mana PATI atau majikan yang culas dan melanggar kedaulatan undang-undang negara.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : PUAN RUBIAH BINTI HAJI WANG  
(KOTA SAMARAHAN)**

**TARIKH : 2 MAC 2022 (RABU)**

**SOALAN**

**PUAN RUBIAH BINTI HAJI WANG (KOTA SAMARAHAN)** minta  
**MENTERI PEMBANGUNAN LUAR BANDAR** menyatakan: -

- (a) usaha terkini daripada pihak Kementerian dalam membasmi kemiskinan khususnya di kawasan luar bandar; dan
- (b) cadangan untuk mewujudkan Inkubator Produk Khas dari usahawan wanita di kawasan-kawasan luar bandar.

**JAWAPAN**

**Tuan Yang di-Pertua,**

Selaras dengan fokus dalam Rancangan Malaysia Keduabelas (RMKe-12) dan matlamat Dasar Pembangunan Luar Bandar 2030 (DPLB 2030) ke arah luar bandar sejahtera, KPLB sentiasa komited dalam melaksanakan pelbagai program selaras dengan untuk menangani kemiskinan serta merapatkan jurang ketidaksamaan dalam golongan berpendapatan rendah, khususnya di kawasan luar Bandar.

Salah satu strategi dalam RMKe-12 adalah bagi **meningkatkan pendapatan isi rumah miskin dan memperkasa golongan B40**. Dalam *Rolling Plan* ke-2 (RP2) bagi tahun 2022, program-program di bawah Skim Pembangunan Kesejahteraan Rakyat (SPKR) diteruskan antaranya adalah program di bawah **Skim Pembangunan Kesejahteraan Rakyat (SPKR)** seperti **Program Perumahan Rakyat Termiskin (PPRT)**.

Program Bantuan **Perumahan Rakyat Termiskin (PPRT)** kepada golongan miskin dan miskin tegar kawasan luar bandar di seluruh Malaysia melibatkan siling peruntukan sebanyak **RM2.035 bilion** bagi pelaksanaan sepanjang tempoh RMKe-12.

Di bawah Rolling Plan Pertama, (RP1) RMKe-12 Tahun 2021, sebanyak **405 projek bina baharu** dan **3077 baik pulih** rumah PPRT telah dilaksanakan diseluruh Sarawak. Manakala bagi tahun 2022 di bawah Rolling Plan Kedua, sasaran bagi program PPRT Sarawak bagi **bina baharu adalah 700 buah rumah** dan baik pulih adalah **3125 buah rumah**.

Selain dari itu, Program **Quick Win** di bawah KEMAS yang **bertujuan untuk meningkatkan kemahiran sedia ada dalam usaha membolehkan peserta meningkatkan pendapatan**. Kit peralatan Kursus Kemahiran *Quick Win* yang diberikan adalah bagi tujuan kursus di samping membantu peserta yang ingin memulakan perniagaan. Bagi tahun 2022, sebanyak **RM340,000.00 dan 100 orang peserta** daripada Sarawak telah dipilih untuk menyertai program ini.

KPLB berharap bagi program pembasmian kemiskinan di luar bandar bandar, khususnya di Negeri Sarawak, semua pihak termasuk agensi-agensi peringkat Persekutuan dan Negeri akan memberi kerjasama sepenuhnya bagi memastikan agenda pembasmian kemiskinan dapat dilaksanakan secara berterusan dengan jayanya.

**Tuan Yang di-Pertua,**

Berkenaan cadangan untuk mewujudkan Inkubator Produk Khas dari usahawan wanita di kawasan-kawasan luar bandar yang dicadangkan oleh Yang Berhormat Kota Samarahan pula, buat masa ini Kementerian telah menyediakan Pusat Komuniti Desa (PKD) yang berperanan sebagai pusat pengumpulan usahawan desa. Sehingga kini sebanyak 357 produk telah berjaya dikumpul dikeseluruhan 191 PKD diseluruh negara. Antara contoh-contoh produk luar bandar adalah termasuk produk kraftangan, makanan kering, makanan sejuk beku, herba, hasil pertanian, penjagaan kesihatan, minuman dan sabun.

Secara umumnya, produk-produk tersebut dipasarkan sendiri oleh usahawan melalui platform seperti Facebook dan Instagram. Selain itu, sebahagian produk-produk ini juga telah dipasarkan secara dalam talian melalui program Desamall@KPLB.

Sejak program ini diperkenalkan pada tahun 2017, jumlah jualan terkumpul produk adalah berjumlah RM3.31 juta setakat 31 Disember 2021 dengan *Stock Keeping Unit* (SKU) sebanyak 26,941 di platform e-Dagang seperti Shopee, Lazada dan lain-lain. Seramai 2,985 usahawan luar bandar telah dilatih di bawah program DesaMall@KPLB dan telah memasarkan produk secara dalam talian di platform e-Dagang seperti dinyatakan di atas. Daripada jumlah usahawan tersebut, seramai 2,404 (80.5%) usahawan wanita luar bandar telah mendapat manfaat daripada program ini.

KPLB juga sentiasa komited di dalam membantu usahawan luar bandar termasuk usahawan wanita luar bandar dengan menawarkan program antaranya Sokongan Pengukuhan Keusahawanan Luar Bandar (SPKLB) Re-Start. Program ini menyediakan geran bantuan

bernilai RM3,000 - RM5,000 bagi menampung kos operasi dan keperluan modal pusingan bertujuan secara khusus untuk membantu usahawan memulakan semula perniagaan yang terkesan akibat pandemik COVID-19. Program khusus yang bermula pada September 2021 ini telah berjaya membantu 586 orang usahawan sehingga kini dengan **319 orang usahawan atau 76% daripada jumlah usahawan tersebut merupakan usahawan wanita luar bandar dengan nilai geran berjumlah RM2.97 juta.**

Bagi tahun 2022, dengan peruntukan sebanyak RM15.3 juta iaitu peningkatan sebanyak RM4.3 juta dari tahun sebelumnya, KPLB dan juga agensi telah merencanakan beberapa program secara menyeluruh bagi membantu usahawan meningkatkan taraf hidup ekonomi mereka. Program-program tersebut termasuklah Program Rural Bussiness Challenge 2.0 (RBC 2.0), PSR@KPLB, Program Usahawan Bergerak, Rural Bussiness Outlet, Program SPKLB, dan juga Program Outreach Usahawan @ KPLB.

Selain itu, MARA turut menyediakan kemudahan ruang niaga dan inkubator untuk usahawan-usahawan menjalankan perniagaan. Sehingga Januari 2022, seramai **89 usahawan wanita** yang melibatkan empat (4) kluster perniagaan iaitu Makanan & Minuman (F&B), Gaya Hidup, Pembinaan dan Perkhidmatan telah mendapat kemudahan inkubator MARA di seluruh negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : JAWAB LISAN**

**DARIPADA : YB DATO' SRI ABDUL AZEEZ BIN ABDUL  
RAHIM (BALING)**

**TARIKH : 2 MAC 2022 (RABU)**

**SOALAN**

**DATO' SRI ABDUL AZEEZ BIN ABDUL RAHIM [ BALING ]** minta  
**MENTERI DALAM NEGERI** menyatakan :-

(a) tindakan susulan Kerajaan terhadap rakyat yang telah menjadi mangsa  
“keldai pembukaan akaun bank” yang menyebabkan akaun mereka ditutup  
tanpa notis; dan

(b) usaha-usaha Kerajaan untuk mengatasi dan melindungi rakyat daripada  
menjadi mangsa penipuan pembukaan akaun bank.

**JAWAPAN**

Tuan Yang Di Pertua,

Bagi menjawab soalan pertama, mangsa-mangsa keldai pembukaan  
akaun bank ini boleh menggunakan semula akaun bank setelah pihak polis  
selesai menjalankan siasatan dan mendapati mangsa adalah individu yang  
telah diperdaya oleh sindiket atau *scammer* untuk menjadi keldai akaun.  
Dalam kes ini, pegawai penyiasat perlu memajukan nama individu tersebut  
kepada pejabat Timbalan Pengarah Jenayah Siber & Multimedia Jabatan  
Siasatan Jenayah Komersil Bukit Aman untuk nama mereka dikeluarkan  
daripada senarai pangkalan data Semak Mule. Setelah itu, mangsa perlu  
mendapatkan pengesahan daripada pegawai penyiasat dan seterusnya  
memajukan pengesahan tersebut kepada pihak bank bagi menguruskan

semula urusan pengaktifan akaun mangsa.

Manakala, bagi soalan kedua, Kementerian melalui PDRM telah melaksanakan pelbagai usaha untuk mengatasi dan melindungi rakyat daripada menjadi mangsa penipuan dalam pembukaan akaun bank. Antara usaha yang dijalankan adalah:

- i. Membuat hebahan kepada masyarakat melalui media cetak, media sosial dan media elektronik tentang akibat memberi pinjaman akaun kepada pihak ketiga;
- ii. Pelaksanaan Kempen Pencegahan Jenayah Komersil yang bertujuan meningkatkan kesedaran kepada orang ramai mengenai jenayah komersil terutamanya melibatkan penipuan jenayah dalam talian dan seterusnya mengelakkan orang ramai daripada menjadi mangsa kepada jenayah tersebut. Sasaran kempen ini adalah syarikat korporat, *netizen*, warga emas, kakitangan kerajaan dan syarikat swasta serta pelajar; dan
- iii. Orang ramai juga boleh menghubungi Pusat Maklumbalas Panggilan Penipuan atau dikenali sebagai CCID *Scam Response Centre*. Pusat ini beroperasi sebagai '*one stop centre*' kepada orang ramai untuk berhubung dengan JSJK dalam membuat pertanyaan-pertanyaan berkaitan dengan keldai akaun. Pusat sehenti ini mula beroperasi dari jam 9.00 pagi hingga 10.00 malam di talian tetap 03-2610 1559 dan 03-2610 1599.



**PEMBERITAHUAN PERTANYAAN LISAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS, TAHUN 2022**

**PERTANYAAN : JAWAB LISAN**

**DARIPADA : TUAN ABDUL LATIFF BIN ABDUL RAHMAN  
[ KUALA KRAI ]**

**TARIKH : 02 MAC 2022 (RABU)**

**SOALAN**

**TUAN ABDUL LATIFF BIN ABDUL RAHMAN [ KUALA KRAI ]** minta **MENTERI SUMBER MANUSIA** menyatakan adakah pelaburan-pelaburan yang dibuat oleh Pertubuhan Keselamatan Sosial (PERKESO) mematuhi syariah dan adakah PERKESO mempunyai jawatankuasa panel syariah.

**JAWAPAN**

**Tan Sri Yang di-Pertua,**

Untuk makluman Ahli-Ahli Dewan Yang Mulia, pelaburan PERKESO adalah berpandukan kepada Dasar dan Garis Panduan Pelaburan PERKESO yang diluluskan oleh Menteri Sumber Manusia selepas berunding dengan Menteri Kewangan selaras dengan seksyen 75, Akta Keselamatan Sosial Pekerja 1969 (Akta 4).

PERKESO melaburkan sebahagian daripada dana pelaburan dalam instrumen pelaburan patuh syariah seperti dalam saham, pendapatan tetap dan pasaran wang. PERKESO juga mengambil pendekatan tidak melabur dalam syarikat yang terlibat dalam bidang perjudian, alkohol dan tembakau.

Pelaburan PERKESO dipantau oleh sebuah Panel Pelaburan yang ditubuhkan di bawah seksyen 75A Akta 4.

**PEMBERITAHUAN PERTANYAAN DEWAN RAKYAT  
MESYUARAT PERTAMA, PENGGAL KELIMA,  
PARLIMEN KEEMPAT BELAS 2022**

**PERTANYAAN : LISAN**

**DARIPADA : PUAN HANNAH YEOH TSEOW SUAN  
[ SEGAMBUT ]**

**TARIKH : 8 MAC 2022 (SELASA)**

**SOALAN**

**PUAN HANNAH YEOH TSEOW SUAN [ SEGAMBUT ]** minta **MENTERI KESIHATAN** menyatakan langkah-langkah yang telah dan akan diambil untuk menepis dakwaan individu, selebriti dan Badan Bukan Kerajaan (NGO) yang giat menyebarkan maklumat melalui sosial media mengenai “kemudaratan”, bahaya atau risiko pengambilan dos penggalak sehingga mempengaruhi masyarakat terutamanya golongan warga emas.

**JAWAPAN**

Tuan Yang di-Pertua,

1. KKM menyedari perlunya tindakan pantas kerajaan dalam menangani infodemik yang begitu membimbangkan. Dakwaan dan sangkaan individu terhadap kementerian mahu pun kerajaan menerusi sosial media telah memberi impak negatif terhadap usaha kerajaan untuk mempromosikan dos penggalak sebagai ‘perisai’ dalam meningkatkan imuniti badan terhadap varian baharu COVID-19.

2. Oleh itu, KKM dalam kerangka untuk menyelaraskan kewujudan *task force* khas bagi mendepani isu berkaitan dos penggalak khasnya kepada warga emas agar mereka mendapat akses jaminan terbaik vaksinasi. Antara lainnya, cadangan **penubuhan *task force*** yang dianggotai oleh pegawai penguatkuasa dan agensi kerajaan untuk mengenal pasti dan mengambil tindakan terhadap individu yang menyebarkan berita palsu dan fakta yang ‘misleading’ dengan sengaja bagi tujuan mengelirukan rakyat **menerusi tindakan punitif** yang sewajarnya.

3. Tindakan lebih serius terhadap penyebar maklumat palsu khasnya mengenai pemberian vaksin dos penggalak ini sedang dipertimbangkan oleh kerajaan agar penularan maklumat palsu ini dapat dikekang dengan lebih agresif. KKM sentiasa **menghebahkan maklumat yang disokong oleh data dan statistik** secara ‘transparent’ dan berterusan menerusi pelantar digital kementerian bagi memperjelaskan isu tular yang berbangkit.

4. Mendepani infodemik pada masa kini, bukan sesuatu yang mudah kerana rakyat terdorong kepada perasaan ingin tahu dan membuat andaian mengikut bahan bacaan yang mereka baca. Susulan itu, sebanyak 14 isu tular yang dikenalpasti menerusi pelantar sosial media telah ditangani oleh KKM dengan tindakan susulan yang bersesuaian seperti penjelasan menerusi Kenyataan Media, pernyataan ‘berita palsu’ oleh KKM dan laporan polis.

Sekian, terima kasih.